


# OOREERIHIWA A OKATHI WA WOOMALELANI

 Mooxeliwa, muthukumano. Nrowe nilavule ni Pwiy'ahu vano. Muluku muulupale, Mpattuxa a erimu ni vathi, Yoole v'oMuluku onihelenle okathi ula voosiis'ula, wo wookokhorelani Nyuwo. Vano niwerye, Pwiya, mmurimani mwahu wiivahererya voomalela otthuna Wanyu v'oMuluku ni w'ovara muteko wa Eroho Yowarya mwa hiyo, wira eruuhe ele Nyuwo entthun'anyu wira nisuwele. Otthuna wahu ti wira nikhale aKristu oolokaxa ni arummwa oolokaxa a Nyuwo. Nyuwo Mutthune onivaha yeela voosiis'ula, okhala wira nnoowehereryani Nyuwo, mwa Nsina na Yesu Kristu. Amen.

Mukilaathiki. [Ookhala oniira, “Muntthuna sikumihiwe-vo ikuwo sa mavekelo?”—Mol.] Ayo.

<sup>2</sup> Hiyo khanreere otteeliwa murima okhala-tho va voosiis'ula, mmu—mmutekoni mwa Mwene muulupale. Ni ninnikhupanyerya, hiyo, emaara ekina, mwaha w'ohikhalana opuro wira atthu ekhale, masi hiyo nrina paahi... Nnimwiilipiha wira niire ele yoolokaxa enwery'ahu, mwaha wa ikhumelelo iyo.

<sup>3</sup> Vano, anci-ene aakhalana maleeso ni soovekela sipwehiwe osulu nno wira sivekeleliwe. Ni miyo kinihela epantte emosa paahi; kahi wira kinooliyala, masi miyo kinvekelela nuumala... vanci-enexa okisivela...ni ohiy'ula, miyo kinoovekelela voosiis'ula, nto vano-tho olelo ohiyu, okathi, nto miyo kinoovekela ni kiwehereryeke Eroho ya Muluku ovoniha. Nto ti vaavo vankisivel'aya ovekelela ma—maleeso n'itthu siiso.

<sup>4</sup> Vano mwa soovekela sa mutthu meekh'awe, Billy ookinnya, khula emosa, miyo. Sookhala soophiyaka imiya tthaaru, ni miyo, kinoomalaru okhuma mpaani nto. Moone, miyo kinookuxa vowaakuvexa tu, ni khula emosa, kinwery'aka okuxa. Ni miyo kinookuxa vowaakuvexa vanrow'aka owerya. Nkinrowa owerya okuxa sothene. Miyo kinhela ntata naka paahi, kihaana okuxa emosa, ni wira, “Pwiya, enrowa okhala *ela*, ni enrowa okhala *ela*?” Siiso paahi, okhala wira iyo ti, soovekela s'ekeekhai, khula emosa, soothuneya; etthu emosa, vekeekhai, vaatthuneya wira nilavule hoothu mwaha wa yeeyo. Nto miyo... Voohikhala wira, nyuwo moosuwela, imaara sikina Eroho Yowarya enoohimya emosa miyo kisommy'aka, enikhaliha vamurimani vaka; miyo kintthikela yeela tho, n'uphavelasa vale mpakha ophwanya. Voohikhala siiso, miyo kinookuxa voohilipelela.

<sup>5</sup> Vano, hiyo nintthuna nihimye-tho, voosiis'ula, ni naakhomase ale ari ota mapuro makina a elapo. Hiyo nintthuna naakhomase atthu voosiis'ula mwa olikariwa wa telefooni nno, ni Epooma ya Nova Yorke; Beaumont, Texas; Prescott, Arizona; Tucson, Arizona; San Jose, California; Connecticut; Gainesville, Georgia; ni New Albany, Indiana; elapo yothene. Hiyo ninnookhomasani mwa Nsina na Pwiya Yesu.

<sup>6</sup> Voosiis'ula, oIndiana, ti voosiisu wooreera. Naahikhalana epula nsana ohiyu eriirinhe okathi. Ni hiyo nri . . . Etapernakulu yoosareiwa, ni atthu othene anoowehererya, ni nwehereryo muulupale, nisomi na exikola ya Ttiminku. Ni kinroromela wira iparakha soowaattexa sa Muluku sikhale mwa nyuwo iwo.

<sup>7</sup> Ni hiyo ninniwehererya, vowaakuveyaxa sinweryaney'aya, opaka e—enamuna wira niwerye okhalana, vatthu vanwery'ahu othukumana othene vamosa, khino vathi va eheema yuulupale, memmo kinoonaaka voomalela weettiheriwa wira kilaleerye mwaha wa Mihasa iya Mithanu na miili sookiserya muhina mwa Bibilia.

<sup>8</sup> Nto vano, wira nihilekelaxe ni nisomi nuulupale voosiis'ula . . . Miyo kinnaarowelaka Apwiya, kuupuwelaka, “Exeeni kaakhanly'aka oohimiyaka?” kisuwelaka wira ola alakela onookhala muteko ahu wookokhorela wookiserya onrow'ahu okhalana. Orwa w'Apwiya khoreere okhala vakhiviru!

<sup>9</sup> Miyo kinnoona, nuumala ele yaahimmwe oCalifornia, sookhala ipa wu, ni mapuro, sinsama voophiyeryaka 76 cm khula ewoora, ipatho sinteyaka ni simoraka. Ni atthu khansuwela exeeni eniiriha yeeyo. Hiyo nri wookiseryani. Ipa sa itoolare ikonto emiya, sisamaka. Miyo kookhalana myaha suulupale vaxornaaleni, ilatarato, kinkupaly'aka wira kinooruha ohiy'ula, kitthokelelaka wira kinththuna olavula etthu mwa yeeyo ohiy'ula.

<sup>10</sup> Vano, nto, olelo ohiyu nihaana ovekeleliwa w'aretta. Murwe makaaripi ala, ewoora yaneethanu, yaneethanu na mosa, ahiso enakhaleru ewoora t'iwoora. Hiyo ninrowa opacerya vowaakuva, wona waka, wira atthu ewerye okhuma vowaakuva, ni mwaakhele ittikitti sanyu sa mavekelo. Nto hiyo ninrowa naavekelelaka aretta ohiy'ula, Apwiya yatthuna vale.

<sup>11</sup> Vano, nuupuwelelexaka mavekelo, “Exeeni erinaaka wira?” kisuwelaka wira nihiku nlo kihaana waakhula mwaha wa etthu enihimy'aka va . . . Ni miyo kinnilakela, ahiso kinnoona weettihiwa ni Eroho Yowarya wira kilavule voosiis'ula mwaha wa s'opofeta, ntoko wira enileelihe. Munnona? Eyo etthu emosa hiyo . . . Naahikhaleru ooleelihiwa, ni etthu p'itthu eniiraneya voohilipelela paahi, hiyo nihaana osuwela ela. Eroho Yowarya yoonivaha eyo, wira naalopole atthu mwaha wa itthu sinoorwa. Nyuwo moosuwela, Bibilia oohimya, wira, “Muluku

khoniira hat'etthu Owo ohitonko owooniherya arumeyi Awe, maprofeta." Ni—ni moota Yesu aalopony'awe atthu, itthu saarowa okhumelela; moota maprofeta yaalopony'aya atthu, wa itthu saarowa okhumelela. Ni vannitthuneya hiyo vano, okathi muulupale onikhal'ahu, wira noone okathi xeeni onikhal'ahu, ni etthu enikhu- . . . ni etthu enrowa okhumelela okathi ula. Vano mmosa wa myaha iya sootikiniha khino hiyo ninsomaahu imaara sinci-ene, woomorela vamurimani vaka wira—wira kaaleele atthu yeeyo voosiis'ula.

<sup>12</sup> Vano nrowe naakhunle aBibilia ahu mwa Matewu kapiitulu 24, nisome nipuro na Masu. [Munna Branham onikukuttha mmilo awe—Mol.] Kileveleliwe. Ntoko enamuna y'o—y'ophwanya ele enihimya yoosoma ahu ni mwaha ahu.

<sup>13</sup> Vano, muupuwele wira hiyo ninrowa wiixuttiha ela ntoko nisomi na Bibilia, murima-murima. Mukuxe ilaapi sanyu ni epaphelo. Kookhalana Soolempwa sinci-ene silempwe va, wira—wira nyuwo khino mulepe. Vano murowe owaani mwasome, maana vekeekhai nla nri ntoko nisomi na exikola ya Ttiminku, wira hiyo niwerye osuwela, ni nikhale oolopoliwa ni oowiiythokiha mwaha w'okathi onikhal'ahu.

<sup>14</sup> muLiivuruni mwa Matewu Oowaarya. [Munna Branham onikukuttha mmilo awe—Mol.] Kileveleliwe. Versiikulu 24 . . . Ahiso, kapiitulu 24, kiireke, opacerya versiikulu 15, kintthuna kisome nipuro nimosa na Masu Awe.

*Vano moona yootakhala yuulupale yoowuuliha muru,  
yeeyo yaahimmwe ni profeta Daniyeli, epwehiwe-ene  
nipuro noowaarya, (ole onsoma, iweke:)*

*Okathi yoowo ale ari oYuteya atthyawele omiyaakoni:  
Ole ori vataratoni—vataratoni ahikhuruwe  
okux'etthu mpaani mwawe:*

*Ole ori mmatta ahihokolowele ottuli wira akuxe  
ikuwo sawe.*

*Vano aatakhalwiwa athiyana anrowa ophwanyiwa  
oorupala, wala emwaamwihaka mwaana mahiku ene  
yaawo!*

*Vano nvekeleke wira otthyawa wanyu ohiireye eyiita,  
nnakhala nihiku na saapatu:*

*Tthiri onookhala oxanka wuulupale, ohinakhumelele  
okhuma wopaceryani w'olumwenku mpakha vano,  
nnakhala, ohinrowa-tho okhumelela.*

*Vahaakhanle wira mahiku awo anoovukuliwa, khaavo  
aawerya woopowa: masi mwaha w'ale oothanliwa  
mahiku awo anoovukuliwa.*

*Nto akhala mutthu onoohimeeryani wira, Mmoone,  
Kristu t'ula va, wala ori iwe; muhikupali.*

*Okhala wira anookhumelela aKristu oowootha, ni maprofeta oowootha, epakaka müiriirya suulupale ni sootikiniha; wira, vaakhanle wira enniweryaneya, ewootothe atthu oothanliwa.*

*Mwiuwe, ele epaceny'aka wooleelani wira.*

*Vano mwaleeliwa wira, Mmoone, owo ori mothakoni; muhirowe: mmoone, owo ori mpaani; muhikupali.*

*Vekeekhai ntoko overunya ompacery'aya onikhuma nsuwa, khunaarya mpakha onikela nsuwa; siiso-tho t'unrow'aya wiireya orwa wa Mwaana a mutthu.*

*Tthiri vari murutthu, vaavo t'anthukuman'aya axawawe...*

15 Vano, wa mwaha, miyo kaatthuna kikuxe eversiikulu 24, olipiherya eversiikulu ila wa nisomi nahu na exikola ya Ttiminku voosiis'ula. Vano nwiriyane oratta-ene okathi onsom'aka, yeela tho.

*Okhala wira anookhumelela aKristu oowootha, ni maprofeta oowootha, epakaka müiriirya suulupale ni sootikiniha; wira, vaakhanle wira enniweryaneya, ewootothe atthu oothanliwa.*

16 Vano wa mwaha voosiis'ula, ahiso yoosoma, kiireke, kintthuna kikuxe: *Ooreerihwa A Okathi Wa Woomalelani*. Owo ti mwaha kintthun'aka olavula, ahiso yoosoma: *Ooreerihwa A Okathi Wa Woomalelani*.

17 Kookupali wira hiyo ninkhala woomalelani w'okathi. Miyo kinoona wira atthu ancie-ene a... Namasoma a Soolempwa, wala hata mu—mulipa-oowaamini, onnisuwela wira hiyo vano nri woomalelani wa wahala a olumwenku. Khenrowa ophwanyiha etthu omulepa, okhala wira khonrowa okhala hata mutthu wira omusome. T'imalelo y'okathi. Vakeekhai liini, miyo nkisuwenle. Vekeekhai okathi xeeni onrow'aya okhala, nnakhala Malaikha a Wirimu khansuwela minuutu ene yoowo wala ewoora. Masi hiyo nooleeliwa ni Pwiya Yesu, wira, itthu iya sinoon'ahu vano sapaceryaru wiiraneya, vano niinule miru sahu okhala wira woopoliwa wahu ori vakhiviru. Vano, eyo "ori vakhiviru" enihimy'aya, miyo nkisuwenle. Khino enihimya wira...

18 Ntoko alipa a siensiya yaahimmy'aya nihiku nlo, mutelevisawuni, ehimya mwaha wa munyatta wa imiilya ikonto sene mulaponi onrowa opwina. Owo khukohiwa etthu, "Vaaniweryaneya opwina-wo iwe?" Owo ti muttethe wa Los Angeles, Olimani Onikela nsuwa. Ni anci-ene a nyuwo muhoona moota otthariw'aya ni rataari, khuwela ottharaka... khuthala vathi wa oSan Jose, khuvira mpakha mpuwa w'Alaska, oviraka Isisiro Aleuta, voophiyaka ikilomo imiya tthaaru ni miloko miili sa mphaireya, khikhuruwa otthikelaka mpuwa oSan Diego,

khurukurerya ottuli wa Los Angeles, khuwela iwe, xahukhu muulupale.

Vano itetere iya sothene nnikhalan'ahu ti ophutuwa wa myala ommana nikosi nla nuulupale noohikhal'etthu, khino, mpuwa mme. Miyo nkinwerya wuupuwela nsina nene awo—awo yihann'aya. Nave, eyo yaattikinyeyaka, eniruha itetere iya nnikhalan'ahu mwa miyaakha sinci-ene Olimani Onikela nsuwa. Vano siri minyatta mapuro othene. Vano alipa a siensiya ahimmye wira, emosa. . .

<sup>19</sup> Mulopwana aamuhimenrye mukina, “Vaaniweryaneyya ophomowa?”

Owo khwira, “Kahi wira ‘vaaniweryaneyya,’ masi enimwiiraneya.”

Khwira, “Masi kahi mwa nloko nahu, khino?”

Khwira, “Mwa minuutu mithanu sintharelana, wala miyaakha mithanu sintharelana. Hiyo khanisuwente okathi ene.”

<sup>20</sup> Esumana ela, kaahiveleeliheriwa myaha suulupale vaxornaaleni, sa ipa suulupale sa itoolare ikonto emiya sinyanyeyaka ni siphweeyaka, athu ethaamaka. Ni awo khansuwela moota woomaaliha. Khiyaavo hata enamuna y'omaaliha. Moone, Muluku onowerya wira etthu p'itthu Owo onthun'awe, ni khaavo onwerya omuleela Owo moota wo wira.

<sup>21</sup> Sintekiwa ipa, pooti opakiwa itthu sa siensiya, ni Muluku ti Mpattuxa a siensiya. Onrowa okhoottiheriwa sai Owo? Owo onniwerya ohonona elapo voosiis'ula ni itothomwa Owo athuna vale. Nyuwo munnisuwela, Owo aamuwerya olavula wira itothomwa sikhale, ni saamukhala voowiixa ikilomo 64.3 muhina wa ewoora nuusu, moone, khiyaavo. . . ni saamwaaluma athu mulaponi naanaanoru. Owo ti Muluku. Owo oniira paahi ntoko Owo sinthun'awe. Owo ti muulupale, mwa yoowo Mwaneene.

<sup>22</sup> Vano, noonaka otakanxeya nno wothene wa iyoniheryo, wira okathi hiyo onikhal'ahu vano, miyo kinoona wira etthu yooreera waavaavya itthu iya n'ukumiherya, okhala wira Ikanyeryo sootaphuliwa, ni nisuwele ekeekhai ya itthu iya, okhala wira Muluku onnikhala oororomeleya wa hiyo, ni mahala Awe, wira onooniherye itthu iya.

<sup>23</sup> Kintthuna wira nwehe va mwa Matewu 24, Yesu aalavunle nuulumo “aKristu,” a-K-r-i-s-t-u, “aKristu.” Kahi Kristu, masi “aKristu,” oowaatta, kahi mmosa. “aKristu.” Tivo, nuulumo *Kristu* nihimya “Ole ooreerihwa.” Vano nto vakhala wira ti “ooreerihwa,” khonrowa okhala mmosa paahi, masi anci-ene, ooreerihwa, “ale ooreerihwa.” Munnona?

<sup>24</sup> Mwa enamuna ekina, vaakhanle wira Owo aahitthuna okhweyiha wira hiyo niwerye wiiwa sana, Owo aamwiira,

“Mahiku ookiserya anookhumelela, ooreerihwa oowootha.” Vano, eyo enikhala ntoko yoohiweryaneya, moone, moolumo a “ooreerihwa.” Masi nwehe sana moolumo ene anttharelana, “ni maprofeta oowootha,” m-a-p-r-o-f-e-t-a, oowaatta.

<sup>25</sup> Vano, *ooreerihwa*, ti, “ole orina mutthaka.” Nto enamuna emosa paahi vanweryaney’aya mutthaka oruuhwa enikhala ni mmosa ori *ooreerihwa*, vano owo aarowa okhala profeta, ooreerihwa, “anookhumelela awiixuttihi, oowootha ooreerihwa.” Profeta oniixuttihi ele ekhanle mutthaka awe. Awiixuttihi ooreerihwa, masi atthu ooreerihwa ni mwiixuttihi woowootha. Ooreerihwa, “aKristu,” oowaatta; “maprofeta,” oowaatta. Nto vakhala wira yookhala etthu ene ntoko k—Kristu, mmosa, vano ala yaahaana okhala “ooreerihwa,” wira s’eprofeta aya sa itthu awo yiixuttihi’aya saarowa okhala t’evirikanelo aya, okhala wira awo t’oreerihasiwa, ooreerihwa.

<sup>26</sup> Vano, nla nisomi na exikola ya Ttiminku, hiyo ninthuna ni—niilipihe wira niruue yoola wira nooniherye saana, ni Soolempwa, kahi ni etthu mutthu mukina ohimmy’awe mwaha wa yeela, masi nisomaka Soolempwa paahi.

Khino nyuwo munimwiira, “Vanweryaneya sai okhala? Ooreerihwa yaamukhala . . . ? Awo yaari exeeni?”

<sup>27</sup> “aKristu,” a-K-r-i-s-t-u. “aKristu ooreerihwa, ni maprofeta oowootha.” Ale ooreerihwa, masi maprofeta oowootha!

Yesu oohimya, wira, “Epula enaarupela anaxariya n’ale ootakhala.”

<sup>28</sup> Vano, mutthu aamuwerya okiirela miyo, “Nyuwo munnaamini wira mureeriho ole mwa atthu ale onihimya wira ti mureeriho wa Eroho Yowarya?” Ayo, mulopwana, Eroho Yowarya yooloka ya Muluku enimorela mutthu, nave nlelo awo t’owootha.

Vano nwiriyane oratteene nto moone etthu Owo ohimmy’awe. “Vano awo anoopaka miiriirya ni sootikiniha, wira ewootothe ale Oothanliwa vaakhanle wira yaamuweryaneya.” Ni awo t’oreerihwa ni Eroho Yowarya yooloka. Miyo koosuwela wira ela eniweya v’elolo sana, masi nnoorowa okuxa okathi nitaphulele ni Masu, wira vekeekhai eyo ti SIISO ANIHIMYA T’APWIYA, Ekeekhai.

<sup>29</sup> Vano nrowe naakhunle aBibilia ahu, minuutu mmosa paahi, Matewu kapiitulu 5, nipacerye e—eversiiikulu 45, moone vano okathi onsom’ahu okathi vakhani mwa Soolempwa iya. Vano nto, nuumala ophiya va, vano, hiyo nnimoovahani. . . Vano nyuwo, hiyo navonya vale osoma sothene iyo, nto nyuwo mmukuxe Bibilia anyu; ni—ni nyuwo munoowerya osoma seiyo hiyo nakhuma va ni nyuwo mwarowa owaani, ni—ni nyuwo musome ele Bibilia enihimy’awe wa yeeyo.

<sup>30</sup> Vano wira nikuxe okathi ahu, wira nikhalane e—ethu yoolipihereya, okhala wira kinihimya nuulumu va nikhanle nootutuxa. Vanweryaneya sai Eroho Yowarya omureeriha mwixuttihi oowootha? Masi ti yeeyo Yesu ohimmy'awe wira yaamukhumelela.

Vano, Matewu, kapiitulu 5, versiikulu 45, nrowe nisome vano. Nrowe nikuxe, nipacerye o—ottuli vakhani, 44.

*Nto Miyo kinooleelani wira, Mwaaphenteke awanan'inyu, mwaavekeleleke ale anoolupatthani, nwiireleke sooreera ale anoonyokhani, . . . mwaavekeleleke ale anoohaaxani, ni anoolupatthani;*

*Wira mukhale aana a Atith'inyu ari wirimu: maana awo annaakumiherya nsuwa naya athu ootakhala ni . . . ooreera murima, ni annaarupihela epulaanaxariya ni . . . ootakhala. (Epula ennimurupela ootakhala ni ooreera murima.)*

<sup>31</sup> Vano wira nitthare ela, mwa etthu ekina y'eprofeta enttharihela yeela, nrowe nikhunle vano mwa aHeperi kapiitulu 6, wa eversiikulu ettharelana wa yeela, vaavo Paulo onuupuxery'awe etthu ene yeeyo Yesu ohimmy'awe. Paulo, alavulaka vano. Nyuwo mphavelaka yeeyo . . . Ni nyuwo iwo muraatiyuni, mwaakuxe aBibilia anyu vakhiviru ni nyuwo ni ekapatti ya epaphelo, nto mphavele yeela vano. aHeperi, kapiitulu 6, Paulo aalepelaka aHeperi, owooniheryaka iruku ni ithoonyeryo, aaruuhaka okhuma vathi va oYuuta okela mwa oKristu, owooniheryaka moota itthu sothene sa khalayi saaryaaya iruku paahi sa itthu saarowa orwa. Paulo alavulaka vano, aHeperi 6.

*Tivo nihiyaka miixuttiho soopacerya sa mwaha wa Kristu (K-r-i-s-t-u, mmosa), nitthareke makhalelo ooreera; nihihokolowelaka-tho vasya othipela mapotto oorukunuxa murima . . . sa miteko s'okhwa, ni soomwaamini Muluku.*

*Sa . . . mwixuttiho w'opatiiso, ni wiixaatherya matata, ni ohihimuwa w'alipa-ookhwa, ni olamuliwa ohinimala.*

*Vano eyo nniwiiira, Muluku atthuna.*

*Tthiri eyo khinweryaneya w'ale yaatonko omwaleeliwa, yaalawinwe yoovaha ya wirimu, nave khwiira mpantte wa Eroho Yowarya,*

Kinthuna koowiriyaniheni etthu minuutu mmosa paahi. Nyuwo mooweha? Wira ti "yoovaha"; nave kahi "soovaha, yiirale mpantte wa soovaha sa wirimu"; masi, "yoovaha ya wirimu," emosa; "Kristu," mmosa; "yoovaha," emosa.

*. . . yoovaha ya wirimu, ni . . . khwiira mpantte wa Eroho Yowarya,*

*Ni yaalawinhe ya ma...masu a Muluku,...  
(yaalawinhe exeeni?)...masu a Muluku, ni owerya  
wa olumwenku onrwa,*

*Nave awo yahiya waamini, khivanweryaneya  
ohokolowela-tho orukunxa murima; okhala wira  
wa awo annimukhomela-tho Mwaana a Muluku,  
amuulihihaka muru ohoolo w'atthu.*

*Tthiri, (nwiriyane) etthaya...enrupeliwa epula  
imaara sinci-ene, wira yiimihe mihokorokho w'ale  
anlima, enaakhela iparakha sa Muluku:*

*Masi ele envaha miiwa...malaxi oonanara  
ennikhoottiwa, otakhalihwa waya woophiya; nave  
emalelo aya opahiwa.*

<sup>32</sup> Vano mulikanyihe yeeyo ni Matewu 5:24 tho. Nwehe, Yesu ohimnye wira epula ni nsuwa sinnoorwa mulaponi, seiyo Muluku onrumihel'awe wira silimmwe soolya ni itthu siiso w'atthu a mulaponi. Vano epula enveleeliheriwa mwaha wa yolya, mihokorokho. Masi nthakathaka, ni malaxi oonanara, siryeene mmatta, sinaakhela etthu emosaru. Epula emosaru eninnuwiha etriku t'ipula emosaru eninnuwiha malaxi oonanara.

<sup>33</sup> Moota kaarin'aka nikano nuulupale mwa yeeyo emaara emosa, okathi waakumann'aka n'atthu aPentekosite emaara yoopacerya! Nto nlo naari nikano nuulupale wa miyo. Kaahiwoona alopwana aili, mmosa...Kiira kihinatoko wiiwa olavula ilavulelo. Mmosa aalavula ilavulelo, mukina aamutaphulela, siiso-siiso. Ni yaahimyasa ekeekhai, yaahimyasa wira, "Aakhala anci-ene va antthuneya wira erukunuxe murima ohiy'ula. Aakhala athiyana, n'alopwana." Nto atthu yaanivenya n'urowa waltari.

Miyo kuupuwela, "Nttittimiho xeeni!"

<sup>34</sup> Vano nto ni yoovaha yaamukhaani ya Eroho Yowarya, miyo khulavula n'axilopwana ale, paahi, moosuwela moota, mwa othokorerya, enamuna emosa yaamukhaani paahi y'osuwela. Nto mmosa a yaawo aari muKristu ooloka, ni owo aari murumeyi eekeekhai a Kristu, vano mukina ole aari namirima miili. Vano mmosa a yaawo, mmosa ole aari namirima miili, aakhala ni muthiyana mmosa ooriipa ikharari, eettanaka mmosa a ikharari sootteela ni aahikhalana aana ni yoowo. Ahe, eyo yaari vaavale mwa yoowoona; khivaaweryaneya okhoottiwa. Nto miyo khulavula ni yoowo mwaha wa yeeyo. Owo khukiweha khurwa mpaani.

<sup>35</sup> Vano miyo kaahitikinihiwa, vekeekhai sana. Miyo koono wira kaakumananne malaikha, vano miyo khwiikoha sinto nkaari eriyari ya axetwani. Vaaweryaneya sai okhala yeeyo? Nkaawerya osuwela sana. Vano mwa miyaakha sinci-ene miyo



kikumiha matata aka mwa yeeyo, mpakha nihiku nimoso vaavo. . .

George Smith, mmiravo oneetta ni mwan'aka mwaamuthiyana, hiyo naahirowa nsana, mpakha vanxiloni va khalayi weiwo onrowaaka olompa.

Nto numala okhala weiwo mahiku maili, Eroho Yowarya khukiruhela-tho Yoolempwa ela: "Maana epula ennirupela etthaya imaara sinci-ene wira yiimihe mihokorokho, masi miiwa ni malaxi oonanara sinnikhala sikumi n'epula ene yeeyo, ni emalelo aya opahiwa." Sikhalaka ni evaheryo emosaru envaha ekumi ya Muluku. Vano miyo khusuwela sana, yeele, "Ni," Yesu ohimnye wira, "ni mihokorokho saya annisuweliwa."

<sup>36</sup> Vano, tivo, epula emorelaka miri s'ephattu sa mulaponi, ti nthoonyeryo na epula ya Erooho yeeyo envaha Ekumi Ehinimala, emorelaka Ekereja, vano hiyo nniihana epula ya mutthulo ni epula yookiserya. Ni eyo epulaa, enivuua mwa Eroho ya Muluku, emorelaka Ekereja Awe.

<sup>37</sup> Nwehe, eyo etthu yootikiniha sana va. Munnona? Okathi ipyo iye sikenly'aya mutthayani, hata wira sikenle enamuna xeeni mme, iyo saari miiwa opacerya wene. Masi etriku ekenle mutthayani, ni malaxi, yaari malaxi opacerya wene. Ni khula n laxi nikumiheryaka mmansaya, emaara ekina, naahooniherya wira naari wopaceryani w'ekeekhai.

<sup>38</sup> "Nto awo anoowootooha ale Oothanliwa vaakhanle wira vaaniweryaneya," 'okhala wira awo anaakhela epula emosaru, eparakha emosaru, yooniheryaka miiriirya mimosaru, sootikiniha imosaru. Munnona? "Awo anoowootooha, ahiso yaamuwootoha ale Oothanliwa vaakhanle wira vaaniweryaneya." Vano, mwiiwa khonwerya ohikhala mwiiwa, nnakhala etriku khenwerya ohikhala etriku; ti Mpattuxa a khula emosa otthokiheny'awe wopaceryani. Owo t'ule Oothanliwa. Epula emosaru!

<sup>39</sup> Nsuwa nimphattuwa voosiisu n'umwaramwareya mulaponi, okathi nlo naarin'aya elapo ela ni nihiku nnikhah'u. Vano nsuwa, nsuwa nimosaru nimphattuwa Onikhuma nsuwa ti nsuwa nimosaru nintupweela Onikela nsuwa. Vano nsuwa nlo n niveleelihiwa wira nittokottihe epyo mutthayani, yeeyo enipakeliwa irutthu sahu.

<sup>40</sup> Hiyo nnikhala akumi mwaha w'etthu yookhwa. Eyo t'inamuna emosa enweryaneya nyuwo okhala. Vano vakhala wira etthu emosa ehaana okhwa khula nihiku wira nyuwo mukhale mukumi, ephattu, nto kehiyo ekeekhai wira yawinyu—erutthu anyu ehaana okhala ekumi mwaha w'etthu yookhwa, wa ekumi y'erutthu, vano muhaana okhalana Etthu enookhwa, mwa erooho, wira yoopole ekumi anyu ya erooho. Nto Muluku, aahiikhaliha etthu, erutthu, nto khukhwa wira hiyo nikhale akumi. Khiyaavo hata ekereja, hata etthu ekina molumwenkuni

enwerya owoopolani ohikhanle Muluku. Eyo t'itthu emosa paahi iyo sinikhal'aya mwa yeeyo.

<sup>41</sup> Vano mutthare Soolempwa. Yesu ti Masu. “Wopaceryani naari Nsu. Nto Nsu khwiipaka erutthu khukhala ni hiyo. Wopaceryani naari Nsu, nto Nsu naari ni Muluku. Nto Nsu khwiipaka erutthu, Yoowo aakhanle, aakhanle ni hiyo.” “Vano mutthu khonkhala mukumi ni yolya paahi,” wa erutthu, “masi ni Masu othene ankhuma mwaano mwa Muluku.” Nto, nyuwo moone, hiyo ninkhala akumi mwaha wa Masu, ni awo ti Muluku.

<sup>42</sup> Vano nsuwa nnoomwareya n'uttokottiha enuku. Vano, nlo khaninttokottiha yothene emaara emosaru. Okathi iyo enrow'aya, ettokothaka, eyo enoottokottha voohihyererya mpakha ophiyerya nikala ntero.

Vano ti siiso, olelo, ni Ekereja. Eyo epacenrye okhaani aya, ottuli okathi w'epiphi, weiwo yaaryaaya vathi v'ettahaya. Eyo ehinnuwa vano mpakha ottokottha. Ni hiyo ninniweriya woona, oratta-ene, moota Muluku mwa ephattu okathi wothene. . .

<sup>43</sup> Khivanweryaneya otepanya ephattu. Owo ti mulattu olelo. Hiyo ninriha misika, ni mphareya mme, nihononaka ni niphulaka ni misika atoomika. Elapo enootepanyeyaxa okathi wothene, esamaka mpuwa mwaya. Sinimwiikitthiwa miri; itarupa sinimookhupani. Onipakiwa mukuso mmuro; owo onootekhuma.

Muhaana ophwanya enamuna ya Muluku yo wira itthu n'ukhala mwa yeeyo. Hiyo nnimwaattokotiha atthu mukereja ni mitthenkeso; nkawehani etthu erin'ahu! Mukhale mphironi evaheriwe ni Muluku wa yeeyo.

<sup>44</sup> Masi, nyuwo moone, “Owo onnaarumihela epula,” nitthikelaka mwaha ahu, “anaxariya ni ootakhala.” Yesu onoohimeeryani va vano, mwa Matewu 24, eyo yaarowa okhala ethoonyeryo okathi wa woomalelani.

Vano, vakhala wira ethoonyeryo ela eri wira esuweliwe okathi wookiserya paahi, weso eyo ehaana okhala nuumala otaphuliwa Ikanyeryo iye. Munnona? Eyo ti ethoonyeryo ya woomalelani. Eyo yaarowa okhala, saakhumelelaka itthu iya, onrowa okhala okathi wa woomalelani. Vano eyo enrowa okhala ethoonyeryo, vano, wira ale Oothanliwa ehikhale ootikinihiwa mwa itthu iya. Nyuwo munnoona yeeyo? Nto, ehaana wuupululiwa, wooniheriwa.

<sup>45</sup> Nwehe, etriku ni malaxi oonanara soopiili sinkhala ni Mureeriho mmosaru wa Wirimu. Soopiili sinnitthapela Yoowo.

Miyo kinnuupuwela ela, kitthikelaka ohimya nlikanyihoni nla iwe nihiku nle oGreen's Mill. Miyo—miyo kaahoono yoowoona ele orwa. Nto yaahikhala elapo yuulupale, vano eyo yaaroolimmwa yothene. Vano vale aarowa Mulipa-oowaala, toko. Miyo kintthuna kikhalihe eyo ohoolo wanyu. Nwehe ele

enipacerya orowa, vano ele entthara. Nto okathi Mulopwan'ola aawanre soottelea aarwaawe elapo yeeyo, aalaka epyo, vano ottuli Wawe aanirwa mulopwana mmosa, aawanre ikuwo sooriipa, aakhala ntoko a mwiiitho, eettaka vakhani-vakhani ottuli Wawe, aalaka nthakathaka. Vano vairaney'aya yeela, nto kaahoonu mihokorokho soomiili wunnuwa. Nto sinnuwaka siisaale, mmosa waari etriku nto mukina naari nthakathaka.

Vano yaahirwa eyuumu, okathi, yaakhala wira, soopiili saarimuurama miru saya yinlelaka epula paahi. Vano naahirwa neeku nuulupale naakhunenle elapo, vano khirupa epula. Nto etriku khwiinuwa khwira, "Avuwihwe Apwiya! Avuwihwe Apwiya!" Ni nthakathaka khwiinuwa khikhuwela, "Avuwihwe Apwiya! Avuwihwe Apwiya!" Sookhumelela imosaru. Soopiili sipweteyaka, soopiili saamookhwa. Vano nto etriku enimunnuwa n'uvoliwa nththona. Nto mwaha wo wira saari ematta emosaru, mpooriyo mmosaru, nipuro nimosaru, vathi va muro mmosaru, khikhuma etriku khikhuma nthakathaka ni etthu emosaru. Nwehe, maasi mamosaru a mureeriho annikumiherya etriku, annikumiherya nthakathaka.

<sup>46</sup> Eroho Yowarya emosaru enireeriha Ekereja, enaavaha otthuna wo woopola minepa s'atthu, sinaavaha owerya w'opaka miiriirya, Yeeyo ennimmorela ootakhala siiso ntoko naxariya. Eroho ene yeeyo emosaru! Vano, khivanweryaneya wiiriwa enamuna ekina ni omwiiwa Matewu 24:24. Owo ohimnye wira, "Anookhumelela aKristu oowootha," ooreerihiwa, oowootha. Ooreerihiwa ni Etthu yooloka, masi anookhala maprofeta oowootha a Yeeyo, awiixuttihi oowootha a Yeeyo.

Exeeni yaarowa omwiiriha mutthu otthuna okhala mwiixuttihi oowootha a etthu eri Ekeekhai? Vano hiyo nnoophiyerya ekanyeryo ya nxeni muhina mwa minuutu vakhani, ni munimoona wira owo muromolelo. Munnona? Awiixuttihi oowootha; ooreerihiwa oowootha. aKristu ooreerihiwa, masi awiixuttihi oowootha. Ti enamuna emosa enweryaney'aya wiiwiwa sana.

<sup>47</sup> Ntoko va okathi uwo ovinre, miyo koohimya ela. Kaamuwerya ohimya okhala wira hiyo nri oolikariwa ni raatiyu elapo yothene. Nihiku nlo miyo kaalavula ni mpatthani aka mmosa, weiwo ela eniph'y'aya voosiis'ula, wArizona. Vano owo aahikhalana e—ematta sa miri sa sitiriinu. Ni owo aahikhalana mwiri mmosa mme waari murarance yoowo waaniima atoranza, limawu, transelina, tanxelo. [Otopaanyeriwa wa tanxerina ni toranza—Mot.] Vano kinniliyala mihokorokho mikavi saari mwiri mmosa yoole. Nto miyo khumwiirela mu—mu—mulopwan'owo, miyo khwira, "Enikhala sai iyo? Muthinto xeeni wa mwiri ule?"

Owo khwira, "Mwiri ene, ole, murarance."

Miyo khwira, “Okhalenleni toranxa memme? Okhalanleni alimawu memme?”

Owo khwira, “Iyo siroottopaanyeriwa memme.”

Miyo khwira, “Kinnoona. Ahe, vano,” miyo khwira, “vano, mwaahiyu mwiri ule waima nikuttha nikina na mihokorokho,” seiyo sinttokottha ntoko okathi mmosaru, miyo khwira, “nto sothene sinrowa wiima sinrowa okhala irarance. Wakhalaru wira murarance wa ntekhu, onrowa wiima irarance sa ntekhu, kahi siiso, mulopwana?”

Owo khwira, “Nnari, mulopwana. Khula erintta ettopyanyiwe enrowa wiima muxovo aya.”

Miyo khwira, “Munihimya wira erintta ele ya limawu enrowa wiima limawu vamuranceni vale?”

Owo khwira, “Ayo, mulopwana.”

“Erintta ya toranxa enrowa wiima toranxa vamuranceni vale?”

Owo khwira, “Ayo, mulopwana. Owo ti mukhalelo wa erintta ettopyanyiwe vaavale.”

Miyo khwira, “Avuwihwe Muluku!”

Owo khwira, “Munihimya exeeni?”

Miyo khwira, “Yookoha ekina. Vano, murarance ole onookhalakhala-tho wiimaka irarance?”

Owo khwira, “Yaphuwa-ru erintta ekina mwa yoole.” Yaphuwa-ru erintta ekina mwa *yoole*, kahi yattopyanyiwa-ru emosa mwa yoowo. Masi, sothene saya mihokorokho sitriinu, ni sinkhala ni ekumi ya isitriinu eri mmwirini sitriinu.

<sup>48</sup> Miyo khwira, “Eyo eri vo! Metotista enimwiima aMetotista, khula okathi. Patista enimwiima aPatista, khula okathi. Katolika enimwiima aKatolika, khula okathi. Masi Ekereja ya Muluku mukumi enoomukumiherya Kristu okhuma vamutathaarini, Masu khula okathi, yakhalakhala-ru ephuwelaka erintta ekina enikhuma mwa Yoowo ene.”

<sup>49</sup> Vano, vanniweryaneya ottopyanyiwa vo, moone. Khula toranxa, limawu, tanxelo, transelina, khula mihokorokho sa sitriinu iyo sikhany’aya, khula mmosa wa seiyo onniwerya okhala vamwirini vale; masi okhalelaka mwiri ule onamoona woowootha, okhalaka mukumi mwaha wa mwir’uwo. Munnoona yeeyo? Awo annikhala ni ekelaka ohoolo mwa ekumi yooloka eri mmwirini mme.

Vano, eyo eri mmo Matewu 24:24, ekhalaka mwa Ekumi emosaru, masi khasaari s’ekeekhai, wopaceryani. Awo anikhalela onamoona woowootha Mwiri ule! Owo murarance, nnakhala vo mwiri sitriinu. Ni awo aniira, “Ekerej’ela, muromolel’ola onimukhalela onamoona Kristu.” Nave arina opatiiso woowootha, onamoona woowootha wa

Masu, yeereryaka wira owerya wa Muluku waari paahi wa awiixutti?

Yesu, Mwaneene, oohimya, “Murowe mulaponi mothene mwalaleerye Ehapari yooreera khula erintta enrowa...mwiri onrowa okhalakhala okumiheryaka, khula erintta enrowa okhala vamwirini. Vano ithoonyeryo iya sinootthara irintta sooloka.” Vayi? Vakhalaru wira Mwiri, vakhalaru wira Owo onniphuwa irintta, mpakha woomalelani w’olumwenku. “Mwa Nsina Naka awo anoowoomola axetwani; olavula ilavulelo isya; anoovara inowa; anoowurya ithu siniiva; anoowiixaatherya matata aretta awo onopenuwa.” Munnoona okathi onkhal’ahu? Munnoona ele Yesu ohimmy’awe?

<sup>50</sup> Muupuwele, ela yaarowa okhala woomalelani w’okathi, kahi wu vathi va Wesley ni ottuli wu. Vano, woomalelani w’okathi, yaari wira ela yiiraneye.

Vano nwehe Soolempwa; muhiye Seiyo sikhalele onamoona. Yesu ohimye wira, “Musome Soolempwa, maana mwa Seiyo nyuwo munuupuwela, ahiso munnaamini, wira munoophwanya Ekumi Ehinimala, vano ti Seiyo sinkikhalele Miyo onamoona.” Mwa moolumo makina, vakhalaru wira mwiri ula onookhalakhala ophuwelaka erintta... “Miyo ka Eviteera, Mwiri; nyuwo mwa irintta. Ole onikaamini Miyo, miteko sinvar’aka owo onoovara nave,” Yohani Oowaarya 14:12.

<sup>51</sup> Vano, “Ole onkhala mwa Miyo, ole oni...ole aari mmutathaarini Mwaka wopaceryani.”

Mwaha wa yeeyo Yesu aaryaawe Mutathaari ni Mulipu wa Davidi. Owo aari Davidi ahinatthi, mwa Davidi, ni numala Davidi, soopiili Mutathaari ni Mulipu wa Davidi; Ettheneeri y’Oxaka, Ethutu ya Saroni, Ekhokowa ya Mukhatoni, Alfa ni Omeka; Tithi, Mwaana, Eroho Yowarya. “Mwa Yoowo onikhala oMuluku wothene woomalela mw’erutthuni.” Soopiili Mutathaari ni Mulipu wa Davidi!

“Ole okhanle Ekumi yoothanliwa, Ekumi yoothommwa, eri mwa Miyo,” ni Owo ti Masu, “okhuma wopaceryani; owo akhumela vale, onimwiima mihokorokho Saka.” Yohani Oowaarya 14:12.

Masi akina anookhala ni etthu emosaru, yiisihanaka mmansaya aKristu ni alipa-oowaamini. “Kahi othene ale aniira, ‘Pwiya, Pwiya,’ anookela-mo.”

Vano, eyo eri wira yiiraneye ni yooniheriwe mahiku ookiserya, “okathi isiiri sa Muluku sinrow’aya omaliheriwa,” ntoko sinrow’ahu ophiyerya yeeyo ohoolo vahilekenle.

<sup>52</sup> Miri iya, eviteera y’ekeekhai ni eviteera yoowootha! Nyuwo munnikiiwaka miyo olaleerya yeeyo okhuma, okhuma miyaakha sivinre, moota sininnuw’aya vamosa. Kooruaha kaahimiyaka atthu ni kihooniherya wira, mwa Kayini ni

Apeelee, iviteera piili saakumanne waltari; oowaili aya anatiini, oowaili aya ooreerihiwa, oowaili aya etthunasaka ekumi, ni emukokhorelasaka Muluku mmosaru. Nto mmosa khukhoottiwa vano mukina khwaakheliwa.

Nto enamuna emosa paahi ole aakheliwe aawenry'awe wira etthu yoovirikana ni ya munn'awe: owo aarimuupululeliwa eyo. Maana Bibilia ohimye wira, "Mwaha wo waamini..." aHeperi, kapiitulu 11, "Mwaha wo waamini Apeelee aahinvaha Muluku mukuttho wooreerexa ovikana ole wa Kayini, yoowo Muluku aamuttotopenly'awe okhala naxariya."

Yesu, oohimya, wuupulula wa erooho wira Owo aari Pani! "Atthu aniira wira Miyo Mwaana a mutthu ki pani?"

Owo khwira, Pedru khwira, "Nyuwu mwa Kristu, Mwaana a Muluku mukumi."

"Ooreeriwa ti nyuwu, Simoni—Simoni, mwaana a Yona; erutthu ni ephome khenatoko owuupululelani ila. Atithi Aka ari Wirimu ti yuupulunle. Vamwala va kinooteka-vo Ekerej'Aka," (exeeni?) wuupululiwa w'ekeekhai wa Masu. Vo ti vari-tho Eviteera yeekeekhai. "Apeelee, mwaha wo waamini!"

Nyuwo mwiinre, "Khiwaari wuupululiwa."

<sup>53</sup> Waamini exeenii? Waamini etthu emosa nyuwu munuupululeliw'anyu; ehinatthi okhala nlelo, masi nyuwu munnaamini wira enookhala. Waamini wuupululiwa wa otthuna wa Muluku. Vano, mwaha wa wuupululiwa!

<sup>54</sup> Vano ikereja olelo hata khasinaamini muupululo wa erooho. Awo anaamini mwiixuttiho wa nikano nimosu na eyeettiheryo. "Mwaha wa wuupululiwa Apeelee aahinvaha Muluku mukottho wooreerexa ovikana ole wa Kayini, yoowo Muluku aamuttotopenly'awe okhala naxariya." Amen. Kinwehererya wira munimoona eyo. Munnoona vatthu vanikhal'ahu? Munnoona okathi ene?

Miyo kaalavula ni mu—mulopwana mmosa woohikhala khalayi, muKristu mmosa oosoma ni oolakeya. Owo khwira, "Mwenye Branham, hiyo ninnikhootta miyuupululo sothene."

<sup>55</sup> Miyo khwira, "Vano muhaana omukhootta Yesu Kristu, maana Owo ti wiisuupulula wa Muluku, Muluku owiisuupulula mwa erutthu ya mutthu." Voohikhala wira munimoona eyo, moopweteya.

Yesu ohimye wira, "Voohikhala wira munimwaamini wira Miyo ka Yoowo, munimookhwa ni itampi sanyu." Owo ti wiisuupulula wa Muluku, Eroho ya Muluku yoowiisuupulula ntoko mutthu. Mwaahiweryeke waamini yeeyo, moopweteya. Nyuwu munimuhela mutthu a neeraru mwa Yoowo, mutthu aneili, wala mukina woohikhala Muluku, moopweteya. "Voohikhala wira munimwaamini wira Miyo ka Yoowo, munimookhwa ni itampi sanyu." Wuupululiwa!

56 Khivanxankiha yahaawenry'aya omoona Owo. "Khaavo onwerya orwa wa Miyo ohikhanle wira Atithi Aka anoomuruuha. Vano othene ale Atithi akivanh'aya," mmitathaarini, "animoorwa wa Miyo." Munnona? Munniwa sana? Oh, moota entthuney'aya hiyo omphenta Yoowo, omukokhorela Yoowo, onvuwiha Yoowo; mwaha wo woona muhokorokho wa Erooho mahiku ookiserya, ni Mwiri Mwaakameliwa ottokotthaka vasulu v'okathi!

57 Mwiri w'ekeekhai ni mwiri woowootha, soopiili saarina mureeriho mmosaru. Maasi yaamorenle mwa soopiili. Khivanxankiha Owo onilopola, "Yaamuwoototha ale Oothanliwa vaakhanle wira vaaniweryaneya."

58 Nwehe, iyo sinikhala ntoko soolikana. Awo arina mureeriho mmosaru. Masi nwehe, "Ni mihokorokho saya . . ." Munsuwela sai?

Munsuwela sai wira kehiyo erarance? Okhala wira eniima toranxa. Erintta ele eri saana, eyo enkhala vamwirini, masi eniima toranxa. Kehiyo ntoko ele yoopacerya.

Vano ekereja yaahimyaka wira awo "annaamini wira Yesu Kristu mmosaru nsana, olelo, ni mahiku othene," nave enakhoota Owerya Wawe, enakhoota miteko Sawe, enakhoota Masu Awe; vakhala—vakhala wira . . . Ekereja enimwaamini Yesu Kristu, enoovara miteko sa Yesu Kristu, eyo enookhalana Ekumi ya Yesu Kristu. Nto yaahikhale siiso, khenicala sinto Ekumi enoomwareela-mo, yaahikhale-ru yoothommwa, okhuma mmitathaarini, eyo enimwiima toranxa okathi wothene, wala ethu ekina yoovirikana. Masi yaari Ekumi yoothommwa, mmitathaarini, enoomukumiherya Yesu Kristu mmosaru nsana, olelo, ni mahiku othene, yakhalaru Masu anwela ettharaka Mutathaari. Yeeyo, Owo ti Mutathaari, opacerya w'okathi.

59 Nwehe, masi t'ile awo anikumihery'aya enooniherya evirikanelo aya. "Ni mihokorokho saya," Yesu ohimnye wira, "munimwaasuwela." "Khasinrukuliwa iwuuva munampirivirini," onamwi nampiriviri okhalaka vamwirini wa iwuuva. Eyo yaamuweryaneya, masi muhokorokho ene onoohimya.

Muhokorokho t'uvi? Masu, a oka- . . . muhokorokho w'okathi. Ti yeeyo ekhanle, mwiixuttiho aya. Mwiixuttiho wa xeeni? Mwiixuttiho w'okathi, okathi xeeni ula. Mwiixuttiho wa mutthu, mwiixuttiho wa muromolelo, masi, ahiso Masu a Muluku a okathi?

Vano, okathi onoovira voowaakuveya, naamuwerya okhala mwa yeeyo okathi munci-ene. Masi miyo kookupali wira muri vaava, ni kookupali wira nyuwo mulaponi mothene, munniwerya woona entthun'aka wooleelani, maana hiyo khanrina okathi munci-enexa wira nikhale mwa yeeyo.

<sup>60</sup> Masi nyuwo mwaamuwerya woona wira Mureeriho onnimukhuruwela ole ootakhala, awiixuttihi owootha, ni owiiriha wira vekeekhai yeele Muluku ohimmy'awe wira ehiire: masi awo animwiira, khula enamuna. Mwaha wa xeeni? Awo khanwerya ohiira. Vanweryaneya sai nampiriviri okhala etthu ekina woohikhala nampiriviri? Hata wira epula yooreera enimurupela sai, ohaana okhala nampiriviri. Mwaha wa yeeyo Yesu ohimmy'awe wira, "Enrowa okhala yoolikanexa yaarow'aya owootoha ale Oothanliwa," yaawo ari mmitathaarini, "vaakhanle wira yaaniweryaneya," masi khivanweryaneya. Etriku khenwerya wira hat'etthu woohikhala wiima etriku; ti yeeyo tu enwery'aya wiima.

<sup>61</sup> Nwehe. Muupuwele, Muluku kahiyo mwaneene mutthenkeso. Xetwani t'okhanle mwaneene mutthenkeso. Miyo kihooniherya eyo ni Masu, ottuli ni ohoolo, ni emaara ti emaara; nkikhanle ookela mwa yeeyo voosiis'ula. Hiyo noosuwela wira Muluku khonaatthokiheke atthu siiso, opaka mutthenkeso. Saahivira miyaakha imiya sene numala okhwa mwiixutti ookiserya, 'ehinatthi ophiyerya okhalaniwa mutthenkeso woopacerya. Okathi wothene onnooniherya okhala etthu yoovonyeya. Vaahikhale siiso, nihikhalenleni vamosa mwa ophenta olelo, Metotista, Patista, Prespiteriyana, Katolika ni sothene? Mwaha wa xeeni miteko sa Muluku ohinittharaka, nto, khula ekereja mw'etthu emosa, Masu? Itthu iyo sinimuvalaanya mutthu, oxinna. . . Hiyo nri oomurakamela Muluku sihitonko ahu okhala, ikereja, silavulaka mwaha wa.

<sup>62</sup> Vano, hiyo noohimeeriwa wira, "Itthu sothene sa khalayi siireiye ntoko ithoonyeryo, mwa wiixuttihiwa wahu, wuulumeliwa, olakiwa." Wira itthu sothene sa khalayi sa Waataana wa Khalayi saakhumelenle, saari iruku, wira noone ele yaarowa okhala mwa Waataana wa Naanaano, nihiku nahu.

Ntoko vaakhanle wira mwiira muhinatoko woona ntata nanyu, vano khuweha osulu munoona eruku vaxirini, ntoko ntata naka naarow'aya okhala voowaaryani. Naarine-ene ikatha thanu va v'erukuni (okathi epantte y'eruku), vano nyuwo khuneettiha matata anyu (eryeene y'ekeekhayi), muroihaka v'e—v'erukuni, nlo nihaana orwa va ikatha thanu.

Ntoko Bibilia sinnihimeery'awe, wira, "Waataana wa Khalayi oryeene eruku, mooniheryo wa itthu isya, wala itthu saari wira sirwe; kahi itthu sene seiyo sikhanelle, masi eyo erukuu, mooniheryo wa itthu sinoorwa."

<sup>63</sup> Nrowe nitthikele ottuli noone sinto etthu ila yaahinto okhala okathi mukina. Munnitthuna? [Muthukumano oniira, "Amen."—Mol.] Vano hiyo nnoosuwela, wira nooniherye ela, okhuma ottuli mpakha ohoolo, ni Masu; kahi ni ankhili a mutthu, muupuwelo.

Miyo khenikicala wira ti pani; khula mutthu mukina, yoomi wala mutthu ene mukina, "Owo aahilavuleke attharihaka ikano



ni maprofeta, khiwaavo Waarya mwa yoowo.” Munnona? Ti yeeyo Bibilia ohimmy’awe. “Moolumo othene a mutthu ekhale oowootha, vano Awaka ekhale ekeekhai,” voohicala wira ti pani.

<sup>64</sup> Vano nrowe nitthikele ottuli nisuwele sinto eyo yaahinto okhumelela, wira enoonihe nthoonyeryo.

Naamuwerya otthikela vano muLiivuruni mwa Okhuma, ni nimuhimye mutthu mmosa oniihaniwa Moise, yoowo aari profeta ooreerihwa oorummwa a Muluku, ni Masu a Muluku ni otthuna wa Muluku wa nloko n’awe. Okhala wira Masu a Muluku okathi wothene aneetta ekelaka ohoolo, Owo iirale, “Owo khiira hat’etthu mpakha owuupululela Eyo maprofeta Awe toko.” Vano Owo aaniira. Ah-ah.

Vano, Owo khokhanle woothaka. Owo khokhanle woothaka khukhala Muluku. Nnari, mulopwana. Owo ohaana otthikela okhala eekeekhai. Khokhanle hata wootha mwa Yoowo. Owo ti . . .

Ni Owo khokhanle oorukunxaka Eyo. Owo arukunxaru, weso Owo kahi Muluku; Owo oovonya. Owo ohaana okhala oohimala. Vano oohimala khokhanle oovonyaka. Munnona? Vano ele Muluku onihimye’awe, eyo ti yoolikana Mahiku othene. Munnona? Nto Owo oolaiherya yeeyo. Vano, nwehe, khinaavo nipuro mBibiliyani nihinkhala nittharihelaka yeeyo.

<sup>65</sup> Vano, Muluku aahimmanela natiri Abrahamu wira osuulu awe waamurowa okhala mmalapo e—elapo y’amalapo miyaakha imiya xexe, vano Owo aamurowa waakumiha ni ntata nuulupale na ikuru n’uwerya, wooniherya ithoonyeryo Sawe ni sootikiniha eriyari y’atthu awo yaakhalan’aya. Okathi wa natiri waanaattamela. Atthu yaahiliyala etthu iyo. Awo yaarina aFarisi ni aSatukhi, ni akina, miromolelo. Masi, naanaanoru, khurwa Muluku mmansawe khwaakumiha, ota, ottaiwene wa khula mmosa a awo.

Muluku khonatoko, mwa nihiku ti nihiku wala okathi p’ukathi, khonamwiihaneke profeta mmuromoleloni. Nnari, mulopwana. Owo ori oovitikeleleya, owo khaarowa owerya wira; owo aamurowa okhala ni muromolelo yoowo.

<sup>66</sup> Moise, mutthu aarummwe ni Muluku, ni Masu a Muluku, nto eettaka mukwah’awe aakuxaka atthu a Isarayeli aaroihaka muttethe wa natiri, voohivonyeya ni yooruma ya Muluku, owo aahimpwanya profeta mukina, ooreerihwa mukina aarina mureeriho wooloka wa Eroho Yowarya emosaru yaari mwa Moise. Eyo ekeekhai. Owo aari profetaa. Eroho Yowarya yaari mwa mulopwan’owo. Nsina nawe naari Palaamu. Hiyo othene noomulimalela owo. Ahe, itthu sene, imosaru seiyo, itthu—itthu saahimmy’awe mulopwan’owo, nlelo sinimwiireya, sooviraka miyaakha ikonto piili ni imiya thanu na tthaaru. “Nyuwo muri ntoko enari ya mutakhwani, O Isarayeli. Ole onrowa wooreerihani onooreerihwa. Ole onrowa wootakhalihani

onotakhalihwa. Nyuwo mwa a ikuru, ni oowerya, moota akhanly'aya axariya maxaaxa anyu, O Yakope!" Moone, owo khaawerya ohihimya. Owo aarwiiye vale alakenle-ene mmurimani mwawe waatakhalihwa atthu ale.

<sup>67</sup> Oh, nyuwo awiixuttihi oowootha mwiiwaka ifiita iya miyaakha iya sothene, ni mmoonaka Muluku olipiherya voolikaneene etthu Owo aahimmy'awe, vano nyuwo munookilaathi muskiritooriyu mwanu ni munnisuwela wira eyo Ekeekhahi; nto mwaha wa ivirikanelo sa miromolelo sanyu, nyuwo munookhootha ni waaleela atthu anyu wira khasihiyo siiso. Mootakhaliwa nyuwo! Okathi anyu ori vakhiviru.

<sup>68</sup> Palaamu, ooreerihwa ni Eroho emosaru yeeyo yaari mwa Moise. Exeeni yaavirikanne? Mwiiixuttiho wa Moise waari wooloka. Bibilia oohimya va mwa Pedru a Neili, wira waari "mwiiixuttiho wa Palaamu" Isarayeli aakhenly'awe, wira Muluku khonakhalakhale olevelelaka. Etampi yoochileveleleya! Khaavo hata mmosa w'ale ooponwe, enamwi awo yaakhumme ni iparakha sa Muluku, ni woona ntata na Muluku nivaraka muteko ni profeta ola a ikuru, ni yaahoono olipiheriwa voolikaneene ni Muluku. Nto, okhala wira, profeta mukina aahikela ni mwiiixuttiho mukina, woovirikana, khunyakulihana ni Moise, ni khweererya owooniherya atthu wira Moise aahivonya. Vano Datani, Kore, ni anci-ene aya, yaahiiryaana ni yoowo khuwiiixuttihi aana a Isarayeli oraruwasa, wira etthare mutthenkeso awe, wira, "Hiyo othene nri mmosaru."

"Hata nikhalaka aMetotista, aPatista, maPrespiteriyano, wala aPentekosite, ni ekina tho, hiyo othene nri mmosaru."

<sup>69</sup> Hiyo khanihiyo mmosaru! Nyuwo mw'atthu oovalaanyiwa, oowaarya wa Apwiya, oovahereriwa Masu ni Eroho ya Muluku, wira mooniherye mihokorokho sa natiri Awe nihiku nla. Ni nyuwo khamuhiyo a yaawo! Miyo koosuwela wira eyo ti yoolipeya, masi eyo ti Ekeekhai vekeekhai vamosaru. Oovahereriwa muteko mahiku ala ookiserya! "Mukhume eriyari aya."

<sup>70</sup> Vano, "mwiiixuttiho wa Palaamu," kahi y'ohimya y'eprofeta ya Palaamu. Eyo yaari saana. Owo aari Muluku. Akavi anaamini yeeyo? [Muthukumano oniira, "Amen."—Mol.] S'ohimya s'eprofeta sa Palaamu saari soolikana, 'okhala wira owo khaakhanle oolavulaka hat'etthu ekina. Mureeriho wa Muluku khiwaarowa olavula hat'etthu ekina, ni Muluku aahilipiherya ooniheryaka wira eyo yaari Ekeekhahi. Masi waari "mwiiixuttiho wa Palaamu."

<sup>71</sup> Vano mulikanyihe yeeyo ni Matewu 24:24. Ooreerihwa, masi mwiiixuttiho aya ti woowootha. Oraaru, ni itthu sothene ntoko seiyo, soovonyeya, soovirikana ni Kristu!

Kinroromela wira khamunisikula. Ni muhaattipihe awo, atelefooni awo. Ni muhivenye munarowa. Mukilaathi paahi

mmaale, noone sinto Eroho Yowarya khenrowa onuupululela eyo hiyo, ni wooniherya eyo wa hiyo. Nyuwo muniira, “Masi eyo. . .” Paahi khula etthu nyuwo munaamini anyu, mukilaathi paahi nwiriyane. Ni munvekele Muluku wira otthukule murim’anyu, vano munoosuwela nyuwo mwaari nampiriviri, wala mwiiwa, wala khula vatthu munlip’anyu. Munnona?

<sup>72</sup> Vano, hata Yuta, “owo aari ootthomeliwa olamuliwa khalayi-ene,” okilanthi-ene vale ohoolo wa Yesu. Ni Yesu aahimuleela, “Nyuwo mwa yoowo. Hata wira munrowa wira exeeni, ni hata wira murina wira exeeni, murowe mwiire voowaakuva.” Owo asuwelaka etthu iir’awe, masi, mwaha wa musurukhu miloko miraru wa eparatha, ni osuweliwa, khimutumiha Pwiya Yesu Kristu. Mmosa a arummwa Awe, mulipa oosuka musurukhu wa mukereja, Yesu aamwiihanne okhala “mpatthani” Awe. Munnona? Bibilia ohimnye wira, “Owo aayariwe wira okhale mwaana a orimeela,” voolikane-ene ntoko Yesu aayariw’awe Mwaana a Muluku. “Yaamuwoototha ale Oothanliwa vaakhanle wira vaaniweryaneya.”

<sup>73</sup> Nwehe oratteene okathi onrow’ahu ohoolo nisomaka. Nnoorowa okuxa nthoonyeryo nikina, muLiivuruni mwa Mamwene. Aahikhala pro—profeta mmosa, nto nsina nawe aari Mikaya. Owo aari mwaana a Yimula, ni owo aari profeta. Owo aari yoowo.

Ni aahikhala profeta mukina, muru wa mutthenkeso wa maprofeta, ooreerihwa. Bibilia ohimnye wira awo yaari “maprofeta,” voolikana-ene ntoko Owo sihimmy’awe wira Palaamu aari profeta, ooreerihwa.

Ni aahikhala mmosa a awo iihaniwa Mikaya, yoowo aari ooreerihwa ni Muluku ni oorummwa ni Muluku, ni Masu a Muluku.

Aahikhala mmosa, Sitikiya, oona wira aari oorummwa ni Muluku. Owo aari ooreerihwa a Muluku, masi mwiixuttiho awe waari woovirikana ni Masu a Muluku. “Anookhumelela, aKristu oowootha, animooniherya ithoonyeryo suulupale, saarowa oowootha ale Oothanliwa vaakhanle wira vaaniweryaneya.”

<sup>74</sup> Nwehe, oowaili aya, oowaili aya ooreerihwa. Vano, vaaweryaneya sai omuhimya ole aari eekeekhai, ni oovonya? Nwehe etthu Masu yaamuhimenry’aya Akhabi. Profeta aari ohoolo wawe, yoowo aari Eliya, mmosa a maprofeta aalupalexa a okathi, aari profeta oolipiheriwa. Profeta ole oolipiheriwa iirale, wira, “Okhala wira Akhabi aarimwiira yootakhal’ela, wira alapwa yaamurowa olata ephome awe; mwaha w’okumiha ekumi ya Napothi. Ni wira alapwa yaamurowa omukhuura Yezabeli, ni e. . .erutthu awe yaarowa okhala eturumu mmatta.” Vano, vanweryaneya sai oreeriha etthu Muluku otakhalinh’awe? Wala vanweryaneya sai otakhalihwa, ntoko Palaamu saahimmy’awe, etthu Muluku oreerinh’awe? Munnona?

Masi maprofeta ala yaari anaxariya. Vekeekhai awo yaarisa atthu ooreera murima, atthu oottittimiheya. Maana, wira mukhale profeta oIsarayeli, muhaana okhala mutthu oottittimiheya, wala hata wira mukhale mwIsarayeli. Mwaamuvonyiwa ni maluku, mwaahikhale. Awo yaari atthu oottittimiheya. Awo yaari atthu oosuwela. Awo yaari atthu oosoma. Awo yaari oothanliwa a Akhabi, a mmuttettheni. (Munnoona yeeyo, Munna Wright?) Oothanliwa a mmuttettheni, oophwanela saana o par- . . .

<sup>75</sup> Nto vano, okathi Mikaya oonaly'awe yoowoon'awe, owo aahisuwela mmurimani mw'awe etthu Masu yaahimmy'aya, masi owo aatthuna woona etthu Eroho yaari mwa yoowo yaarow'aya ohimya.

Vano atthu khimuleela, awo khwira, “Nyuwo muhimyeke etthu emosaru maprofeta ala akina anihimy'aya. Nto mwiira vale, vano, nyuwo munookhala, hiyo nnimookupalini, moopatthanani-tho, vekeekhai. Munnona? Hiyo nnimookhalihani mmosa a hiyo. Hiyo nnootthikela wookelihani mmuromoleloni mwahu. Nyuwo mwa. . . Hiyo noosuwela wira nyuwo mwa profetaa, masi okathi wothene nyuwo munihimya itthu sootakhaliha. Nyuwo okathi wothene munoomutakhaliha Akhabi. Vano, Sitikiya, mulopwana mukhulupale, paapa, ahiso mu. . .” etthu p'itthu aary'awe. “Vano owo oomureeraha Akhabi, khimuleela, 'Murowe mwiire.' Vano nyuwo muhimyeke etthu emosaru, Yimula. Vano, mwa mutthu oohaawa paahi. Khamurina hata muthukumano, hata mmosa, nakhala. Vano amiravo ala aakhalanasa imilyawu sene. Elapo yothene enaakhaliherya yaawo. Vano nyuwo muhimyeke etthu emosaru awo anihimy'aya, nkoonani enrow'anyu wira, nyuwo muno—munimoolya muhakhu wa mulaponi.” Owo onlavula ni mutthu oovonyeya vo!

<sup>76</sup> Ankhi yaahimmwale wira, “Nyuwo munniwerya ophwanya nthowa mwa Sitikiya, Mikaya?”

“Nnari.”

“Mwaahinto omuphwanya iiraka etampi?”

“Nnari.”

“Mwaahinto omwiiwa owo omutakhalihaka mutthu?”

“Nnari.”

“Mwaahinto omuphwanya ohapaliwe-ene?”

“Nnari.”

“Munniwerya okohakoha osoma wawe?”

“Nnari.”

“Mookupali wira osoma wawe wa etotori ti woowootha?”

“Nnari.”

“Nyuwo mookupali wira yawawe—Ph.D. awe t'olikana?”

“Vekeekhai. Ni mwaataano wa muSineetriyu, miyo kinoona wira owo wothene . . . mwaataano, kinoona wira ti woolikana.”

“Ahe, nto, muhiniitakanxelani ni yoowo?”

“Okhala wira owo oroohiya Masu!”

<sup>77</sup> Ahe, nnookhala mooniheryo wa yeela, nto, ntoko Eliya profeta ela ehinatthi. Ni nyuwo mwaari mwaana a Muluku, munookhala ni profeta a Bibilia ola. Ti Masu. Nkawehani okathi ene, ehuhu.

<sup>78</sup> Ahe, ankhi Sitikiya iirale wira, “Oh, miyo koosuwela wira profeta oohimya eyo, masi eyo ti ya nloko nnoorwa. Eyo ti y’okathi munci-ene onoorwa okhuma vano?”

Owo iirale, “Nwehererye mpakha koone yoowoona enikhuma wa Muluku, nto vo kinimooleelani.”

Khwira, “Vano nyuwo munihimya etthu emosaru?”

Owo khwira, “Miyo kinoohimya paahi ele Muluku enihimya’awe; hat’etthu ekina, hat’etthu tho. Nkikhanle oowincereryaka nuulumo nimosa mwa Yeeyo, wala okumiha Nuulumo nimosa mwa Yeeyo.”

Vano ohiy’ule, avekelaka, Apwiya khimurweela mwa yoowoona. Owo khikhuma voosisu aya, owo khwira . . .

Aakhala maprofeta aili!

<sup>79</sup> Mutthu muulupalexa a mulaponi, vamaithoni wa muttitthi w’anakhotto ni a elapo, aari Sitikiya. Owo aari profeta mukhulupale, wa mwene. Owo aari mukhulupale a maprofeta othene, mwa mutthenkeso. Owo aakhalihiwe, ni mutthenkeso awe, mukhulupale a yaawo othene; alakela a esomelo yooreerexa, oosoma oratteenexa, oophwanelaxa muteko. Ni owo aari ooreerihwa ni Eroho Yowarya, maana owo onihaniwa “profeta.” Vekeekhai, kahi profeta pure paahi, owo aari profeta muHeperi. Vano munwehe.

<sup>80</sup> Sitikiya khwira, “Apwiya aalavula ni miyo, ‘Mukipakele inyaka iya piili sa yuuma,’ ekanyeryo.” Profeta voolimaleleya onlavula ni ikanyeryo. “Owo khwira, ‘Mpake inyaka iya piili sa yuuma.’ Eroho Yowarya yookileela, ‘Mukuxe iya,’ Mureeriho okivan’he eparakha.” Mhuupuwelele eyo ntoko mukuttho, masi wira niphiererye vatthu. “Eroho Yowarya enlavula ilavulelo mwa miyo, Ole okilipihenrye, Owo ohimnye wira, ‘Mukuxe inyaka iya, nto, ni yeela, mmulele mwene wira onoowoomolela aSiriya ota wa muttethe. Ni miyo kinoomuhokoloxerya elapo eri ya Isarayeli mwa ihakhi sawe, ekereja.”

Munna, eyo ti yoophaveleyaxa, ntoko Palaamu aary’awe osulu nno. Palaamu aalavula voophaveleyaxa ntoko Moise. Moise . . . Nummuro noolikana na Muluku ti naneethanu n’eili. Nto Palaamu iirale, “Mukitekele altari athanu n’aali; mikuttho mithanu na miili sooloka, amwaanyompe, ni

amwaapwittipwitthi athanu n'aili." Eyo ehimyaka orwa wa Mwaana a Muluku. Voophaveleya, owo aari oratte-ene ntoko khula mmosa a yaawo.

<sup>81</sup> Nto va ti Sitikiya, oratte-ene voophaveleyaxa, "Maana elapo ela ti yawihu. Vano, aSiriya ale ni aFilisti ari iwe esarihaka irukulu saya, s'ana aya ni sikina, nwanan'ihu, ni yolya enaahaleela an'ihu! Okathi, Muluku onivanhe-ene elapo ela!"

Munna, nlo nuulumo nooreera. Miyo kinoona wira owo aaniwerya ohimya eyo iituperyaka ohoolo w'atthu a Isarayeli, ni awo yaaniwerya okhuwela voviituperya ntoko saawery'aya. Vano, miyo kinihimya mwaha w'olelo vano. Miyo kinwehererya wira munnikitthara. Onyakula wothene, okhuwela!

<sup>82</sup> Nyuwo munnimuupuwela Davidi Ettiminku evinre? Munnona? Nyuwo ota iwo muninwiriyaana raatiyu, wala olikariwa nno wa telefooni; vakhala wira khamwiiwale Mutthaka w'Ettiminku evinre, mwiiwaxaxe ola. *Weererya Omwarela Muteko Muluku Muhirummwe wira Nvare*, hata okhala wa xariya, wooreera, owo vekeekhai khonaakheliwa ni Muluku. Munnona?

Vano, va aari Sitikiya, oonaka wira aahikhalana exariya.

<sup>83</sup> Mikaya khwira, "Mukihiye kimukohe Muluku." Vano owo khurwa voosiisu aya ni SIISO ANIHIMYA T'APWIYA. Owo aaroolikanyiha yoowoona awe ni Masu.

<sup>84</sup> Vano vaakhanle wira owo aamuleenle Sitikiya, "Nyuwo moosuwela etthu profeta a mBibiliani mu ehimmy'awe wira enoomukhumelela mutth'ula?"

<sup>85</sup> "Masi kahi ekwaha yeela, okhala wira mulopwan'ola mulopwana oottittimiheya. Owo oneererya." Muhivonye wiiwa ela. "Owo oneererya ohokoloxerya ekereja itthu siri sa ekereja. Owo oneererya ohokoloxerya exavo aya," kahi itthu sa Erooho; vaakhanleru siiso, owo aamuttikinya elapo ele yothene ntoko Eliya siiraly'awe. Masi, eereryaka waavaha itthu s'erutthu, "Hiyo nookhalana exavo. Hiyo na mutthenkeso muulupale. Hiyo nniira mpannta wa yeeyo. Hiyo othene, nyuwo atthu othene, nyuwo maPrustante, mwaahaana othene anyu wiitakanxa ni hiyo." Ah-hah.

Nnoophiyerya yeeyo okathi vakhani. "Mwa khula enamuna, hiyo n'axinna alopwana n'athiyana." Kahi yeeyo! Khenakhaleke ni khenrowa okhala, ni Ekereja yooloka ya Muluku. Khenikhala!

<sup>86</sup> Nwehe, owo aahikhalana yoowoona. Nto siiso owo khwira, "Muluku oolavula ni miyo." Vano, nkawehani, mulopwan'owo aari naxariya. Owo iirale, "Owo iirale, 'Mpake inyaka iya, nto murowe mpakha iwe ohoolo wa mwene murowe mpakha onikela nsuwa,'" wala vatthu ti vatthu elapo eyo yaaphwanyaney'aya okhuma vatthu awo yaaris'aya. "Rowakani, nto eyo enrowa

okhala SIISO ANIHIMYA T'APWIYA, wira owo onoorowa ophwanya oxintta ni onoohokolowa, oxintta wa ekereja.' Onoorowa owoomola!" Eyo eri vakhiviru, khekhanle? Mulattu ene waari exeeni?

Va khurwa Mikaya. Khwira, "Vano nyuwo muhimye y'eprofeta anyu."

<sup>87</sup> "Rowakani ohoolo! Masi miyo koomoona Isarayeli ntoko ipwittipwitthi, soomwaramwareya, sibirina makhampusi." Wau! Vekeekhai voovirikana.

<sup>88</sup> Vano, nyuwo ti mukhanle muthukumano. Vano t'uvi orina exariya? Oowaili aya, maprofeta. Enamuna emosa paahi vanweryaney'aya ohimya vavirikanans'aya, ti, waalikanyiha ni Masu.

Khwira, "Munsuwela sai yeela?"

Owo khwira, "Miyo koomoona Muluku okilanthi-ene Veehiceni." Khwira, "Kihoona muttitthi wothene omurukurenrye-ene Yoowo."

<sup>89</sup> Vano muupuwele, Sitikiya aammalaru ohimya wira aahimoona Muluku, nave, ni Eroho emosaru. "Miyo koomoona Muluku. Owo okileenle wira kipake inyaka iya sa—sa yuuma. Orowa iwe woomola maloko ale mu, maana ela ti yawihu. Akina kharina ehakhi mmo." Awo yaamukhalana vaakhanle wira yaahikhala oratteene ni Muluku. Awo yaamukhalana eyo, masi awo yaaroomuhiya Muluku.

Ti siiso mutthenkeso oryaaya, ekereja. Ehaana ehakhi ya itthu iya, masi murimwaakhiwa, okhala wira murookhuma khuhiya Masu a Muluku ni Eroho ya Muluku, mureeriho, wira olupiherye Masu a okathi. Muhivonye wiiwa Mutthak'ola.

<sup>90</sup> Nwehe etthu yaakhumelenle vano. Owo iirale, "Miyo koomoona Muluku," Mikaya aahimoona, "okilanthi-ene Veehiceni Wirimu. Muttitthi Awe waaroothukumana omurukurenrye-ene Yoowo. Owo khwira, 'T'ani onrow'ahu onwerya wira akhuruwe amootothe Akhabi, wira nikhalihe Masu a Eliya eekeekhai, profeta Aka aalipiheriwe. Miyo kaahihimya wira owo aamoowa. Ni Eliya aarina Masu Aka. Nto erimu ni elapo ya vathi sinoomala, masi Masu Aka khanivonya. Nkincala moota xeeni atthu akhanly'aya a emwaavano, wala oreera murima xeeni awo anikhal'aya, wala moota xeeni awo ansom'aya, wala wunnuwa xeeni awo anikhal'aya, Masu Aka khankhalakhala evonyaka.'

"Vano erooho yoowootha khikhuma wookhwaani, khukokhora, khwira, 'Nyuwo mwakitthuniherya paahi, miyo kinoowerya waavaha ale mureeriho aka, owiiriha awo opaka muthinto mmosa wa ethoonyeryo wala mutikiniho, vakhalaru wira kinimwaahiiha Masu. Owo khonrowa hata osuwela wira Awo Masu Anyu. Owo onoothanya, mwaha

wa osuweliwa.” Munna, okathi khovirikanne. Munna Neville, ekeekhaii. Muupuwele, eyo ekeekhaii. “Miyο kinoomukhuruwela, kimwiirihe opaka itthu seiyo ale akina ampak’aya. Kinoomuhimiha s’eprofeta, ni wootha.” Yaakhala sai wootha? Okhala wira yaari yoovirikana ni Masu.

<sup>91</sup> Nyuwo mwakuxa khula mmosa wa opatiiso ula woowoothiwa, *lexe ni lexe ni lexe* oowoothasa, khenikicala moota xeeni enikhala’aya ntoko y’ekeekhai, moota xeeni awo aneerery’aya otakiha, onikhala wootha yakhalaru yoovirikana ni Masu a Muluku a okathi ula. Vekeekhai.

Nyuwo muniira, “Ahe, awihu, ahe, hiyo nihiira *ela*, ni ninniira *ela*, ni ekereja ahu ti y’enamuna *ela n’ile*.”

Miyο khenikicala etthu xeeni. Yakhalaru yoovirikana ni Masu oolempwa a okathi ula, onikhala wootha. Muluku khonrowa okhalana naata n’iyo, khenikicala ekhalaka vaxariya, yoosomihiwa, yoosuwela, hata ekhalaka ntoko y’ekeekhai, hata ekhalaka ntoko yoothokeleleya, yakhalaru yoovirikana ni Masu a okathi ula. Hiyo nnookela mwa yeeyo muhinaxa mwa minuutu vakhani, okathi wanitthuniherya vale. Naahikele, nnoolavulatho olelo ohiyu.

<sup>92</sup> Nwehe, owo aari a exariya, mutthu ooreera murima, vekeekhai. Vano owo khwira . . . Nto, ahiso, Mikaya khumwiirela owo, kahi ohoolo wawe wene, masi mwa moolomo makina, “Nyuwo mureerihiwe n’irooho yoowootha.” Eyo khiyaarowa okhala etthu y’omuleela pixipu? Masi owo aahiira.

<sup>93</sup> Vano nto pixipu ula khurwa khwira, “Nyuwo khamunrowatho okhalana oxirikha,” vano khunvaha nlaathuma mphatamaru. Khwira, “Nyuwo moosuwela wira miyo ka mutthu oolipihiriwa. Ekereja aka yookikhaliha mukhulupale aya, etthu ila. Mwaathanle a atthu othene a Muluku ookikhaliha yeela. Mutthenkeso aka wookikhaliha yeela. Ni Muluku oonivaha elapo ela, ni Owo t’utthuna Wawe wira ekhale yawihu. Ni miyo kookhalana SIISO ANIHIMYA T’APWIYA.” Khunvaha nlaathuma, khwira, “Eronwe vai Eroho ya Muluku okathi Eyo ekihin’ye aya?”

<sup>94</sup> Mikaya khwira, “Munoosuwela, mwa nihiku nlo,” okathi California onrow’aya okhala vathi v’ephareya wu, ni itthu iya sothene. Munnona? “Munimoona ephiro xeeni Eyo eronw’aya, okathi onrow’anyu okhala muhina mwa ikalapooso.”

<sup>95</sup> Vano, Akhabi, munrowa ohimya exeeni? “Miyο kinnimwaamini profeta aka,” owo khuhimya. Ankhi owo aawehawen’he Masu paahi? Moone, owo khaatthuna wiisoona otakhalihiwa. Mukiiwe miyo! Owo khaatthuna wiisoona otakhalihiwa. Khaavo mutthu ontthuna.

Nto mutthenke-. . .munna a mmutthenkesoni, owo t’ori mulattu ni nyuwo. Nyuwo munthuna muupuweleke wira mookhalana exariya, musuwelaka mmurimani mwanyu, wira,



mwaapatisaka muromolaka masina a “Tithi, Mwaana, Eroho Yowarya,” nyuwo munimootha. Nyuwo moosuwela wira mwaahi-. . .mwaahimyaka itthu iyo muniiraanyu, ni okuxa iyooniheryo soopacerya, ni itthu sothene siiso, moovonya. Enweryaneya sai eyooniheryo yoopacerya okhala olavula ilavulelo, vano nto n’ulavula voovirikana ni natiri a Muluku okathi ula? Enweryaneya sai okhala? Nyuwo khamuntthuna otakhaliwa, munnitthuna? Masi *Mu* yoolempwa, enookhala siiso. Eyo ti ekanyeryo ya nxeni, yoolikanexa yaarow’aya owoototha ale Oothanliwa vaakhanle wira vaaniweryaneya.

<sup>96</sup> Khula ethoonyeryo, khula mutikiniho, mutthu ooreerihiwa, oprofeta, khula enamuna sa itthu sinkhumelela; inamuna sothene sa ithoonyeryo, inamuna sothene sa mitikiniho, munrowa ohimya sai evirikanelo aya? Nkawehani Masu a okathi ula. Ti siiso nyuwo munikux’anyu. . .

<sup>97</sup> Nkanweheni Moise, moota aakhanly’awe oomuleelaka Palaamu. Nkanweheni Mikaya va, nisuwenle sai wira owo aahikhalana exariya? Masu, owo ohinatthi, yaahimuhimerya yeeyo Akhabi.

Vano Masu, hiyo nihinatthi, yaahihimya mwaha wa mitthenkeso iya sa mahiku ala, ni otakhaliwa nno mwa seiyo. Ni itthu saarowa okhumelela ni Ekereja Awe yooreerihiwa vekeekhai, enookhalana Masu, Mwaakameliwa Masu. Hiyo nri va. Ela eri va, olelo, ntoko saary’aya okathi ule.

<sup>98</sup> Bibilia ohimye wira, “N’anamoona aili wala araru moolumo othene anookhala oolipiheriwa.” Miyo koomulavula Palaamu, koomulavula Palaamu ni Moise. Ni koomulavula vano Mikaya ni Sitikiya. Vano kinrowa omuhimya-tho mmosa. Wira, aakhala imiya sene, masi mmosa tho, wira ekhale anamoona araru. Miyo kookhalana anci-ene oolempwa va; masi wira nihikuxe okathi.

<sup>99</sup> Yeremiya yoowo aari oolipiheriwa, ookhoottiwa, masi profeta oolipiheriwa a Muluku. Awo yaanimunyokha mulopwan’owo. Awo yaanimurihelela soohi-. . .mihokorokho soowuntta, ni itthu sothene sikina. Vano owo khwaaromolela otakhaliwa awo. Ni itthu owo iiraly’awe, nto khummaathi vale n’iparari sawe, ni itthu, ni khooniherya ithoonyeryo wira Isarayeli aahivonya.

Khula profeta, profeta eekeekhai otonko okhumelela mulaponi, aahitakhaliha mitthenkeso iyo sa miromolelo sa ekereja. Yaarowa ovirikana sai, ni Muluku ohinrukunuwa?

<sup>100</sup> Eroho Yowarya ti Profeta a okathi ula; Eyo enlipiherya Masu Awe, yooniheryaka Yaawo. Eroho Yowarya yaari Profeta a okathi wa Moise. Eroho Yowarya yaari Profeta a okathi wa Mikaya. Eroho Yowarya, yeeyo elempa Masu, enimoorwa n’ulipiherya Masu.

<sup>101</sup> Vano exeeni yaakhumelenle okathi wa Mikaya? Akhabi aahiwiwa, vano alapwa khulata ephome awe, ettharihaka Masu a Muluku.

Nyuwo othene awiixuttihi oowootha, siiso onihimya ti Muluku, nihiku nlo munoohepha ele enaal'anyu, nyuwo oohoona muniweettiha alipa-oohoona! Miyo nkinanariwe. Miyo kinooleelani Ekeekhai paahi. Ni miyo nkaakhanle oohimya ela vaakhanle wira osulu nno, mpaani mme, Eroho Yowarya yaahaahimye wira, "Muhimye siiso." Kaahinto wooleelani etthu yoovonyeya ehikhanle wira Muluku ohooniherya okhala ekeekhai? Nvenye, axinn'aka, vahinatthi otepa oxa!

<sup>102</sup> Masi mukihiye kihimye ela. Vaarowa oweryaneya sai mwiiwa ovenya khukhala nthakathaka, othomeliwe-ene yeeyo? Vaarowa oweryaneya sai Oothanliwa ohoona eyo? Okhala wira, nyuwo moothanliwa wira moone. "Othene ale Atithi akivanh'aya animoorwa," ohimye ti Yesu, "masi khaavo mmosa onwerya orwa ohikhanle wira Awo arookivaha ohinatthi opattuxiwa olumwenku, okathi masina aya yaaheliw'aya muLiivuruni mw'Ekumi ya Mwaapwittipwitthi," kahi mukhulupale a mukereja, masi muLiivuruni, Eliivuru y'Ekumi ya Mwaapwittitthi.

<sup>103</sup> Nwehe, Yeremiya aahivenya, oolipiheriwa ohoolo w'atthu, nnakhala vo awo yaanimunyokha.

<sup>104</sup> Vano nto awo khikhuma khupaka muritti, owo khupaka, khuhela muxikoni mw'awe, nto khurowa ohoolo w'atthu. Awo khwira, "Oh, hiyo n'atthu aalupale a Muluku. Vano, hiyo na Isarayeli. Hiyo n'anaxariya mpaani mw'ahu m'othukumana! Hiyo ninnirowa khula Ettiminku, hiyo, hiyo ninnivaha mikuttho, ni hiyo nninniruuha-mo musurukhu ahu. Vanweryaneya sai Napukutonosori ohihya itthu sooreera sa Muluku?" Hah! Itampi sanyu ti siirale eyo.

Muluku ohimye wira, "Mwaattharaka sooruma Saka, Miyo nkiniira ela. Masi, mwaahitthare, eyo enimookhumelelani." Eyo ekeekhai tu. Nlelo emosaru. Mutthare sooruma Sawe, Masu Awe a okathi, yaawo Owo aahimmy'awe.

<sup>105</sup> Vano nwehe. Vano, Yeremiya, n'utthuna wa Muluku, profeta oolipiheriwa, enamwi aanyokhiwa...Khula mmosa a yaawo aaninyokhiwa mahiku aya. Awo yaahiira itthu sootikiniha soovirikana ni muromolelo wa mahiku ale, atthu othene yaanimunyokha, hata mamwene ni itthu sothene sikina. Tivo owo khikuxa mu—muritti muxikoni mw'awe, khwira, "SIISO ANIHIMYA T'APWIYA. Awo anoorowa okhalasa ohitto iwe miyaakha miloko mithanu na miili," 'okhala wira owo aanisuwela sana Masu a Muluku. "Miyaakha miloko mithanu na miili!"

<sup>106</sup> Vano Ananiya, Ananiya, kinoona wira enihimmwa, A-n-a-n-i-y-a. Ananiya, profeta eriyari y'atthu, khurwa, khikumiha

muritti muxikoni mwa Yeremiya, khuntakasa. Nto khwira, wira okhale muulupale eriyari y'atthu, moone, okathi owo aalavul'awe voovirikana ni Masu a Muluku. Nto owo khwira, "Miyaakha miili awo anoohokolowa. SIISO ANIHIMYA T'APWIYA."

Maprofeta aili ooreerihwa. Yaari sai evirikanelo yaaworu? Mmosa aalavunle Masu, nto mukina khaalavunle. Yeremiya khwira, "Amen."

<sup>107</sup> Ohoolo w'ahumu othene ni muthukumano, Isarayeli othene, moone, owo aatthuna wooniherya wira aaniwerya okhala muulupale ntoko Yeremiya. "Nyuwo moosuwela wira awo khansiveliwa ni nyuwo, mwa khula enamuna. Vano miyo ka profeta, nave. Miyo ka profeta woovikanani nyuwo, okhala wira nyuwo munihimya etthu yoowootha. Nyuwo munikileela wira athu a Muluku anrowa okhala vathi va etthu *khata-khata*?"

Ti yeeyo awo anihimya'aya olelo, masi nyuwo munoorowa okhala weiwo vamosaru, ntoko ekereja. Nyuwo mootakhaliwa ni etakhaleliwo. Nyuwo ikereja sothene, miromolelo munipharelela ilimalelo sanyu s'atthu ohiya Masu a Muluku, nyuwo mootakhalihiwa ni Muluku.

<sup>108</sup> Vano nwehe, owo onoorwa va. Ananiya khukumihya muritti ula muxikoni mwa owo, ekanyeryo ya Muluku, khuntakasa, khwira, "SIISO ANIHIMYA T'APWIYA. Miyaakha miili awo anoohokolowa." Wira iisooniherye paahi, "Miyo ka *Lexe ni lexe*." Okhala wira owo aahikhoota, owo aari profeta a mutthenkeso.

<sup>109</sup> Yeremiya aari mutthu a mothakoni aakhala meekh'awe. Owo aanaalaleerya sootakhala okathi wothene, 'okhala wira awo yaari ootakhala.

Vano mulopwan'ola aahimeerya wira, "Oh, nyuwo muri sana vakhalaru wira muniira mpantta. Vakhalaru wira mw'atthu a Isarayeli, ti yeeyo entthuneya tu. Moone, nyuwo, hiyo. . . Muluku khonrowa wira eyo. Koosuwela wira yookhala etthu yaamukhaani ekhumelenle va, masi muhoove, muhituthuwe."

Oh, munna, awo nlelo annikhala olelo. "Muhixanke, itthu sothene siri sana. Hiyo ninnikhapelela itthu sothene. Hiyo na Ekerejaa." Muhupuwele yeeyo. Ayo.

<sup>110</sup> Vano owo khwira, "Sothene siri sana. Awo anoohokolowa muhina mwa miyaakha miili. Eyo etthu yaamukhaani ekhumelenle. Kehiyo hat'etthu yootikiniha. Hiyo nookhalana eyo. Napukutonosori t'orwiye va paahi, masi Muluku ahu onookhapelela yothene ela."

Masi Masu yaahimye wira awo yaarowa okhala iwe miyaakha miloko mithanu na miili; mpakha nloko nle omalamala, ni nloko nikina. Miyaakha miloko mixexe nikhala nloko nimosa. "Awo maloko oophiyaka maili

nyuwo munrow'anyu okhala wu." Ni Yeremiya aahimye eyo ottharihaka Masu a Muluku.

<sup>111</sup> Ananiya khuntakasa eyo! Yeremiya khwira, "Vaareera. Amen. Masi, Ananiya, nrowe nuupuwele ela, hiyo oowaili na maprofeta. Hiyo n'arumeyii."

Ni miyo kinimooleelani, munn'aka. Nrowe nuupuwele wira yaahikhala maprofeta hiyo nihinatthi, n'awo yaahihimya s'eprofeta evirikanyihaka omwene, ni awo yaahihimya s'eprofeta evirikanyihaka itthu kamosa-kamosa. Masi, muupuwele, okathi profeta aahimy'awe etthu, owo aahaana ohimya ottharihaka Masu. Ntoko Mikaya, ni Moise, ni othene aya akina. Ehaana otthariha Masu. Yaahikhale, vano muupuwele etthu yaakhumelenle.

<sup>112</sup> Vano, Ananiya, otikinihiwa wawe wa xariya khuvenya. "Miyo ka Ananiya" (vekeekhai), "profeta a Apwiya, vano miyo kiniira, 'Miyaakha miili.'" Mwa moolumo makina, "Miyo nkincala ele Masu anihimya'aya." Mureeriho awe, "Miyo kiniira, 'Miyaakha miili, awo anoohokolowa.'"

<sup>113</sup> Yeremiya khikhuma ohoolo wawe, khurowa, khwira, "Pwiya, miyo khenikicala etthu owo ohimya'awe, miyo nlelo kinnaamini ni kinnisuwela wira Masu awo anihimya siiso. Miyo kinookhala oororomeleya wa Nyuwo. Miyo nkinrowa wootthiwa n'ule."

<sup>114</sup> Muluku khwira, "Rowani mwanleele Ananiya wira, 'Miyo kinoopaka wa yuuma, muritti onttharelana.'" Okhala wira owo ohiira eyo, owo khikumihwa mulaponi, Ananiya aahikumihwa, mwaakha ene yoolo.

Iyo vo ithoonyeryo sahu, oowaili maprofeta. Aakhala-tho anci-ene naakhanly'ahu oowaahimya okathi yoola.

<sup>115</sup> Masi nwehe. Yesu oohimya, wira, okathi ula wookiserya, tho, irooho soopiili saarowa okhala soolikanexa tho. Eyo ekeekhai? [Muthukumano oniira, "Amen."—Mol.] Vano nwehe. Sinrowa okhala soolattanexa ovikana saary'aya okathi ule. Ola okathi wookiserya. Oh, aana! Muluku animorele ikharari! Mpakha, "Yaarowa okhala yoolattanexa mpakha yaarow'aya owootha ale Oothanliwa vaaweryaneya." Vano nyuwo munrowa sai... hiyo naahiyaniha sai mahiku ale? Munrowa ohiyaniha sai olelo? Enamuna emosaru, mukhale ni Masu, "Yesu Kristu mmosaru nsana, olelo, ni mahiku othene."

Vano mutthokelele Mutthak'ola wothene. Ni mwaiwa vale efiita, hata khino kiira kironwe-ene vale nihiku nlo Apwiya yamaliharuru muteko aya ni miyo elapo ya vathi va, nyuwo mutokose yoola tho. Mwiiwe nsu naka, etthu miyo enooleel'akani. Awo yakikuxa vale ehinatthi Orwa, muupuwele paahi, miyo kilavunle ni nyuwo mwa Nsina n'Apwiya, ni Masu a Apwiya. Ayo.

116 Nwehe, “Saarowa okhala soolattanexa saarow’aya owoototha ale Oothanliwa vaakhanle wira vaaniweryaneya,” yaamurowa opaka ithoonyeryo imosaru, miiriirya mimosaru, ni Eroho emosaru. Eyo ekeekhahi? [Muthukumano oniira, “Amen.”—Mol.] Ntoko maprofeta nimanly’ahu waahimya, maprofeta. Vano, yoolempwa-tho . . .

117 Nrowe nikhunle vaavo, wa yoola, mwatthuna vale, Timoteyo Aneili 3. Nihimuhiye ola. Ni miyo nkinthuna o . . .

118 Miyo kiniweha eroroco ele osulu iwe, ni miyo—miyo kintthuna kiihiye epantte yuulupale ya yeela, ni kinoona wira nihiire naanaano va. Munnona? Nwehe. Pahi . . . Vakhala wira kirimweemela va, kiviheriwaka ntoko siryaaka, moone, masi kootteeliwa murima. Ni koosuwela wira ela ekeekhahi. Timoteyo Aneili 3:8.

119 Paulo, mutthu yoole ohimye wira, “Vakhala wira Nlaikha nnimoorwa okhuma Wirimu khiyooleelani moolumo makina ohiya ala kooleenly’akani, atakhaliwe,” vano, Nlaikha okhuruwa. Awo ti aTesalonika Aneili . . . Oh, kinoona othunku.

120 Nkawahani mwa Timoteyo Aneili 3:8. Nkanweheni Paulo alavulaka vano. Nrowe nipacerye okhuma . . . Nipacerye eversiikulu yoopacerya, nto nwiriyanane vano oratteenexa. Nyuwo murina Bibilia anyu, mmusome ni miyo. Nyuwo muhirina Bibilia anyu, nwiriyanane oratteene. E . . .

*Musuweleke-tho wira, mahiku ookiserya . . .*

Mukwerethe eyo, “mahiku ookiserya.” Owo p’ukathi enrow’aya wiiraneya.

*. . . onimoorwa okathi w’oxanka.* (Hiyo nri mwa yoowo.)

*Okhala wira anookhala atthu anrowa wiiphentaka mmansaya, a milili, oowiittotopa, oowisoona, ooveeha, oohiwiwelela axitiithi aya, oohixukhuru, oohimuttittimiha Muluku,*

121 Nkawahani nikhuru nla hiyo nrin’ahu olelo, oowunttasa. Hata mwa axilopwana mphironi mmo, aximiravo, akuruxelaka maihi aya vathi owiitho waya, ntoko maroso ntoko muthiyana. Ohononeya! aSotoma!

122 Nyuwo moosoma mwaakh’ola, *Reader’s Digest* a mweeri ula? Ehimye wira, “Atthu a wAmerika a munnuwelo wa,” yaawo kuupuwel’aka wira ti yaari, “eriyari ya miyaakha miloko miili ni miloko miili ni mithanu, ari ni mukhalelo aya wa munnuwelo wa eriyari.” Awo aalamala! Awo ahinttasa! Siensiya onihimya yeeyo, wira mulopwana a munnuwelo awe w’eriyari, ni muthiyana, amphiya arineene miyaakha saya miloko miili soopacerya. Erutthu aya ti yowuntta ni yoovahereriwa soonanara.

123 Oh, Amerika, imaara kavi Muluku otthunn'awe woophuramwelani, masi vano okathi anyu woophiya! Nyuwo munihoolela olumwenku mwa soonanara.

*. . . ooveeha, oohiwiivelela axitiithi aya,  
oohixukhuru, oohimuttittimiha Muluku,*

*Atthu oohiphenta, . . .*

Nnakhala ophentana wekeekhai mmosa ni mukhw'awe, mulopwana ni muthiyana, muthiyana ni mulopwana. "Hata ophentana w'ephattu." Onanara, v'ekhapa!

*. . . oohaataaniheya, oowootherya akhw'aya,  
oohisumaaliha, ootakhala mirima, ni awanani a atthu  
ooreera murima,*

Mwa moolumo makina, aniira, "Nyuwo nikhuru na masantu oophirikeya." Mutthu mmosa aahikoha nihiku nlo mwaha w'orwaaka nno okereja. Khwira, "Muhirowe iwe. Onikhala onyakula paahi ni itthu soohitthokelelya."

Moone, "oohaaphenta awo."

*Alipa-oowoka, oothipelela, oowiisoona, oophenta  
soopuha ohiya opatthana ni Muluku;*

Nyuwo muniira, "Munna Branham, eyo ti makomunista." Enihimyani eversiikulu enttharelana?

*Yooneyaka ntoko atthu oothunku, masi (exeeni?)  
ekhoottaka oweriya waya nave: (Masu, Yesu  
Kristu mmosaru nsana, olelo, ni mahiku othene,  
oowiisooniherya, natiri a nihiku) . . .*

Vekeekhai ntoko Ananiya, vekeekhai ntoko Sitikiya, vekeekhai ntoko Palaamu, nitthikelaka ottuli, maprofeta akina oowootha.

*Yooneyaka ntoko atthu oothunku, (ooreerihwi . . .  
Munnona?)*

*Yooneyaka ntoko, (ooreerihwi, ookhalihwi  
arumeyi . . .)*

*Yooneyaka ntoko atthu oothunku, masi ekhoottaka  
(wira Owo mmosaru nsana, olelo, ni . . . Ekhoottaka  
Masu Awe!)*

Awo yaamukhontte sai Yesu mahiku ale? Awo yaamukhontte aani okathi yaamukhoontt'aya Yesu? Masu. Awo yaari anatiinii. Awo yaaniixuttiha mBibiliani mwaya, masi yaahikhootta Masu a nihiku nene nenlo.

Awo t'ani olelo? Ethhu emosaru, ooreerihwi, elaleyaka Ehapari yoorera ya pentekosite, masi emukhoottaka natiri a Masu a nihiku nene nenla onikhala oolipiheriwa, "Yesu Kristu mmosaru nsana, olelo, ni mahiku othene." Nyuwo munnoona yeeyo? [Muthukumano oniira, "Amen."—Mol.]

*Okhala wira awo ti yaawo anikela mmaitthokoni, nave...khuyaakuxa athiyana ookhweya murima oosareya itampi, aneettihiwa ni soowunlela sa khula enamuna,*

“Maira ahu a miteko s’ottottha ni *elexe n’ilexe* ahu.” Mutthu onikhumelela otthunaka otaphulela Masu voohiloka, ni ohimyaka ela, “Sothene siri sana, munna muthiyana, nyuwo okhalana ikharari sookhuveya. Muhixikhe ethiru ile. Munnona? Wala, nyuwo mwa—nyuwo mwawara *ela*; kahi *yeeyo*, ‘t’ile enikhuma mmurimani mwa mutthu enimunanariha.” Munnona? Vano munnisuwela wira nyuwo mureerihwe ni erooho yootakhala, y’ethaama, yoonanara? Paasoopa, siiso mwiipaka mukoraaleni, ni ikharari sookhuveya, masi murina erooho yootakhala. Eyo ti yoovirikana ni Masu. Eyo ekeekhai. Ti yeeyo Bibilia ohimmy’awe. Nto nyuwo muniira, “Ahe, miyo kinnimuwara kaputtula. Eyo khenikilamula.”

“Ole, muthiyana oniwara ekuwo eri ya mulopwana, ti yoonanara vamaithoni va Muluku.” Muluku ohinrukunuwa ohimye yeeyo.

<sup>124</sup> Oh, itthu sinci-ene, moota naarow’ahu owerya ovira mwa seiyo? Okathi ahu waammala. Masi nyuwo munnisuwela voophiyerya wira musuwele etthu yooreera ni yootakhala. Vano kiireke sai wira awo yiireke? Kiireke sai yeeyo? Eniiriwa, “Ahe, munnyakula mwaha wa xeeni?” Miyo ka namoona onrowa woovirikanyani. Nihiku nlo, Nihiku N’olamuliwa, khamunrowa okhalana nloomo wira mwiipithe.

<sup>125</sup> Aawerya sai Mikaya okhoottiha ele? Aawerya sai Moise, okhuwelaka, otthunaka okhoottiha? Vano Yoxuwa n’akina etthimakaka eriyari y’atthu? Vano Levi khimukumiha xoowa awe, khuwiiwakasa, nave? Awo khukelela ohoolo siiso pahi.

Yoohimmwa khalayi-ene wira anoorowa wira yeeyo. Ni awo anoorowa wira, maana ti SIISO ANIHIMYA T’APWIYA awo anoorowa wira. Nyuwo munuupuwela wira miromolelo iyo sinookhwela, muromolelo aya onoothikela Masu? Ti SIISO ANIHIMYA T’APWIYA, iyo khasinthika! Awo anoorowa mpakha mwa nwanani a Kristu? Vekeekhai. Eyo ti SIISO ANIHIMYA T’APWIYA, awo anookela! “Vano nyuwo munihimya exeeni?” Kihaana okhala namoona, ni nyuwo nave, alipa-oowaamini othene. Nwehe.

*...athiyana ookhweya murima oosareya...  
soowunlela sa khula enamuna,*

<sup>126</sup> “Ahe, athiyana othene akina anniira.” Maprofeta oowootha! Vano nwiriyane. Maprofeta oowootha, kinaahimya yaawo. Vano awo anrowa wira exeeni mahiku ookiserya?

*...anaakuxa athiyana ookhweya murima...  
aneettihiwa ni soowunlela sa khula enamuna,*

“Ahe, miyo koosuwela wira athiyana othene akina...”  
Vaareera, mukeleleke ohoolo.

<sup>127</sup> Kaahimye exeeni khalayi-ene ehinatthi yookhumelela ela yuulupale oCalifornia nno? “Nyuwo atthu nno oLos Angeles, khula mwaakha onihokolow’aka annikhala axithiyana anci-ene tho oomettha ikharari ni alopwana anikhala mwa athiyana ovikana yaakhanly’aya khalayi, alaleyi anci-ene ekelaka mmutthenkesoni. Khamurina hata etthyaweleso! Vaakhanle wira miteko suulupale sivariwe mwa nyuwo saahivariwa oSotoma ni Komora, owo waamwiira okhanle-ene olelo. Oh, Kafarnawu, nyuwo muniisihana mmansinyu ni nsina na malaikha, Los Angeles!” Munnoona enikhumelela? Eyo enoorowa mpakha vathi va ephareya. Liini? Miyo nkisuwenle okathi eyo enrow’aya, masi enoorowa. Nyuwo amiravo, miyo kaahoone eyo mahiku aka, nyuwo nwehe. Yoomalamala!

*Mahiku othene anikhala yixuttaka, . . . anoceela ophwanyana osuwelexa ekeekhayi.*

Vano va ti vari yooxankiha, va ti vari nipuro nooxankiha. Nwiriyanela.

*Nave ntoko Yane ni Yampere sanvirikany’aya Moise, sisi-toho awo annivaanya ekeekhayi: atthu oopahuwa ankhili, oorimeeliwa waamini avahiwe atthu ooreera murima mahiku othene, vekeekhai.*

“Naahimyaka Waamini.” “Vano owo onoorukunxa Waamini w’axitithi, kiireke aana, ootthikelaka w’axitithi aya.”

<sup>128</sup> “Oorimeeliwa naahimyaka Waamini.” Ah! Nyuwo munnisuwela *oorimeeliwa* etthu enihimya’aya? Mwaarine-ene Bibilia Scofield, ookhala “h” vo. Osulu wene iwo, onihimya, “oohiya waamini.” Mutthu ohin’ye waamini, ti yeeyo ekhanle.

<sup>129</sup> Vano, minuutu mmosa paahi. Kintthuna kiphavele etthu va. Kinoona wira koolepa ela oratteene. Nkikupanli, masi kintthuna kihimye, ni kiphavele kihinatthi o—ohimya. Vano, minuutu mmosa paahi. [Nipuro vahiitthu mufiitani—Mol.] “Orimeeliwa naahimyaka Ekeekhai, naahimyaka Waamini.” “Waamini,” ori Waamini omosa paahi. Eyo ekeekhai. “Naahimyaka Waamini, oorimeeliwa!”

Vano kintthuna kimusome Luka 18. Minuutu mmosa paahi. Nyuwo khamu . . . Nyuwo mulepeke; khamurina oomusoma.

*Vano ahaahimeerya nlikanyihho nla, wira yaahaana ovekelaka okathi wothene, ni . . . ehooceyaka;*

*Ahimyaka—ahimyaka wira, Muttethe mmosa aahikhala mphuki, yoowo ahaamoova Muluku, nave khaamuttittimiha mutthu:*

*Aahikhala-toho muttethe yoowo naamukhweli mmosa muthiyana; vano owo aanirowa wa yoowo, iiraka, Mukiphukele mulatthu aka ni nwanani aka.*



*Vano owo aahimu—ahimukhoottela mahiku manci-ene: masi nihiku nimos aahuupuwela mmansawe, Nnaari miyo nkinimoova Muluku, hata nkinaattittimiha atthu;*

*Vano okhala wira naamukhweli ula onnikinyoonyiha, kinoomwiirela exariya, wira... ahitthikele-tho okuwkhula.*

*Apwiya yaahihimya-tho wira, Nwiriyaane etthu enihimyaawe mphuki ootakhala murima.*

*Ankhi Muluku khaniwiirela exariya ale... aathanlalyawe, animwiitthana yoowo othana n'uhiyu yoowo, enamwi opisaka owaakhula?*

*Miyo kinooleelani wira onoowiirela exariya naanaanoru. Nto okathi Mwaana a mutthu onihokolowawe, nlelo onoophwanya waamini mulaponi?*

<sup>130</sup> Vano ela ti yookoha. Va ti vatthu kaatthun'aka ophiya-vo: Mwa Wiisuupulula 10 (Hiyo nnoophiyerya muhina mwa minuutu vakhani, Yoolempwa ekina, nnoohimya.), Owo ohimnye wira, "Mahiku a Mutthaka wa nlaikha na neethanu neili, esiiri ya Muluku ehaana omaliheriwa." Va ti vari yookoha, t'ila, nyuwo mwatthara mweettelo yoola okathi ula, *enoorowa* omaliheriwa? "Kinoophwanya Waamini?" Malakhiya 4 onoomaliheriwa okathi yoola, "Ohokoloxerya Waamini w'ana, otthikela Waamini w'axitithi, wooloka, Masu"? Munnona?

<sup>131</sup> "Oorimeeliwa, Yampere ni Yane, ntoko saanvirikany'aya." Vano, tho, mwiiwe, Timoteyo Aneili 3:8. "Ntoko Yan... saanvirikany'aya Moise, vano tho mahiku ookiserya yaala orimeeliwa yaamoowa," vano moone vatthu Awo anihimya'aya va, "yooneyaka ntoko atthu oothunku," ooreerihiwa. Vano nrowe paahi... Mutthikele ottuli ni—ni mwasome mwaphiya vale owaani, wira miyo kimalihe ela, voosiis'ula, kawerya vale. "Oorimeeliwa naahimya... " Kahi oorimeeliwa mwa—mwa—mwa makhalelo; awo atthu ooreera murima, atthu oolakeya.

<sup>132</sup> Vano nwehe, okathi Moise oronw'awe wEjitu, ni mutthaka wa SIISO ANIHIMYA T'APWIYA, ni khulipiheriwa; aahimukhuwelela vamosa Isarayeli, yaawo yaari nloko nimos, kahi ekereja. Isarayeli naari nloko; awo khanakhaleke ekereja. Okhala wira, nuulumo *ekereja* nnihimya "ale yihaneliwe okhuma." Awo yaari atthu a Muluku. Vano okathi awo akhanly'aya ooreerihiwa vathi va Masu, ni khwiihaniwa, khukhala ekereja ya Muluku. Vano nto khuhiya waamini, okhala wira awo khayaaminni Masu a Muluku, ni yaamwiiwelenle profeta oowootha. Miyo kinroromela wira eyo enookela muhina.

Isarayeli, aryeene atthu a Muluku, yaakhumme ekhaliheriwaka ni ntata na Muluku, ooreerihiwa ni Masu... ni Owerya wa Muluku, yoonaka ithoonyeryo ni mitikiniho sa

Muluku. Vano nto okathi Muluku eett'awe ni yaawo, profeta mmosa oowootha khukela, ooreerhiwa, khwiixuttiha etthu yoovirikana ni Masu eekeekhai a Muluku awo yiiwalyaaya; nto khula mmosa a yaawo khupweteya mothakoni, waahiya atthu araru. Vano nwehererye vo.

<sup>133</sup> “Ntoko saary'aya mahiku a Nowe, yaawo atthu athanu n'araru yooponw'aya ni maasi, siiso onookhala okathi w'orwa wa Mwaana a mutthu.” “Ntoko saary'aya mahiku a Lothi, yaawo araru yaakhummy'aya oSotoma, siiso enookhala okathi Mwaana a mutthu onrow'awe wiisooniherya.” Miyo kinihimya Yoolepwa paahi, Masu a Apwiya, yaawo, “Erimu n'ilapo ya vathi sinoomala . . .” Anrowa okhala vakhani!

<sup>134</sup> Nwehe va. Moise aaronwe w'Arooni. Moise aari wira okhale Muluku. Muluku aamuleenle wira akhale Muluku, khwira, “Nyuwo mukhale Muluku, ni Arooni munn'inyu akhale profeta anyu. Nyuwo muheleke moolumo mwaano mw'awe mwaahiweryeke olavula oratta-ene.” Khwira, “Masi t'ani omukhalin'he mutthu ohilavula? T'ani omwiirin'he mutthu olavula?” Apwiya ti yiirale.

Vano owo khweetta mpakha ohitto iwe. Exeeni owo iiraly'awe? Owo aapanke mwiiriirya w'eekeekhai ni wa xariya yoowo Muluku aamwiirenly'awe wira iire. Muluku aamwiirenle wira, “Rowani mwamurihele ttootto anyu vathi.” Khimuttotta, vano owo khukhala enowa. Owo khimuttotta, nto khutthikela othatuwa ttootto. Khwira, “Rowani mwiire yeeyo ohoolo wa Farawo, ni mwiire, 'SIISO ANIHIMYA T'APWIYA.'”

<sup>135</sup> Nto okathi Farawo oonaly'awe yeela, hiyo nniira, “Vano, ethepyelo xeeni yookhweya ya namaxintta.” Khwira, “Khekhanle hat'etthu mwa yeeyo. Eyo etelepattiiya ya mmuruni wala etthu siiso, nyuwo moosuwela. Hiyo nookhalana amiravo mmutthenkesoni mwahu anwerya wira etthu yeeyo. 'Rwani nno, Pixipu *Lexe ni lexe*. Ni, nyuwo, nyuwo rwani nno.' Hiyo nookhalana awo anwerya wira etthu yeeyo.” Owo aari Satana olavulaka mwa Farawo.

Ole aari Muluku olavulaka mwa Moise.

<sup>136</sup> Masi nkanweheni mutth'ula aakhumme. Yane ni Yampere khurowa mpakha wa Moise, nto v'atthuni ohoolo w'atthu, khupaka khula mwiiriirya Moise aawery'awe opaka. “Awo anoowooto hata ale Oothanliwa vaaweryaneyaka vale.” Eyo eekeekhai? Khupaka etthu ene yeeyo Moise aapank'awe. Munniiwa saana? Vano muupuwele, eyo ti SIISO ENIHIMYA YOOLEMPWA, eyo enootherikela-tho mahiku ookiserya.

Exeeni yaavirikanne mwa Moise ni Yampere?

Moise iirale, “Ekhumelele ephome mmaasini.”

Vano maprofeta ala oowootha khwira, “Vekeekhai, hiyo ninnihela ephome mmaasini, nave.” Nto khwiiraneya.

137 Vano Moise khwira, “Sikhumelele itothomwa.” Owo aakumiha vai seiyo? Saakhuma wa Muluku. Munnona?

Nto owo iirale exeeni? Owo khwira, “Ahe, vekeekhai, hiyo nnoowerya oruha itothomwa, nave.” Vano awo khwiirasa. Khula mwiiriirya Moise aawery’awe opaka, awo yaaniwerya opaka, nave!

Muupuwele, muhele yeeyo mmuruni, hiyo nnoophiyerya yeeyo, okathi vakhani. Awo anniwerya wira khula etthu akina anwery’aya wira, masi awo khanwerya okhala ni Masu. Awo khanwerya okhala ni Masu.

138 Vano nwehe, awo yaahiira. Masi Moise, profeta eekeekhai ooveleelihiwa ni Muluku, oorummwa ni Muluku, owo khaatonko onyakulihana n’awo, iirale, “Va, nyuwo khamunwerya wira eyo! Nyuwo khamunwerya!” Owo aarimwaahiya paahi mmansaya, aarimwaahiya paahi khukelela ohoolo. Awo maprofeta a mutthenkeso, masi eroweke ohoolo.

Moise khukelela ohoolo paahi, khumwiiwelela Muluku. Etthu p’itthu Muluku aahimy’awe, “Vano mwiire *ela*,” Moise aamurowa ni wira. Owo iiraka etthu esya. Okathi awo yiir’aya, khula mmosa a yaawo aanikhalana moonelo wala etthu siiso, awo jaarwa va. Awo yaaniira, nave, voolikane-ene ntoko Moise siiraawe.

139 Vano nwehe. Atthu ala yaamurwa... Oh, nyuwo atthu, muhialelele ela! Anamawoka ala, anamatakiherya, yaakhumelenle omanle-ene okhuma ole eekeekhai toko. Munnona? Awo anrweela otakiha. Moone, awo ahaana otakiha. Xetwani khonwerya opattuxa hat’etthu; owo namahonona paahi a etthu yeekeekhai.

Vano etampi exeenii? Ti exariya yoohononiwa. Oraruwa exeenii? Ti mwiirelo wooreera ohononiwe. Wootha exeenii? Ekeekhai yootepanyiwa. Ohononiwa!

Nkanweheni Ananiya, ohononiwa wa Masu ooloka. Nkanweheni Palaamu, ohononiwa wa Masu ooloka. Nkanweheni Sitikiya, ohononiwa wa Masu ooloka.

Ni Bibilia ohimnye wira atthu ala yaamoowa, numala ohono... kiireke wira ehonone Masu ooloka oolipiheriwa ni owooniheriwa okhala Ekeekhai.

140 “Nvareke muteko wa namalaleya,” vanloomoni vale iwe, “nvareke muteko anyu woomalela. Okhala wira onoophiya okathi atthu ahinrow’aya otthuna wiiwa Mwixuttiho wooreera, masi ettharihaka itthu sinasivela animwiithukumanyerya awixuttihi, owaruni onrowa waaneenaka; ni anookelela ohoolo yiiraka etthu p’itthu awo antthun’aya, ni, ‘Sothene siri sana, hiyo nookhalana ithoonyeryo imosaru ni mitikiniho.’ Vano anookumihiwa mw’Ekeekhai, nto anookelihiwa muhantisini, makano.”

<sup>141</sup> Oh, otthokelela wa Eroho Yowarya, woova oniphwanya munepa wa mutthu okathi owo oneemel'awe wira uupuwele moota ekhanly'aya y'ekeekhai ni voowooneya ohoolo wahu wene! Muthipule nluku nle na vanlothoni vate va musome ekapatti ya epaphelo epwehiwe vaavale, miyaakha miloko miraru ni miraru sivinre. Moone etthu Owo ohimmy'awe iwe e—Ephiro ya Neethanu neili, voosiis'ule okathi nluku na vanlothoni niheliw'aya. Vano nwehe ela. Nwehe ohitto nno omuro, okathi Nlaikha n'Apwiya naakhurunw'aya ntoko Nlumi na Mooro, ikereja imiya sene, kiireke atthu a mukereja, yeemenle-ene mukerekhere wa muro; etthu Owo aahimmy'awe, moone sinto yookhumelela. Moone etthu ekhumelenle.

Ti yoolipaxa. Koosuwela wira enikhala ntoko yoolipa, axinna, iwo. Masi ti...Bibilia oohimya, Yesu oohimya Mwaneene, "Yaamurowa owoototha hata ale Oothanliwa vaakhanle wira vaaniweryaneya." Khivanamuna. Awo khankhalakhala eweryaka woona Eyo. Vaakhanle wira vaaniweryaneya, ale Oothanliwa yaamootothiwa ni yeeyo.

<sup>142</sup> Nwehe, atthu ala yaakhumelenle vaamanly'awe orummwa ole ooreerihwa eekeekhai a Muluku; ni profeta Awe eekeekhai, Moise. Nto okathi Moise aapak'awe etthu, awo yaanitakiherya eyo.

<sup>143</sup> Vano, munna mulopwana, muthiyana, miyo...Ela ekerej'aka yoomi. Kihaana ehaakhi y'olaleya etthu kintthun'aka, vakhalaru wira ti ya Masu a Muluku. Ni miyo nkiniwuulumelani nyuwo atthu, masi nrowe niwehawehe okathi ni ewoora enikhala'ahu vano.

Makhomaso wa Munna Ruddell, wa Junior Jackson, n'awo ari nno, ikereja axinn'ihu. Miyo kirootilyala iyo, okathi vakhani ovinre. Miyo kinoona wira awo t'omulikari telefooni voosiis'ula, nave, okhala wira khiwaavo—khiwaavo opuro mukereja.

<sup>144</sup> Muupuwele paahi yeeyo vano, minuutu mmosa paahi. Awo yaanipaka miiriirya seiyo Moise aapak'awe. Moise aahiruua ithotomwa; awo khutakiherya khuruuha ithotomwa. Munnona?

Muluku iirale, "Nihiku ninrow'anyu olya, nihiku nenlo munookhwa."

<sup>145</sup> Satana khurwa khwira, "Vekeekhai, khamunookhwa. Munrowa okhala oosuwelexa. Munrowa okhalana mutthenkeso wooreerexa, wooreera..." Nyuwo moosuwela. "Nyuwo moosuwela, itthu sothene sinrowa okhala sooreera wa nyuwo, munookhalanexa Waarya." Monne, ohonona paahi. Ehaana...

Nto muupuwele, SIISO ANIHIMYA T'APWIYA, ntoko Timoteyo Aneili 3:8, wira, "Mahiku ookiserya, wira Yampere ni Yane ola yaamukhalasa mulaponi." Vano, kintthuna wira nyuwo nwehe wira aakhala aili a yaawo, moone, anamatakiherya.

146 Vano hiyo ninrowa otthikela oSotoma, mwa okathi vakhaani, ale araru, niphwanye Malaikha ale mararu yaakhurunwe, noone otakiherya waya, ni sikina, moone, noone t'ani orina exariya ni ole ovonnye. Munnona? Munnona?

147 Nwehe, awo yaahipaka miiriirya mimosaru. Masi, nwehe, awo yaarootakihasa numala Masu eekeekhai oreerihiwa, n'ule eekeekhai Muluku aamurummy'awe; aamutthara, voottharelana.

Miyo kinniikoha sinto naamuwerya otthokelela minuutu mmosa. Ovarela matata a atthu, woohikhala khalayi, miyaakha soophiyaka miloko miili sivinre, vano yaanooneya ethoonyeryo. Wulu, saahikhala ithoonyeryo sinci-ene mwa itthu sothene, n'atthu othene. . . Mmosa ookhalana mmatatani mw'awe noolopwana; mmosa ookhalana mmatatani mw'awe noothiyana; mukina onimunkherya. Moone, inamuna sothene sa . . . Nto miyo kinniikoha. . . Muluku khonikihiya woolelani okathi ula ele yaari ekeekhai, masi nihiku nimosa nyuwu munoosuwela. Eyo yaari wira yooniherye paahi ololo aya. Eyo khiyaari yoolikana, wopaceryani. Miyo kinimoolelani, nihiku nimosa, Apwiya yatthuna vale.

148 Nwehe, awo yaahipaka miiriirya mimosaru, masi awo khiyaa. . . Nwehe, awo khiyaapanke mpakha Masu ooloka orowa ohoolo, toko. Eyo t'inamuna Satana iiraly'awe omatta w'oEdeeni. Eyo t'inamuna oniir'awe okathi wothene. T'ani aapacenrye olavula s'eprofeta? Moise. T'ani aapacenrye okela vanlakani, Moise wala Palaamu? Moise. T'ani aapacenrye okela vanlakani, Yereimiya wala Ananiya? Munnoona enihimiy'aka? [Muthukumano oniira, "Amen."—Mol.]

149 Nwehe, awo yaamutakihasa. Anamatakiherya a mw'erutthuni, anaxariya, yuupuwelaka wira "yaavara muteko wa Muluku," ntoko siiraly'awe Davidi, esumana evinre, masi etakiheryo ya mw'erutthuni. Miyo kinwehererya minuutu mmosa paahi. Miyo kintthuna wira muupuwele muhina mwa mapuro ala. Miyo kaahihimye, vekeekhai Eroho Yowarya enimuupulula, vanci-enexa w'ale Oothanliwa. Munnona?

150 Muromolelo wa Farawo oniira, "Hiyo nookhalana atthu anwerya wira etthu emosaru yeeyo," n'awo yaahiira. Munnona? Mwaha wa xeeni Farawo iirenly'awe ela? Mwaha wa xeeni Muluku aatthunihenry'awe? Mwaha wa xeeni Muluku aarow'awe omuruma profeta, eekeekhai ooreerihiwa iwe wira apake ethoonyeryo ohoolo wa Farawo, vano nto onamuhiya namatakiherya a muromolelo orwa n'utakiherya ohoolo w'atthu? Mwaha wa xeeni Owo aarow'awe waahiya anamatakiha okhumelela ni wira yeeyo, ni wira etthu emosaru voolikane-ene ntoko Eroho ya Muluku yiiraly'aya? Moone, Yoolempwa ehaana omalihiriwa.

<sup>151</sup> Nwehe, Owo iirenle wira olipihe murima wa Farawo n'atthu a wEjitu, wira ooniherye wira Moise khaari meekh'awe aarina Masu. Awo yaaniwerya wira itthu sothene voolikana ntoko Moise aawery'awe wira.

Vano mwaha wa xeeni Muluku otthuniheny'awe wira etthu ila yiiraneye mahiku ookiserya? Vano, etthu emosaru erooho yoowootha yaamwiireny'aya Sitikiya, "Ninrowa wira sai wira Akhabi orowe iwe, wira niirihe itthu iya okhumelela?" Moota xeeni Owo onrow'awe owiiriha atthu ala, eroromelaka ikereja saya, orwa va wira etthuniherye etthu ila wiiraneya, seiyo Owo ohimmy'awe? Awo, Okathi ula wa Ekereja ya Lawotiseya, "Okhala wira munihimya wira mwa 'thaaciri, ni khiyaavo enoohaleelani. Kikilanthi ntoko pwiyamwene.' Khamurina hat'etthu! Khamunsuwela wira mwa mutthu oothoiwa, ootakhaliwa, oohoona? Ni kinoovahani miruku wira murwe muthume wa Miyo," Owo ohimmye wira, "makhura ni eweero." Owo iirenlani yeeyo?

<sup>152</sup> Mwaha wa xeeni Owo otthuniheny'awe otakiherya nno okhumelela mahiku ala ookiserya, okathi itthu iya sinrweel'aya wiiraneya ni Masu a Muluku eekeekhai; ni waahiya anamatika okhumelela ni wira etthu emosaru, n'ukhootta Masu a Muluku eekeekhai? Owo aahiira mwaha wa Moise. Ni Farawo aahiira amuvirikanyaka Moise; n'ale, Yane ni Yampere, yaahirasa amuvirikanyaka Moise. Ni Bibilia ohimmye wira eyo enoottihikela-tho mahiku ookiserya. Hiyo nri va. Vano, eyo yaahikhale Yoolempwa enimaliheriwa, eri vai?

<sup>153</sup> Moise aahikumiha mawoowo n'awo ni wira, "Va! Va! Nyuwo khamunwerya wira eyo. Ti miyo paahi kirummwe wira eyo. Va! Nyuwo muhiye eyo, naanaano va" Owo aarimwaahiya paahi wira ekelele ohoolo.

Mwaahiye ekeleleke ohoolo. Muupuwele, Bibilia ohimmye wira, "Ntoko wooniheriw'aya ololo w'ale, siiso w'ala a mahiku ookiserya onimooniheriwa," okathi Mwaakameliwa onikuxiw'awe oroihiwaka osulu. Nwehe.

<sup>154</sup> Moise, Masu eekeekhai owooniheriwa, khonahimyeke hat'etthu, owo aarohiya paahi wiireya. Masi Owo iirale siiso wira owerye olipiha murima wa Farawo, omuwoka Farawo.

Owo aahiira etthu ene yeeyo emosaru wira amuwoke Akhabi. Ni mmirav'ole mwaamukhaani eemenle-ene vale mmansawe, Mikaya mwaamukhaani, aahimeeryaka, "SIISO ANIHIMYA T'APWIYA." Va aahikhala mukina, ooreerihwa, "SIISO ANIHIMYA T'APWIYA." Ni oovirikana, mmosa ni mukina.

<sup>155</sup> Hiyo ninnivenya olelo ni SIISO ANIHIMYA T'APWIYA, wira opatiiso wa maasi mahiku ookiserya ohaana okhala ni Nsina na Yesu Kristu. Nto mutthu mukina onoovenya n'upaka miiriya, ni, na Oraaru.

Mukoonihe nuulumo *oraaru* mBibiliyani. Mukoonihe vatthu vari aMuluku araru. Mukoonihe vatthu vari itthu sene ntoko seiyo. Iyo khasikhanle muhina mwa Masu a Muluku. Khekhanle etthu ene eyo ntoko mutthu otonko opatisiwa ni nsina “n’Atithi, Mwaana, Eroho Yowarya,” siromoliwaka itiitulu iyo. Itthu iyo sothene, “Oh, vaareera, axinna athiyana. Vaareera, mukhalane paahi oorekama... ikharari sanyu sookhuveya. Vaareera, khamurina yo wira *ela, ele, wala ekina*. Oh, eyo ethiruu, mutthu oowuuluvala a khalayi.”

Masi Bibilia oohimya! Ni Owo oohimya, “Mahiku ookiserya, Owo aamuveleeliha Eroho y’Eliya, ni yaamurowa owiihana atthu, aana a Muluku, otthikela Waamini wooloka ntoko waary’aya wopaceryani, wa Masu.” Masu awo yaahilipiheriwa, Mwaana a mutthu mahiku ookiserya, siiso ntoko saary’aya oSotoma; nsana, olelo, ni mahiku othene. Owo aahihimya wira yeeyo. Owo ti natiri a Muluku. Eyo ti SIISO ANIHIMYA T’APWIYA.

<sup>156</sup> Nwehe, awo yaaniira etthu emosaru, ntoko Moise siir’awe, mpakha Muluku ophweeleya ni yeeyo.

Vano muupuwele, eyo ti SIISO ANIHIMYA T’APWIYA, enimwiiraneya nihiku nla. Vano, mphavele mulaponi; mukuxe khula etiini, mukuxe khula nihimo, mmukuxe khula mutthu, mukuxe khula ekereja! Miyo kinoolopolani, mwa Nsina na Kristu, wira mwiire ela, nyuwo alaleyi. Miyo kinoolopolani wira musome ixornaale wala mutthokelele khula nipuro nyuwo muntthun’anyu orowa, nto moone vakhala wira eyo khekhanle mulaponi okathi ene yoola. Munnona?

Vano, Matewu 24:24 t’olikana vekeekhai. “Owootha, ooreerihiwa anookhumelela mahiku ookiserya, ni anrowa okhala maprofeta owootha, ni anoowoototha anci-ene.” Nkawehani yeeyo mwa malikanyiho vano, okathi eniiraney’aya vano, moone, “Anoowoototha anci-ene.” “Maprofeta,” oowaatta; “aKristu,” ooreerihiwa, oowaatta; anci-ene oohiyana-hiyana, aMetotista, nyuwo moosuwela, ni aPatista, ni aPentekosite, ni akina. Munnona?

Masi yookhala Eroho yooloka ya Kristu, nto owo ti Masu oowiipaka erutthu ntoko Owo saahimmy’awe wira.

Vano nnookelela ohoolo vakhani-tho, wa Soolempwa kamosa-kamosa tho.

<sup>157</sup> Mpakha, Muluku ophweeleya, vano eyo khumala. Ololo aya khooniheriwa.

<sup>158</sup> Nwehe. Muupuwele, nikatamphe nnoolikana oratteene ntoko enuku y’etriku. Munnona? Vano, khivaaweryaneya ohimya, ottuli wu okathi wa Lutero, “erikittili yaari etriku,” nave eyo yookhalana Ekumi muhina mwaya. Erikittili eri sana, Ekumi muhina mw’erikittili yaari sana, masi, muupuwele, Ekumi yahikelela ohoolo; yaahikelela ohoolo okhuma Eliseyo

mpakha Eliya. Ekumi enoonthikela ekelelaka ohoole. Masi, muupuwele, eyo eri mukhalelo mukina. Khivanweryaneya eyo otthikela okhala mukhalelo yoowo. Hiyo khanikhanle ookhuura enama yoowuntta y'okathi mukina. Khanikhanle ookhuura enama yoowuntta y'aPentekosite, Metotista, wala Patista. Moone, eyo enikhala enama yoowuntta. Hiyo nookhalana Yolya esya, Masu a okathi ula, siiso.

<sup>159</sup> Muupuwele, nikatamphe nnoolattana ntoko enuku y'etriku. Khivanweryaneya . . . Eyo khiyaalattana n'iyoo mmataakhuruni, eyo khiyaalattana n'iyoo vamukopootthini, masi vekeekhai yaanilattana vanikatamphe. Khiyaalattana va . . . Yesu Kristu mmosaru nsana, mwa Lutero; khiyaalattana mwa Wesley; masi vekeekhai ennilattana mwa Pentekosite, "yaamuwoototha ale Oothanliwa vaakhanle wira vaaniweryaneya." Munnona? Owo ori vo okathi anyu.

<sup>160</sup> Masi muupuwele, ekerej'ele ya Pentekosite, mahiku ookiserya, yaari Lawotiseya; vano Kristu aahoomoliwa, Erisarima, Etriku, Ene. Okathi Owo aathun'awe . . . Muupuwele, okathi Owo aathun'awe wiisooniherya Mwaneene mukereja, Owo aarookumihiwa. Eyo nlelo yaari ekereja, yaanihimya okhala; yooreerihiwa.

Masi *va* ari Masu, Kristu Mwaneene, ori Masu ooreerihiwa onrowa orweela Erutthu Awe ehanle, Mwaakameliwa. Ooreerihiwa, a maasi mamosaru anaanin'he etriku, ntoko sihimmy'ahu, anninaaniha nthakathaka nave, ooreerihiwa. Ale Oothanliwa paahi, wala ootthommwa, t'anrowa owerya woona evirikanelo mwa seiyo. Vano, aEfeso 5:1 annoohimeeryani siiso, ni moota eyo yaary'aya.

<sup>161</sup> Awo t'oreerihiwa. Atthu othene aniira, "Avuwihawe Muluku! Hiyo nookhalana otaphuwa ohitto nno. Aleluya! Hiyo . . . Oh, aleluya! Hiyo ninnilavula ilavulelo, n'utupha. Hiyo nookhalana otaphuwa w'athiyana; nyuwo atthu muneererya waahela vathi va ithu iya sa inamuna sothene." Munnona? Mukeleleke ohoole. Khiyaavo enweryaneya wira. Eniiriwa, "Ahe, hiyo ninnilavula ilavulelo. Hiyo ninninyakula. Hiyo niniina mwa Eroho. Hiyo ninnilaleya Masu." Vekeekhai. Khiyaavo hat'etthu y'ohimya voovirikanya eyo. Siiso yaahiira axilopwan'ala ottuli mu mBibiliyani.

Yesu ohimye wira, "Yaamuwoototha ale Oothanliwa vaakhanle wira vaaniweryaneya, hata ale Oothanliwa."

<sup>162</sup> Vano nwehe, nikatamphe . . . Okhuma Enuku yooloka, Enuku yaakenle mutthayani, Eyo khiyaari mutthenkeso. Eyo yaari Enuku emosa, mwa yeeyo Eneene. Masi okathi emenly'aya, khiyaari Enuku; waari mutthenkeso, moone, mataakhuru, etriku.



Vano Eyo khukela mukhalelo mukina, yaakhanly'aya nthaakhuru. Nlelo khiyaari ntoko wopaceryani. Waari mutthenkeso.

Khukela munikatampheni, makukhu manci-ene, Pentekosite, yoohalela olikana vano. Nkawehani yeeyo. Eyo enimuuepeya okathi wothene, yoohalela vakhani olikana, enikhala yoolattana sana ni Enuku ya etriku okathi onoon'anyu nikatamphe nlo naamukhaani vale.

Masi vookiserya Eyo ennooniheriwa, ni khokhanle hata mutthenkeso. Khokhanle-tho namweettiha. Mutthenkeso namweettiha paahi. Hata anamweettiha; mutathi ohaana okhwa, nikatamphe nihaana okhwa, itthu sothene sikina sihaana okhwa, masi etriku enootherikela okhala ekumi. Eyo t'irutthu ya ohihimuwa, enookhuruwa khwaakuxa. "Ookiserya anoorkhala oopacerya, ale oopacerya anoorkhala ookiserya." Moone, onimwaakuxa mpakha moohihimuwani. Nyuwo munnitthara yeela? [Muthukumano oniira, "Amen."—Mol.] Vaareera. Nwehe, enuku ti. . .

<sup>163</sup> Nikatamphe nnoolikana sana ni enuku. Vano mutthu onlima ematta y'etriku, wala etthu ekina, aamuweha ni wira, "Avuwihwe Muluku, kihaana ematta y'etriku," ohikhalanne hata nipattuusa n'etriku. Hmm? Enoolattana sana n'etriku, masi nlo nikatamphe.

<sup>164</sup> Vano, apatthani, mutthike ni miyo. Ti vai onikhumelela muhakalaliho woopacerya, numala (okhwa) mahiku ale enuku ya etriku yaarin'aya omorela mutthayani, Erutthu, Mwaakameliwa a Kristu? Kristu oomutthokiha Mwaakameliwa Awe, eyo ekeekhaii, Ekereja Awe? Owo khonathokiheke Eyo; Owo aahenle arummwa paahi, ni maprofeta, n'akina, Mukereja, wira okhalihe Eyo yooloka. Masi oNicea, Rooma, miyaakha imiya tthaaru ni mithanu na mosa ohoolo waya, awo khutthokihasa khupaka mutthenkeso mwa yeeyo. Eyo ekeekhaii? Vano khukhwa. Itthu sothene sahiiraana n'ikereja ele yaamuheliwa mookhwaani. Vano eyo khukhala yoomaala, miyaakha imiya sene, moottakattani.

Masi, vaviraly'aya okathi, eyo khiphuwa mwa Lutero. Miphuwo soopacerya sa etriku khikhuma. Vaneili, eyo khunnuwa okhuma vaavo. Awo khukelelase ohoolo, khukhalana Zwingli n'akina, ni mitthenkeso mikina ni sikina. Nto, nuvira okathi vakhani, khikhumelela m'Anklikaano.

Vano nto exeeni yaakhumelenle? Va onoorwa ti Wesley ni muhakalaliho musya, ntaakhuru, ninlattanexa tho n'etriku. Vano exeeni yaakhumelenle yeeyo? Eyo khwiitthokiha, khuuma khukhwa.

Ekumi naanaanoru khukela muhina mwa nikatamphe, vano nikatamphe nnoorwa noohalela olikanexa ni Eetriku. Masi, vookiserya, ololo aya khooniheriwa mwa miyaakha mithanu na

miraru wala muloko sookiserya, vanci-enexa miyaakha miraru sookiserya. Vano nlo nniirani? Nnimwiivalaanya ni Etriku.

<sup>165</sup> Vano ohikhalenleni mutthenkeso woopaceriwa miyaakha iya miloko miili sookiserya sa muhakalaliho ola muulupale; ti maprofeta ooreerihwa, awiixuttihi ooreerihwa, ni sikina, masi ohikhalenleni? Khiyaavo hat'etthu woohikhala Enuku. Moone, Eyo yoohokolowa, ehikhalanne mutthenkeso. Oh, wulu, mutthu ohoona aamuwerya woona eyo. Eyo khekhanle oowitthokihaka; Eyo enoovirikanyiha owo voolipa. Eyo ti enuku ya Etriku, Eneene. Mwaana a mutthu onimwiisoniherya. Enuku ya Etriku enoohokolowa-tho Eneene, Mwaana a mutthu mahiku ookiserya.

“Vano sinookhumelela mitakiheryo soowootha, sa Yeeyo, mahiku ookiserya, sinrowa ohalela owoototha ale Oothanliwa vaaweryaneyaka.” Nkawehani makatamphe aya a mutthenkeso okawanyeya vano.

<sup>166</sup> Owo oniiriha Etriku okhala yoosuveliwa paahi, w'ale Oothanliwa, yaawo akhanle epantte ya Yeeyo. Nwehe moota eyo eniruuhiw'aya va vooreera-vo vano. Paahi e...Nwehe, awo ooreerihwa anoowerya; ale eekeekhai, Oothanliwa, ootthommwa, aEfeso 5:1, kiireke, 1:5, anookhala oolikanela, oothanliwa. Ti yaawo paahi eyo ehinrowa owoototha.

Nwehe, maprofeta ooreerihwa anrowa okhala oowootha, nave vaavo eriyari aya anookhala ooreerihwa eekeekhai. Munrowa omuhiyaniha sai? Ni Masu. Ntoko, hiyo nookhala mwa iruku. Munnoona eyo? Mwiire, “Amen.” [Muthukumano oniira, “Amen.”—Mol.] Munnona?

<sup>167</sup> Nwehe, ale ooreerihwa, Masu paahi t'anrowa waavalaanya, kahi ithoonyeryo. Oh, nnari. Awo animwiira ithoonyeryo imosaru, masi Masu ti yaavalaanya. Vekeekhai. Awo othene yaanihimya s'eprofeta. Awo othene yaahiira *ela*, *ele*, ni *ekina*, vekeekhai, vamosaru. Yesu ohimnye wira awo yaamwiira etthu emosaru. Masi Masu ti yaavalaanya, nwehe, kahi ithoonyeryo.

<sup>168</sup> Nyuwo mooweha? Yesu oohimya va, mwa Matewu 24. Owo khohimnye wira, “Anookhumelela aYesu oowootha mahiku ookiserya.” Oh, nnari, awo khiyaakhalakhala ekhaliheryaka eyo. Nnari. Nyuwo munoomukuxa muPentekosite ori muPentekosite eekeekhai, iiraka, mmansawe, wira owo ti “Yesu”? Munnona? Nyuwo munoomukuxa mMetotista oowootha, wala muPatista, wala mutthu ntoko siiso, wala mmosa wa mitthenkeso, aniira, “Hiyo na Yesu”? Awo annisuwelas wira kahi yeeyo. Awo khanrowa wira eyo. Masi Bibilia ohimnye wira yaarowa okhala “aKristu oowootha,” kahi aYesu, masi, “aKristu oowootha.” Awo khiyaarowa osuwela, yaamwiira, “Miyo ka Yesu.” Oh, nnari.

<sup>169</sup> Masi awo “t'aKristu oowootha,” nave khansuwela, okhala wira t'ovirikana ni Masu. Ni Muluku onilipiherya vamosaru. Vano, miyo kiniruhela ela wira kooniherye vano, 'okhala wira

nyuwo munnoonaka etthu emosaru wiiriwa n'atthu ala aniiraka veekeekhai-vo. Ni Yesu ohimnye siiso.

<sup>170</sup> Vano, ntoko sihimmy'aka, vano wa nyuwo atthu, mutelefoonini iwo, miyo—miyo nkiniwuulumelani, masi ela ekerej'aka ni—ni nikhuru naka Eroho Yowarya ekikhalin'haaya vasulu, ni kihaana waahimeerya Ekeekhai. Okathi onootepa omalaka.

<sup>171</sup> Vano, awo khiyaarowa ovilela eyo, masi, “aKristu oowootha,” ooreerihwa, oowootha, oohalela okhala ni khula ethoonyeryo ni khula eleetera ya Masu. “Awo annaamini opatiiso wa Eroho Yowarya?” Voomalela. “Annaamini sothene *iya?*” Ayo. “Annaamini olavula ilavulelo?” Ayo. “Annaamini wira ithoonyeryo ni mitikiniho sinnittharela, wira ithoonyeryo sinimwaatthara?” Ayo. Awo kahi aMetotista, awo kahi aPatista. Nnari, nnari. Awo t'aPentekosite. Moone, ala ti mahiku ookiserya.

Vano, okathi woopacerya wa ekereja khiyaarowa okhalakhala woonaka eyo. Okathi wa ekereja Metotista khonaweheke eyo; okathi wa ekereja Patista, awo khanaweheke eyo; okathi wa ekereja Prespiteriyana, awo khanaweheke eyo. Masi, aPentekosite, oolattanexa ntoko Etthu yeekeekhai! Ti vaavo, Etriku...nikatamphe nnihal'aya olikana n'Etriku. Awo khiyaakhalakhala esuwelaka. Munnona? Awo khiyaarowa osuwela. Masi ti mahiku ookiserya, nihiku nla. Ayo, mulopwana.

<sup>172</sup> Nwehe, ntoko saary'aya wopaceryani, siiso enookhala wokiseryani. Ntoko Hawa aataphulenly'awe Nuulumo nimoso voovonyeya, Satana aamutaphulelenle Hawa, n'uwo khwaamini. Muthiyan'owo, kahi mulopwan'owo; ekereja, kahi Owo. Munnona? Ti ekereja yaakhenle nsu noowootha. Munnona? Kahi Atamu; Hawa. Kahi Kristu; ekereja, mwaakameliwa, ooreerihwa, enihimmwa okhala, eniisihana mmansaya Mwaakameliwa, moone, eyo yaakhanle nsu noowootha.

Khamunwerya woona yeeyo? Vano, eyo enoottthavana ntoko mukhoyi wa ixapattho, ntoko iyaaphi mmaithoni mw'anyu. Vano, itthu sothene sinrow'anyu ophiyerya, Bibilia, Owo onootthava vamosa sothene. Hawa, kahi Atamu; Hawa t'aminni, kahi Atamu. Mwaakameliwa olelo, yoowo oniihaniwa, t'aminni; kahi Kristu. Mwaakameliwa ookhalana mixovo sothene, yoowo oniihaniwa mwaakameliwa; ithoonyeryo imosaru, mitikiniho mimosaru, itthu sothene imosaru; masi kahi Ole eekeekhai. “Yaamuwoototha ale Oothanliwa vaakhanle wira vaaniweryaneyya.”

Vano voowaakuva, nawerya vale omaliha muhina mwa minuutu miloko ni mithanu, nnookhala muhina w'okathi. Nwehe oratteenexa vano, siiso nyuwo khamu—khamunrowa ovonya wiiwa, wa nyuwo.

<sup>173</sup> Vano, nnari, awo khiyaarowa ovilela wiihaniwa “aYesu oowootha.” Awo khiyaarowa okhala, ovilela wiihana, “Yesu.” Vekeekhai nnari. Eyo ti yoowooneyexa. Mutthu ti mutthu aamusuwela eyo. Mutthu ti mutthu aamusuwela wira awo kahi Yesu. Khenikicala sinto yaamukhalana makhura mmakhatani, ni ephome mmatatani mwaya ni mmaithoni mwaya, awo nlelo annisuwela wira eyo e... Mutthu ti mutthu orina ankhili ooloka, aamusuwela wira kahi Yesu. Munnona? Awo khiyaarowa ovilela eyo. Masi awo aniisihana aneene “ooreerihwa.” Ni awo annipaka ithoonyeryo ni mitikiniho, “sinihalela owootoha ale Oothanliwa.” “Masi aKristu oowootha, ooreerihwa, yaamukhumelela, ni yaamuwootoha ale Oothanliwa vaakhanle wira vaaniweryaneya.”

<sup>174</sup> Vano nwehe oratteene. Muhihaleele nuulumo nla, okhala wira ninniphwanela wiiwiwa.

Owo onihela efiita vamikrofooni va paahi, wira ehivave. Miyo kinnikhala kiviheriwaka; yoottonyereya vafiitani, moone.

<sup>175</sup> Vano nto enrowa okhala ntoko Yeeyo, Bibilia, ohimmye wira yaamukhala. Munnona?

<sup>176</sup> Nwehe, kahi aYesu oowootha. “aKristu oowootha!” Annaamini wira t’oreerihwa, masi annisuwelasa wira kahiyo Yesu. Moone, eyo ti yoowooneya orateene. Vaakhanle wira mulopwana mmosa onookhuma ni wira, olelo, “Nkawehani mirahu mmatatani mwaka. Nkawehani owiitho waka. Miyo ka Yesu.” Ahe, vano, hiyo noosuwela wira eyo ti yoovonyeya. Ni, muupuwele, Yesu khonahimyeke wira athhu awo yaamukhumelela. Owo ohimmye wira yaamukhumelela “aKristu oowootha.” “aKristu,” oowaatta, miromolelo, ni sikina, *ooreerihwa*; ooreerihwa ni erooho ya muromolelo, nave woohikhala ni Masu. Munnitthara? Kahi Yesu oowootha. “aKristu oowootha,” ooreerihwa, oowootha. Munnona? Oh, moota enooney’aya! Moota hiyo... Vekeekhai nyuwo khamuniyelela ela!

<sup>177</sup> Vano, muupuwele, miyo okathi wothene kinooeelakani wira sookhala mixovo miraru s’athhu. Aakhala maloko mararu aathu: Khami, Semi, ni Yafeti, maloko mararu. Mixovo miraru, ni kooamini, wira ti mulipa-oowaamini, oowiipaka waamini, ni oohaamini. Okathi wothene ennikhala, okathi wothene enookhala. Munnona? Aahikhala Moise, mulipa-oowaamini; yaahikhala Yane ni Yampere; oohaamini. Munnona? Aahikhala Palaamu; Moise... Okathi wothene mixovo seiyo miraru s’athhu, mixovo miraru; oowaamini, oowiipaka waamini, ni oohaamini.

<sup>178</sup> Vano muupuwele, ole oohaamini, ekereja ya muromolelo, khenaamini hata ethoonyeryo nnakhala; yooriirya, yookhaleleya, yooratta, ekereja molumwenkuni, muromolelo. Masi ole oowiipaka waamini ti nikatamphe nenlo. Owo ti mutthu ule oniipaka waamini. Vano nto ookhala mulipa-

oowaamini eekeekhai ori ekeekhai pahi. Vano, nkaawehaseni moota anrowasaya vano, minuutu mmosa paahi.

179 Ni nwehe moota aris'aya oowuuma murima ala oohaamini, wala ala oowiipaka waamini ni oohaamini. Wulu! Awo t'owuumasa murima, nkawehani, hata moota Satana aavenny'awe Ohoolo wa Masu eekeekhai, khwira, "Yoolempwa!" Eyo ekeekhaii?

Mwaha wa xeeni Satana iireny'awe siiso? Okhala wira owo khaasuwela Masu a ele...Owo aanisuwela wira Masu yaari a okathi yoole, masi owo aanihoverya wira Mutthu ule oowiiyeviha mwaamukhaani aamukhala Masu yaawo. "Nyuwo mwaari Mwaana a Muluku. Miyo koosuwela wira Mwaana a Muluku onimoorwa, okhala wira Awo yaahihimya wira Owo aarowa wira yeeyo. Ni yoolempwa wira, 'Owo onimwaaruma Malaikha Awe wira yookhapeleleni.' Munnona? Mukooniherye miyo! Mkapakani mwiiriirya! Mukihiye kiwooneni Nyuwo mpakaka." Munnona? Munnona?

Moone, ole oohaamini, oowiipaka waamini, namatakiherya. Nkanweheni Yuta eriyari aya, okathi mmosaru, oowiipaka waamini! Munnona? Nwehe, ni vale yaahikhala Masu eekeekhai.

180 Moota akhalans'aya oowuuma murima! "Vano, muhixikhe ethiru iyo. Khekanle hat'etthu mwa Yeeyo. Muhirowe iwo. Iwo onyakula paahi. Khekanle hat'etthu mwa Yeeyo. Yothene eyo etthu yoowuupuwelela paahi. Eyo eri mmuupuweloni mwanyu." Moone, munnoona enihimy'aka? Anoovenya pahi Ohoolo wa Masu n'uhimya.

181 Satana orookela. Ntoko Bibilia sihimmy'awe va mwa Yuta, "Hata Nlaikha nuulupale, okathi naawan'aya ni Satana, niirale, 'Apwiya yoohukhumuni.'" Avaanyihaka Masu Ene yaawo!

Nto va ori nwanani a Kristu, ooreerihiwa, eemenle-ene va ovaanyihaka Masu eekeekhai a nihiku, Yesu Kristu, nto iirale, "Yoolempwa."

182 Nkawehani mahiku ookiserya. "Yaarowa okhala yoolattana yaarow'aya owoototha ale Oothanliwa vaakhanle wira vaaniweryaneya." Oh, wulu! Etthu ale Oothanliwa ahinrowel'aya wootothiwa, moosuwela mwah'aya? Okhala wira awo Masu. Munnona? Vekeekhai ntoko Ekumi eri mmutathaarini, kihimmy'aka okathi ovinre, khivanweryaneya Awo wiikhootta Mmansaya. Moone, Awo ti Masu ni okathi wa Masu. Eyo ekeekhaii.

183 Ntoko Yeremiya, owo aanisuwela. Hata wira Ananiya aahimyani, owo aanisuwela vatthu vaary'awe. Ni eyo vekeekhai ti siiso ntoko Moise iiraly'awe, ni—ni akina a yaawo. Eyo p'iyu, owo aanisuwela, hata wira profeta oowootha aahimyani, yaahikhala Masu a Muluku. Yaahilempwa.

Mwaha wa yeeyo Mikaya aawery'awe wira, "Vaareera, nwehererye paahi moone."

Akhabi khwira, "Miyo kinniwaamini maprofeta aka. Mutthenkeso aka ohaana exariya. Kahokolowa vale ni murettele. . . Mmuhele mutthu ule ottuli wu mukalapooso. Miyo kinoomuvara muteko! Munvahe yolya y'othunku. Mmoomole, muhikhalane opatthana ni yoowo hata vakhani. Kahokolowa vale ni murettele, nnoomuvara muteko mmiravo owo."

<sup>184</sup> Mikaya khwira, "Mwahokolowaru vale nto, Apwiya khalavunle ni miyo." Owo aanisuwela wira aarina SIISO ANIHIMYA T'APWIYA, ni yoowoon'awe yaari yoolikana ni SIISO ANIHIMYA T'APWIYA; kahi mwaha wa okathi mukina, masi ya okathi yoole. Amen! Aleluya! Okathi!

<sup>185</sup> Oowuuma murima, anoovenya n'uvaanyihana ni Nlaikha nuulupale! Yoochimwa, wira, "Alolo anninyakela ni ixapattho sa misomari nipuro Malaikha anoov'aya weetta-vo." Eyo ekeekhaii.

<sup>186</sup> Etthu ale Oothanliwa, Yesu ohiimye wira, ahinrowel'aya wootothiwa, okhala wira awo ti Masu. Awo khakhanle ookhalaka etthu ekina. Awo khakhanle oowiiwaka etthu ekina. Awo khansuwelasa hat'etthu ekina. Eyo ekeekaii.

Muupuwele, Moise kaakuxiwe ni mitakiheryo saya sothene. Aahikuxiwa? Moise iirale, "Vano, nwehererye minuutu mmosa, Farawo. Moosuwela etthu emosa? Apwiya akileenle wira kiire ela, masi, avuwihwe Muluku, miyo kinnoona wira amiravo anyu anniwerya wira etthu emosaru yeeyo. Vano, kinimooleelani enrow'aka wira, kinimwiitakanxa ni nyuwo?" Ah! Eyo kheniweya ntoko profeta a Muluku. Nnari, vekeekhai! Owo aarookhala paahi oolipa ntoko saawery'awe okhala. Owo aanisuwela, vekeekhai, wira Muluku aamukhapelela eyo mwa enamuna emosa, 'okhala Owo aahihimya. "Miyo kinookhala ni nyuwo. Miyo nkinoohiyani."

<sup>187</sup> Owo aanisuwela, tivo owo khiitakanxale n'awo. Oh, nnari. Owo aarookhala paahi n'awo. Owo khaatthuna hata mmosa wa miromolelo saya. Owo aari ni Muluku paahi. Owo khaakuxiwe murima n'itthu sothene awo yaawery'aya wira. Okathi awo yiir'aya etthu emosa. . . Owo aahiruuha itthupo; awo khiruuha itthupo. Owo khuruuha ephome; awo khuruuha ephome. Owo khuruuha itthu sothene; awo khimutakiherya mwa inamuna sothene, erowaka voolikane-ene. Owo khweemela oomaale-ene paahi. Owo aanisuwela oratteene, wira, Muluku aavara muteko.

Munniwa saana vano? [Muthukumano oniira, "Amen."—Mol.] Sinikuxiwa piili ni piili, khukhala xexe? ["Amen."] Khivanthuniwa ovy a vanci-enexa. Vano, vano nyuwo—nyuwo munniwa sana, moone.

188 Mwaha wa xeeni? Awo khanootothiwa n'iyoy, mulipa-oowaamini eekeekhai, awo ti Epyo yoothommwa entthuneya wira ekhale yoolipa nihiku nlo.

189 Paahi, nave-tho, Yesu oohimya ela, "Anci-ene animoorwa nihiku nle, mwa Nsina Naka, ni wira, 'Pwiya, nkiwoomonle axetwani mwa Nsina Nanyu?'" Yesu ohimmye wira, "Mahiku ookiserya, okathi omanle-ene ni ohihimuwa wuulupale onirw'aya, wira anci-ene animoorwa ekilaathi Momweneni." Omwene wa Muluku ori mwa nyuwo.

Anci-ene, nthakathaka nnimoorwa nikilaathi ni Etriku, niire, "Vano, nwehererye minuutu mmosa, Pwiya! Miyo kaahilavula ilavulelo. Kaahikhuwela. Kaahiina muRoohoni. Kaahiwomola axetwani. Kaahilavula ilavulelo. Miyo kaahiira itthu iya sothene."

Owo ohimmye exeeni? Nwehe. "Nyuwu muniira sootakhala, Miyo nkinatoko hata woosuwelani."

190 *Yootakhala* exeenii? Mmukohe mutthu. Eyo "etthu munsuwel'anyu wira muhaana wira, nave khamuniira." Awo annisuwela Masu awo. Awo anniiwa Yaawo. Nyuwu muniwa efiita ela. Nyuwu muniwa Mutthak'ola. Nyuwu munniwoona Apwiya Muluku ohimya siiso; nyuwu munniwoona Awo elipiheryaka, okhaliha ekeekhai. Ni munnisuwela Ela wovooneyaxa ntoko nsuwa nnaary'aya vate, masi munootthikela opharelela mmuromoleloni mw'anyu, opharelela itthu iyo soowoothiwa; nyuwu muniira sootakhala!

"Oh, ayo, kaahikhalana ikampaanya suulupale. Miyo kiihiira *ela*. Miyo kiihiira *ele*."

Khwira, "Mukhume wa Miyo, nyuwu muniira sootakhala, Miyo nkinatoko hata woosuwelani."

191 "Ahe, Eroho Yowarya yookimorela." Miyo nkinihoverya eyo hata vakhani. "Koolavula ilavulelo. Kiihiipa muRoohoni. Miyo kiihiira. . ." Miyo nkinihoverya eyo hata vakhani. Khokhanle hata ohoverya wa yeeyo. Oh, munna, murokor'aka, mukhalelo xeeni!

Ola okathi w'othukumela. Nri vai hiyo? Masu ala anirwa okhala Ekumi vano. Nwehe.

192 Ayo, Owo ohimmye wira awo yaamwiira eyo. Nwehe, "Nyuwu muniira sootakhala." Miyo kihaana Yoolempwa elempwe va. Nkisuwenle tu vatthu vaary'aya. Nkireere okuxa okathi. Kinrowa ophavelasa, minuutu mmosa paahi, koone sinto yaari exeeni. Miyo kihaana—miyo kihaana Matewu 7:21. Nki—nkisuwela vatthu vene. Miyo, imaara sikina miyo nkinlepa etthu n'iyoy, ahe, miyo—miyo kilaleeryaka siisa, miyo—miyo kinooliyala etthu kaahimy'aka mwa Soolempwa. Matewu 7:21.

*Kahiyo othene ole onikiirela, Pwiya, Pwiya, onrowa okela moomweneni wa wirimu; masi ole oniira sintthun'aya Atithi aka ari wirimu.*

*Anci-ene anookiirela nihiku nlo, Pwiya, Pwiya, hiyo khanilaleiye. . .*

Maprofeta, ooreerihwa! Eyo ekeekhai? “Hiyo khinaari maprofeta? Hiyo khinaari ooreerihwa, ale ooreerihwa? Miyo nkilaleiye mwa Nsina Nanyu? Ni mwa Nsina Nanyu nkiwoomonle axetwani?” Munwerya sai wira yeeyo, nave khunakhootta opatisiwa mwa Nsina na Yesu? Munnona? Oh, wulu! Munnoona moota enooth'aya? Elukamaka va mwaha-ene yoole, vano antthikela ottuli. Awo anoorowa elukamaka Masu, vano n'utthikela ottuli. Vano nwehe ela. Hiyo noolakiherya ela, minuutu mmosa paahi.

*Anci-ene anookiirela miyo. . .Pwiya, Pwiya, hiyo khanilaleiye, hiyo khinaari maprofeta? . . .*

Ayo, miyo koohimya eyo mwa Matewu 24:24.

*. . .ni mwa nsina nanyu. . .khaniiwoomonle axetwani?  
ni mwa nsina nanyu mitikiniho sinci- . . .mitikiniho  
sinci-ene?*

*Vano miyo kinimwaahimeerya awo, miyo nikiinatoko  
woosuwelani: mukhume wa miyo, nyuwo muniira  
sootakhala.*

“Okathi Eyo yaaheliw'aya ohoolo wanyu wene ni nyuwo mwaahoono Eyo, ni mwaahoono Eyo yeettaka, mwaahoono wira Eyo yaari Masu; ni mwaha wa miromolelo sanyu, nyuwo mwaapharelenle seiyo. Miyo nikiinatoko hata woosuwelani. Khenikicala axwetani akavi muwoomunly'anyu, imaara kavi mwiiraly'anyu *ela n'ile*; miyo nkaasuwela hat'etthu ya nyuwo.”

Palaamu iirale, “Miyo kaahilaleerya oratteene, mwa Nsina Nanyu. Khwiiraneya.”

<sup>193</sup> “Eyo ekeekhai tu, masi, vaphinrenry'aya Masu, nyuwo mwaarookhootta Awo.”

Oh, munna, munnoona nipuro nnoototha? Kahi “profeta,” vekeekhai; masi ni Masu, Masu eekeekhai, Masu oolipiheriwa owooniheriwa. “Nyuwo muniira sootakhala!”

<sup>194</sup> Onneererya, Satana okathi wothene oneereryaka otakiherya Masu eekeekhai. Hiyo noosuwela eyo, khaninsuwela?

<sup>195</sup> Nwehe, anoophiya mpakha vamukaanoni n'uhiya. Nkawehani va, owo oohimya, mwa aHeperi kapiitulu 6, (Vano, hiyo naamusoma okathi ovinre, miyo kaahooleelani, “wira naamutthikela ohimya yaala,” ni nnimwiira minuutu miili sinttharelana.), owo ohimmye wira:



...masi *miwa ni* malaxi oonanara...yaawo  
*anihalela okhoottiwa; emalelo aya opahiwa.*  
 (Mukaano!)

...nyuwo *mwaalawinhe*...yoovaha ya wirimu,...

“Mwaalawinhe,” moolumo makina, nyuwo moonale Yeeyo! Khivanweryaneya [Munna Branham onlumanyiha iyano sawe—Mol.] olawiha Yeeyo ni eyano. Masi nyuwo muhoona Eyo, ni mwaahisuwela wira Eyo yaari Ekeekhai. Nyuwo mwaahisuwela wira Eyo yaari Ekeekhai. “Mwaalawinhe yoovaha ya Wirimu.”

...ni *yiirale mpantte wa Eroho Yowarya*, okathi Eyo yookhuruwenly’ayani,

...*yaalawinhe Masu ooreera a Muluku*,...

“Mwaalawinhe,” nyuwo mwaahoonale wira Awo yaari eekeekhai. “Ni Eroho Yowarya yookhuruwelakani,” nthakathaka mmatta.

...vano nto khuhiya *waamini*,...

“Mmukhoottaka Kristu ene yoowo ooreerinheni, khuwiihanani, ni kuhela mureeriho owo mwa nyuwo.”

...*khuwo-tho mukuttho mukina wa itampi*, wa yeeyo.

Ti yoohileveleleya! “Khivanweryaneya w’ale atonko ophiyererya osuwela Ekeekhai.”

*Tthiri khivanweryaneya w’ale yaari...yiirale mpantte wa Eroho Yowarya*,

Yaahimorela nthakathaka, moone, “Epacenrye ni Yesu, ni, ‘Pwiya, miyo kinootthara,’” masi vaphiyenry’anyu Masu, muroothikela ottuli. “Yiirale mpantte wa Eroho Yowarya, hata khulawiha, wala khoona Masu Ene owooniheriwa.” Vano nto khunahiya Yaawo, “Ti voohiweryaneya mara awo okhalakhala yoonaka Yaawo wala orwa wa Yaawo.”

Eyo ti SIISO ENIHIMYA YOOLEMPWA. Vano, nyuwo... “Erimu n’ilapo ya vathi sinoomala, masi Awo khammala.” Munnona? “Voohiweryaneya mara.” Bibilia ohimnye siiso, ni Eroho ennikhalela onamoona yeeyo.

<sup>196</sup> Nwehe, mukihiye koovaheni nlikanyiho nimosale naamukhaani. Nkaaweheni atthu ale yaakhumme yeettihiwaka ni oprofeta wa Moise, yaakhumme mmutthenkesoni mme, yaakhumme mwa sothene, yeettihiwaka ni oprofeta, yoonale miteko suulupale ni mitikiniho, n’itthu ntoko seiyo, vano khuphiya mpakha mmukaanoni w’okela.

Vano, Lee, vo nnoorwa “nsina nanyu muLiivuruni.” Munnona? Eyo moolakihireliwa. Ni nyuwo muhikhanle va, ni mo—moolikariwani wa telefooni, ti Totori Lee Vayle okilaanthi va. Owo onoolepa oratteene eliivuru ila ya Okathi Mithanu na Miili wa Ekereja. Ni mulattu waakhumelenle, ahiso mwaha,

wa “nsina nanyu okumihiwa-mo muLiivuruni mw’Ekumi ya Mwaapwittipwitthi.” Moone, eyo ennaatikiniha arumeyi anci-ene. Masi nwehererye mpakha mphwanye eliivuru ene, munoosuwela sana wakhalaru paahi Waarya mwa nyuwo. Munnona?

<sup>197</sup> Nwehe, vano, nyuwo munoorukunxa muru anyu ni hata khamunrowa oweha Nlo mwaahithune woona Nenlo. Ntoko ame aka yaahimyak’aya, “Khivanweryaneya okumiha ephome munampaaphini, ’okhala wira khimukhanle ephome.”

<sup>198</sup> Nwehe, Waarya ohaana orwa; kahi mw’epiphini. Waarya onoorwa mw’epiphini, vano epiphi khonsuwela Owo. Nkawahani vano ooreerihiwa nihiku nla.

Ntoko Moise aakuminh’awe aana ale a Isarayeli; n’awo khwiiwa khukhala othene ootikinihiwa ni muttetthe ole muulupale osulu iwe. Vano, Isarayeli aari eriyari ya miromolelo. Owo khaarina hata elapo, khaarina hata owaani. Owo aarowa owaani.

Hiyo khanrina hata ekereja. Hiyo khanhiyo. . . Hiyo ni—hiyo ninrowa Ekereja emosa, Ekereja ya Muulupale, Ekereja eri Moovuwani; kahi ekereja eri elapo ya vathi, ni mutthu. Ekereja eri Moovuwani, ale yihaneliwe okhuma, ootthomeliwa Ekumi Ehinimala, moone, erowaka Owanny’aya.

Nto okathi aphyians’aya nipuro wira elapuwele epantte ekina, awo yaaroohoverya Masu, khutthika. Vaamanly’awe Yoxuwa ni Kalebi n’akina orowa khuruuha nivara na iwuuva, wira awooniherye awo wira muttetthe ene waari weiwe, Masu a natiri a Muluku, “Owo muttetthe wooreera, eleethi ni oravo.” Ni yaahiruuhasa ehokolowaka, epantte ela nno, wira ewooniherye awo. Vano awo khulawiha, khwira, “Oh, oh, hiyo khaninwerya wira, nnakhala vo.”

Exeeni yaakhumelenle? Awo yaahipweteyasa mothakoni. Awo yaahanle memme mwene khwiithokiha, khukhwaasa, khula mmosa a yaawo, masi ale yaarowanse epantte ekina kuhokoloxa, Yoxuwa ni Kalebi; Moise aarookuxiwa khuroihiwa osulu. Nthoonyeryo na owehererya wa Ekereja; ni ohihimuwa wa Waataana wa Khalayi, Waataana wa Naanaano; ni Erutthu yookuxiwa. Munoono sootthaaru vo? Sihaana okhala tthaaru iyo muliinyani, moone, vano, mwa mulipa-oowaamini ni oohaamini. Munnona?

<sup>199</sup> Nwehe moota yaary’aya “voomalela.” Muupuwele, Muluku khonaleveleleke etampi ile. Vano awo anrowa okela sai? Saari miiwa, opacerya wene, sinikhala miiwa wookiseryani. Ale ootthommwa paahi animoona Eyo.

<sup>200</sup> Nwehe oratteene vano. Vekeekhai ntoko mahiku a Martin Oowaarya, vakhani ohinatthi Okathi w’Epiphi; mwamulopwana mmosa ooreera murima. Akavi atonko osoma soolepa sa Martin Oowaarya? Anci-ene a nyuwo moosoma. Hiyo naahirowa okuxa

solepa sa Martin Oowaarya; phaatiri khwira, “Masi owo khokhalihiwe santu.” Vekeekhai, khokhalihiwe; kahi n’awo, masi okhalihiwe ni Muluku. Eroho Yowarya enihimenrye wira nimuhele mme okathi ule wa neeraru wa ekereja. Munnona?

<sup>201</sup> Nkawehani mwaamulopwana xeeni ooreera murima owo aary’awe; oowiihaniwa, ootthommwa. Axitithi awe, apakawu. Atithi awe, natoropa. Owo aahaana otthara nihimo nawe, okhala natoropa. Vano, vakhanly’awe, ni okathi wothene aanaamini wira aahikhala Muluku nipuro nlo; mutthu a mutakhwani, ni aaniwerya omoona Muluku. Nihiku nimosa owo aahivira epooma emosa, nto aahikhala mutokweene mmosa naweettasa ommaathale-ene vale, akhwaaka, omuvekelaka mutthu. . . Owo aarooriiriwa ohiy’ule. “Oh,” khwira, “mukivahe etthu wira kiikhuneele; kinimookhwa ohiy’ula.”

<sup>202</sup> Khaavo aatthuna wira eyo. Nto Martin khususela epantte emosa khimuweha okathi vakhani. Khaavo aatthuna wira. Owo aarina ekhasako emosa paahi. Owo mwaneene, aamuriiriwa, owo aari vamutekoni, owo aamu—owo aamuvan’he-ru ekhasako ele. Vano owo khuupuwela, “Oowaili ahu nnookhala ekumi kakawanaru n’uwo.” Vano owo khikuxa ekhasako awe, khukawanya eriyari ni xoowa awe, khimuvitikelela mutokweene naweettasa memmo. Owo khwiivitikelela ekhasako awe.

Atthu othene khwira, “Nkanweheni mulipa-oowehaweha xeeni ula ootheiha. Nkanweheni natoropa xeeni ula ootheiha, oowiivitikelela ekhasako nuusu!”

<sup>203</sup> Ohiyu woottharelana, okathi waahaavar’awe muteko khummaathi voolilini vawe, owo khuvenya. Khuweha, eemenle-ne okatthi iwe, nto vale aaphwanyaneya Yesu Kristu iivitikelenle-ene ekapatti ile y’ekuwo owo aamuhelenly’awe ole. Owo aahisuwela vaavale vene, “Eniwiirel’anyu axikhaani Aka, munikiirela Yoomi, ooreerihwa Aka,” ommaathale-ene vale.

Owo aari murumeyi muulupale a Muluku. Ekereja yaanimutheya, yaanimulupattha, yaanimoomola, ni itthu sothene sikina, masi owo aari profeta a Muluku. Etthu aahimy’awe yaaniiraneya. Yaahikhala anci-ene yaamwaamini uwo okathi ule, nave.

<sup>204</sup> Kintthuna kiwooniheryeni moota xetwani okhanly’awe oowoottha. Nihiku nimosa owo aarookilaathi musaala mw’awe m’osoma. Vo khurwa nlaikha nimosa noowerya, niwanre-ene nleha mmuruni mw’aya, niwanre-ene ixapattho sa eweero, iphapo sa eweero sirukurenrye-ene ikuwo sawe, nto khwira, “Martin, munnikusuwela?” Owo khwira, “Miyu ka Pwiy’anyu ni Moopoli. Miyu ti Ole owooponleni. Mukikokhorele, Martin.” Masi profeta ole, osuwelaka wira yaahikhala etthu yaamukhaani yootikiniha vale, owo khutthikela amuwehaka. Owo khwira, “Martin, Miyu ka Moopoli anyu, Yesu Kristu. Mukikokhorele! Khamunkisuwela, Martin?”

205 Martin khutthikela omuwehaka, Yoolempwa eviraka mmuruni mw'awe. Owo khwira, "Satana, khumani murowe ottaiwene wa miyo." Owo khwira, "Nyuwo murina nleha mmuruni. Vano Masu a Muluku anihimya wira 'masantu Awe anoomuwariwa Owo nleha' woomalelani w'okathi."

Eyo khiyaarowa okhala ecampo ya Pentekosite? Nkawehani Masu ale, munna. Ti vaavo vanliv'aya.

206 Nihiku nimosa, tho, omosteero, awo yaahikhalana santu mmosa a khalayi wu, nikhuru nimosa n'amiravo mamonxe. Aahikhala mmosa a yaawo oonyoonyiha vakhani. Nkawehani ila, va nri nli—nlikanyiho nimosa nooreera olelo. Owo aatthuna okhala ethu emosa oowaavikana ale akina. Owo aatthuna wiisooniherya mmansawe, okhulupale, ethu yuulupale, ethu yooreerexa, othene oosareya ekhalelo yuulupale, nyuwo moosuwela, ethu yuulupalexa. Owo aahaana okhala a muthinto wooreera. Okathi wothene aatthuna wira axinna akina ehi. . . Nyuwo moosuwela, owo aahaana okhala oovirikana. Munnona? Owo, hata wira yaari exeeni, owo aari oowiisunnuwa. Owo t'ari nikhomo nimosa ophareya. Khaavo aawerya omukwannya. Vano nkawehani ethu yaakhumelenle. Owo aahaana okhalana ethu yuulupale. Owo aahaana wiilikanyiha n'a—n'athu oottittimiheya vaalupale. Munnikitthara? Munnona? Vano, owo khwira, owo khulaleerya. Owo khwira, "Apwiya aakikhaliha profeta, nave. Miyo ka profetaa."

Vano, aari profeta mmosa oosuweliwa mulaponi, nto owo aari Martin Oowaarya; owo aayariwe profeta.

207 Masi mwammirav'ola khwira, mmirav'ola khwira, monxe oophiyaka miyaakha miloko miili ni mithanu, owo khwira, "Apwiya aakikhaliha profeta, ni kinoorowa owooniheryani." Khwira, "Ohiy'ula Apwiya anrowa okivaha nlaya, nuulupale nooreera, anookiwariha, nlaya nooteela, ni kinookilaathi eriyari anyu. Nto nyuwo othene munimoorwa wa miyo, moone, vano nyuwo munoorummwa ni miyo."

208 Vano nlikanyihe yeeyo olelo, moone, "Miyo kinookhala mukhulupale a mutthenkeso. Miyo kinimookhapelelani nyuwo, nyuwo mamonxe akina."

Nto vekeekhai, "Ohiy'ule, muthuko khupatta mpaani," siiso sinihimya ti soolepa sa Martin Oowaarya. Musome. Ni ti yeekeekhai. Owo wahalaa. Vano muthuko khupatta, nto othene akina yaamuweha, nto va onoorwa. . . Owo aawanre nlaya nooteela, eemenle-ene eriyari aya. Owo khwira, "Munnoona ele koohimenry'akani?" Masi eyo ti yoovirikana ni Masu.

209 Nto okathi omurowenly'awe mukhulupale mutokweene a okoleexiyu, owo khweetta nno ni nno vakhani, khwira, "Mwan'aka, eyo khenikhala ntoko yooloka." Owo khwira, "Eri enamuna emosa paahi." Ela eri va! "Eri enamuna emosa paahi ya hiyo osuwela. Yaakhala ntoko yuulupalexa." Mmiravo,

aPentekosite yaamwiira evanre-ene yeeyo, mutathaari, ecipwitta, mukhoyi, nimeso, ni itthu sothene sikina! Owo khwira, “Mwiiriirya khino onikhala ntoko wooloka, masi khonikhala saana ntoko Masu. Vano, hiyo nookhalana mutthu ene, profeta ooreerhiwa, onihaniwa Martin. Rwani, mphiyе wa yoowo.”

Mmiravo khwira, “Nnari, nnari! Martin khorina naata n’ila.”

<sup>210</sup> Nto khwira, “Nyuwo munoorowa, khula enamuna.” Vano khuvariwa moonо, wira oroihiwe wa Martin, vano nlaya nene khimulakaseya.

<sup>211</sup> Moone, “Yaamuwootha ale Oothanliwa vaakhanle wira vaaniweryaneya.” Moone, awo annaasuwela. Yesu ohimye wira, “Ipwittipwitthi Saka sinnisuwela Masu Aka.”

“Oh,” nyuwo muniira, “sinniwa “Nsui” Naka.”

Awo Masu Awe. “Mutthu khonkhala mukumi ni yolya paahi, masi ni Masu othene.” Munnona? Ole ootthommwa onnisuwela ela. “Nuulumo nootikiniha, wala nsu nootikiniha, awo khandtharasa.”

Ti siiso yaary’aya n’atthu ale ottuli wu; awo khiyaatthunanse othara. Awo yaanisuwelasa wira Martin aari weiwe, profeta a okathi ule, oosuwanyeihiwa ni Muluku mwa Masu, yaanisuwelasa Masu. Vano mulopwan’ole khaatthuna okhala ohoolo wa Yaawo.

<sup>212</sup> Owo oohimya-tho wira, “Vari Murutthu,” wala Masu, “vaavo, mwa okathi, t’anthukuman’aya axawawe.” Vano owo ti Mate- . . . Nyuwo muntthuna olepa eyo, owo ti Matewu 24:28. Vakhani tu ehinatthi, Matewu 24:24; iversiikulu xexe vathi vaya, moone, mwattuna vale olepa. “Vari Murutthu,” vari Emana, vari Masu, “vaavo t’anthukuman’aya axawawe.”

<sup>213</sup> Vano kihaana waakuva. Kirooweha vasulu vale khoona ewoora xeeni. . . Ewoo—ewoora yanamuloko ni piili ni minuutu mithanu na milli wala mithanu na miraru. Kinimwaakuva saana, ahiso nnoomaliha olelo ohiyu, khula emosa nyuwo muntthun’anyu. Voosiisu yoola wala ohiyu? Hm? Akavi arina yo orowa owaani olelo numala muteko, munoonihe ntata nanyu, moone. Oh, wulu, vanreerela nikelele ohoolo!

Kileveleliwe mwaha wowaapisiha atthu iwo mutelefoonini siiso, masi kinimwaakuva. Ela ti ya feita sana ovikana musurukhu anyu. Kookupali wira ti ya feita, wa miyo, moone. Musurukhu anyu onoopweteya. Ela nnari; Ala ti Masu. Munnona?

<sup>214</sup> “Vari Murutthu, vaavo t’anthukuman’aya axawawe.” Vari Murutthu, vari e—e—enama yoowiwiwa, vaavo t’anthukuman’aya axawawe. Vari Enama ekithi, Masu a okathi, vaavo anoothukumana—vo axawawe.

Masi vanimal'aya wuntta, vano amarepo anoothukumanela yeeyo. Ayo. Munnoona etthu enihimy'aka? Enama yiiwiwa vale, va anoorwa t'axawawe; masi vanihal'aya vale, khuntta, vano va anoorwa t'amarepo. Axawawe khankhalasa nnaata. Munnona?

Yesu ohimnye wira, "Vari Murutthu," vanimorela Emana, ohiyu Emana enimor'aya esya, "vaaavo axawawe anoothukumanela Yeeyo." Eyo ti Emana ya nihiku. Munnona? Nwehe.

<sup>215</sup> Masi vanimal'aya wuntta, miyuuku sinookela-mo, nto va anoorwa t'amarepo. Awo khanwerya woona wunkha mpakha eyo yintte. Khivanxankiha Yesu aavenyaly'awe vale khwira, "Yerusalemu, nyuwo mwaamuvonyakasa ni maluku khula profeta!" Nkawehani eyiihanelo eyo ya mutthu, moone, "Yerusalemu, Yerusalemu, imaara kavi Miyo ki..." Owo aari Pani? "Imaara sinci-ene koothukumanny'akani ntoko mwalyakhu onaaphuramwel'awe axaan'awe, nyuwo mwaamuvonya khula profeta Miyo kitonko aka wooveleeliheryani," ekerej'ele yuulupale, Yerusalemu.

<sup>216</sup> Yerusalemu ohikhanle elapo ela ya vathi, "masi hiyo n'atthu a oYerusalemu a Osulu," weiwo anikhuma Masu, wa otthommwa, moone. Kahi Yerusalemu ule a khalayi onipweteya; Yerusalemu musya ohinipweteya. Kahi Yerusalemu a khalayi, otekiwe ni mutthu; masi Yerusalemu Musya, otekiwe ni Muluku, moone, Masu osulu wu vano ekhalaka owooniheriwa. "Owannyaya Atithi Aka khareere-wo mapuro ookhala. Miyo kinoorowa koolokiheryeni yaawo," Mpattuxa opakaka iphiro sa eweero, ni sikina. Owo ti Ole ohinipweteya.

<sup>217</sup> "Yerusalemu, Yerusalemu, imaara sinci-ene Miyo," okhuma wopaceryani w'okathi; kahi Mutthu a neeraru, mutthu mukina, masi, "Miyo koothukumanny'akani ntoko mwalyakhu onaaphuramwel'awe axaan'awe, masi nyuwo khuhitthuna. Masi vano okathi anyu woophiya." Munnona?

"Vari Murutthu, t'anthukuman'aya axawawe." Masi vanimal'aya wuntta murutthu ene, vano amarepo anoothukumana. Munnona?

<sup>218</sup> Nwehe. Moise, khonaavaheke aana a Muluku... Moise aari xawawe, ni owo khonaavaheke aana a Muluku mivithe sa Nowe. Munnona? Owo aarina Masu a Muluku a naanaano. "Apwiya Muluku aakikumanana mothakoni, ni aalipiherya Masu Aya, ni akirumme nno wira kiwiihaneni mukhumele ota." Vano khikhumelela anamatakiherya, etakiheryasaka. Munnona? Masi owo aarina Masu a okathi.

Okhala wira, Muluku aahimuhimeerya Abrahamu, ole aarina natiri, "Osuulu anyu onoorowa okhala elapo ehikhanle yawaya, miyaakha imiya xexe, masi Miyo kinimwaaxekurya kinimwaakumiha ni ntata na ikuru."

219 Moise khwira, “Vano, Apwiya Muluku anoolavula ni miyo ni anookooniha, ni aakileela etthu yo wira, ni miyo kinimooleelani.” Khwira, “‘MIYO KOOKHALA’ t’okirumme.”

“MIYO KOOKHALA!” Kahi “Miyo kaakhala, wala onrowa okhala.” “MIYO KOOKHALA,” naanaano, Masu vano. Kahi Masu yaari, Masu anrowa orwa; Masu ari vano. Munnona? Munniiwa? “MIYO KOOKHALA!” “MIYO KOOKHALA” ti Masu. “Wopaceryani naari Nsu, nto Nsu naari ni Muluku.” Eyo ekeekhaii? “MIYO KOOKHALA.” “Muluku orookiruma ntoko profeta Awe, wira olipiherye wira ela ekeekhaii. Miyo ka eyaakhulelo ya Masu ala, orookileela wira kirwe nno kiire yeela.”

220 Vano viiraly’awe, Farawo khwira, “Ahe, hiyo nookhalana amiravo anci-ene munikhuruni mw’ahu, nave,” anamatakiherya.

Yesu ohimmye wira, “Vano, eyo enorowa otthikela-tho mahiku ookiserya,” moone, ehimyaka etthu emosaru. Nkanweheni ole onipacerya orwa. Nkanweheni ole aakhanle ni Masu. Ti yeeyo. Ti siiso ensuweliw’aya.

221 Vano, moone, hiyo ninniweha, Moise khonaavaheke ele yaari y’okathi wa Nowe, “Hiyo nnooteka ekalawa vano, ’okhala wira awo ti Masu, moosuwela. Nowe aatenke ekalawa nihiku nimosa.” Nnari, amarepo yaalya memmo. Nnari. Nnari.

222 Ala ti Masu a natiri. Nwehe, maana mutthak’awe owo aakhenle wa Muluku, owo aarina Masu a Muluku ootthommwa ooloka a okathi ule.

Hata Yesu khaavahanse nvithe wa Moise. Moise aarina Masu a okathi ule, masi Moise aari profeta. Va ori Muluku Mwaneene, moone, Owo khonaavaheke nvithe wa Moise—wa Moise.

Masi nkaaweheni paahi amarepo iwe mmutthenkesoni mme, yaamuphweeleya ni yoowo. “Hiyo noosuwela! Hiyo nookhalana Moise! Khanikhanle ookhala ni Nyuwo.”

223 Owo khwira, “Mwaamusuwenle Moise, mwaamukisuwela Miyo, okhala wira Moise oolavula mwaha wa Miyo.” Munnona?

“Vari Murutthu, t’anthukuman’aya axawawe.” Axawawe! Enama yiiviwe naanaano ya Masu, Masu ahuwiwe khuneneva, khukhalihwiwa owooniheriwa khukaweliwa ntoko Yolya y’anamwane.

Vano, murutthu wa khalayi ori vale miyaakha imiya imiya sene, onookhala vaavo.

Vamosaru vano! Lutero aarina mutthaka w’orukunuxa murima; masi, nyuwo nikhuru n’amarepo maLuterano! aPatista yaahikhalana mutthaka; masi, nyuwo amarepo aPatista! Munnona? aPentekosite yaahikhalana mutthaka; ephiyaka vakhiviru vano, amarepo aPentekosite!

“Masi vari Murutthu, vaavo t’anthukuman’aya axawawe.”

224 Muupuwele, khivaaweryaneya omulyiha Luterano, mahiku ale ottuli wu (vano vanniweryaneya), enama y’Ekatolika yoowunta. Nnari, mulopwana. Owo aarina enama ekithi. Owo waari okathi ule wa ekereja.

Khivaaweryaneya omulyiha mMetotista, ni mutthaka wa Lutero. Oh, nnari, owo khaatthuna enama ele yoosukumana. Yaahintta. Moone, Ekumi yaahikhuma-mo khukela mw’etthu ekina. Eyo ti mutathi yoole wa khalayi okhwiiye, ottuli wu. Ekumi enimweetta erowaka.

Hata khivanweryaneya omulyiha Mwaakameliwa a Yesu Kristu ePentekosite. Nnari, mano! Mitthenkeso sowuuperiwa ni miyuuku; hat’etthu yowiiiriwa! Nnari, nnari!

Maana natiri t’ula, “Vano nihiku nle nuulupale ni noowoopiha nihinatthi ophiya, Miyo kinimoorumihelani profeta Eliya. Owo onohokoloxerya mirima s’ana othikela Waamini w’axitiithia aya tho.” “Anatiri ala othene yaahimmwe mBibiliani, Miyo kinimwiira, nto vaavo axawawe anoothukumana.” “Othene ale Atithi akivanh’aya animoorwa wa Miyo.” Munnona?

225 Yesu khonalawiheke eyo. Masi okathi Yesu orwiiy’awe, Owo aaphwannye makoto ale a amarepo, “Hiyo nihaana Moise n’ikano.” Munnona? Ahe, eyo yaari yolya yooreera ottuli wu okathi yiiv’aya khuvahiwa awo. Moone, eyo yaari saana nto.

Masi ela t’ile aahimeriw’awe Moise, mwaneene, iivale mukuttho, khwira, “Apwiya Muluku anyu anoomuthanla eriyari anyu, w’axinn’inyu, Profeta. Enimwiiraneya, wira ole ohinrowa omuwarelela Profeta yoowo n’ile Owo onihimiy’awe, onookumihiwa eriyari y’atthu.” Ni yaari siiso.

226 Nkawehani moota itthu soophiyaka imiya thanu na mosa soohiyana-hiyana saahimmwe ni maprofeta saamaliheriw’aya vaavale vale, sa Waataana wa Khalayi, mwa Yesu Kristu. “Awo aathorola matata Aka ni inawo Saka.” Soophiyaka, miyo kinniliyala itthu kavi saamaliheriwe muhina wa iwoora thanu na piili wala thanu na tthaaru sookiserya s’ekumi Awe, sothene saahimmy’aya maprofeta, voolikane-ene.

227 Vaakhanle wira kaamulaleerya olelo wira etthu khata enimwiiraneya muhina mwa mwaakha mmosa okhuma vano, khino kaamukhalana—kaamukhalana ipursento miloko miili vooweryaneya wira ekhumelele, enakhaleru yooloka wala yoovonyeya. Nto vaakhanle wira kaamulopola wira eyo yaamwiiraneya, nave khuhihimya liini, kirina epursento yaamukhaani. Vaakhanle wira kaamulopola okathi yaarow’aya wiiraneya, enikivaha oweryaneya vakhani. Vaakhanle wira kaamulopola nipuro yaarow’aya wiiraneya, nlelo enikivaha oweryaneya vakhani. Vaakhanle wira kaamulopola...mwaha w’ani yaarow’aya okhala, nto nlelo



kirina oweryaneya woophiyaka epantte ikonto imiya sene soovukuwa vookhalakhala eyo ekhumelelaka, yaahikhale-ru ekeekhai.

Ni khula Nuulumo, aleluya, naalempwe na Mesiya ole, naahimaliheriwa voolikane-ene. Hata mpakha nihiku nimosa, Owo asomaka Soolempwa, aaheemela varyari va yoohimya, khwira, “Erooho ya Muluku eri mwa Miyo wira kaalaleerye Ehapari yooreera, ni waataphula a . . .” Nto khweemela vaavo vene varyari va yoohimya, okhala wira ele ehanle wa yeeyo ti y’Orwa Wawe wa neili. Amen! “Erimu n’ilapo ya vathi sinoomala; Masu Aka khammala.” Munnona?

<sup>228</sup> Owo aari Masu nto, yaawo yaalyiha nto. Moise aahimenrye Ekeekhai; masi, moone, awo khula okathi ampaka muromolelo wa yeeyo, wira amarepo e . . .

Aahala vakhani Yaawo vamanly’aya axawawe olya khurwasa owaani. Vano awo anliplelase woona etthu ekina. “Masu,” awo aniira, “va vantthuneya wira Awo erwe. Hiyo nikhuunre ethhove nsana; nnookhuura epwittipwitthi meelo.” Munnoon a enihimya’aka? “Yookhala ethhove yookhwa vale ya khalayi, eniipelana, masi hiyo nookhalana epwittipwitthi enoorwa olelo. Eri vai yeeyo?” Munnoon a enihimya’aka? Yolya ya Malaikha! Atthu yaanilya emana nihiku nimosa, awo yatthunaru osukerya mmeeloni mwaya, eyo yaakhala yoowunta. Nyuwo khamunoon a iyooniheryo sothene, moota sinlikan’aya? Vamosaru vano!

<sup>229</sup> Nwehe, amarepo mahiku a Yesu yaaniwoomola axetwani nave; ooreerihiwa mwa murutthu wa khalayi. Eyo ekeekhai? Awo yaawoomola axetwani. Yesu ohimmye siiso.

Ni muupuwele, awo yaahikhalana maprofeta mahiku ale. Kaifa, mukhulupale a anamukottho, aahilaleerya. Akavi anuwela yeeyo? Kaifa aahilaleerya. Nkawehani nipuro na nthakathaka mmatta; ninnaanishiwa ni mureeriho mmosaru. Mwaha wa xeeni Bibilia ohimmy’awe wira owo aahilaleerya? “Okhala wira owo aari mukhulupale a anamukuttho mwaakh’ole.” Mwaapalame oohiloka onikhuura enama yoowunta, nthakathaka ni mwiiwa, okilanthi-ene eriyari y’Etriku; masi Erooho yaari mwa yoowo, Erooho Yowarya yooloka ya Muluku. Erooho Yowarya ya Muluku yaari mwa yoowo, wira olaleerye, ohimye s’eprofeta, ni ohimya khalayi-ene yaarowa wiiraneya; nave khukhootta ni khukhomela Masu ene yaawo oolipihiriwa a okathi.

Oh, ikharari, munna! Okathi xeeni tho orin’ahu wo ohimya itthu iya, moone, ankhitho mwa Yoolempwa? Miyo kinimwaakuva. Kookhalana makukhu oophiyaka muloko va, a Soolempwa, sooniheryaka itthu sothene. “Nsuwa mwa naxariya ni ootakhala, vamosaru.”

<sup>230</sup> Yesu oohimya, wira ooniherye ela. “Miyo kaawoomolaka axetwani ni ekatha ya Muluku, an’inyu aniwoomola n’ixeeni?” Vano, awo yaawoomola axetwani. Awo yaamulaleerya. Eyo ekeekhai? Masi awo khiyaamusuwenle Owo okhala Masu a okathi, (mwaha wa xeeni?) okhala wira Owo khaapatthanne n’awo.

Vano mmukuxe Matewu 24:24, “aKristu oowootha,” ooreerihwi, “anookhumelela, ni anookhala maprofeta oowootha elaleeryaka,” moone, “ni anoowoototha ale Oothanliwa vaakhanle wira vaaniweryaneya.” Munniiwa sana vano?

<sup>231</sup> Nkaaweheni aana. “N’ani aana ani. . . Miyo kaawoomolaka axetwani ni Masu a Muluku,” yeeyo, Owo aary’awe Masu a Muluku, “an’inyu a mmuromoleloni aniwoomola n’ixeeni?” Vano, ni Muluku paahi t’onwerya omoomola xetwani, hiyo ninnisuwela eyo, Muluku paahi. Maana, mutthu a ikuru ohaana okhalexha a ikuru omuvikana ole onvolowa mpaani mw’awe. Awo yaahikhalana owerya wo wira eyo.

Nyuwo moosuwela, mwa Wiisuupulula mme, ohimnye wira owo. . . nwanani a Kristu uwo okhumelenle mahiku ookiserya, “Aahipaka ithoonyeryo ni mitikiniho, mpakha hata owoototha ale yaakhala elapo ya vathi, ni khumoototha khula mmosa a yaawo, aKristu ni othene, yaawo masin’aya yahaalempwe muLiivuruni mw’Ekumi ya Mwaapwittipwitthi,” enimwaakhula Matewu 24:24, “yaale masin’aya yahaalempwe muLiivuruni mw’Ekumi ya Mwaapwittipwitthi okhuma wopatuxiwani w’olumwenku.”

Ekumi iyo yaari mmutatharini na yoole—na murarance yoole wooloka, waawenle mwa miri iye sothene ni itthu sothene sikina, khuvira itrowaka khuhela muhokorokho vasulu va mwiri, vasulu va ittopanyeryo sothene sa miromolelo ni irintta. Munniiwa sana? Miyo kinimwaakuva. Mutthu a ikuru. . .

<sup>232</sup> Nkamuupuweleni Davidi vano, owo aari a nneema, naxariya, otthunaka onvarela muteko Muluku, nave khaarummwe wira ovare.

“Awo,” ooreerihwi; masi Yesu ohimnye wira, “Awo anoovaha ntoko Mwiixuttiho otaphulela (wa Soolempwa) w’atthu,” moone, kahi Masu a Muluku, kahi Masu Awe oolipiheriwa; emwiixuttihaka Kristu a ehantisi, moone, etthu yaakhanle.

Ni Bibilia ohimnye wira, “Owo ti.” “MIYO KOOKHALA,” kahi “Miyo kaakhanle wala kinrowa okhala.” “MIYO KOOKHALA, naanaano va.” Owo ti Masu yaale ankhala okhuma wopaceryani mpakha va.

Owo aari, wopaceryani, Owo aari wo—Owo aari mma—mmataakhuruni; Owo aari mmutathini; Owo aari munikatampheni; masi vano Owo ori mw’Erukuni.

233 Vano, nyuwo munitthikela ottuli ni weererya-tho okhala mukumi? Ankhi Ekumi iyo yaatthikenle-ru vathi, nyuwo munuupuwela wira Ekumi iyo (yoohiwa) yaamukhalakhala elavulaka, yaamutthikela nikatamphe nle na khalayi nuumme-ene, yaamukhalakhala etthikaka n'ukhala-tho meemo? Eyo khentthika. "Tthiri khinweryaneya w'ale yaatonko omwaleeliwa," khuhikelela ohoolo ni Masu okathi yaaphiyerenry'aya okhumelela, "awo ahookhwa, voohiromela; vano miiwa ni malaxi oonanara otakhaliwa waya woophiya, emalelo aya opahiwa." Eyo ekeekhahi?

Vano kinimwaakuva voowaakuvexa ntoko sinwery'aka.

234 Nwehe Soolempwa vano. Emwiixuttihaka Muluku a ehantisi, moone, ntoko awo aneerery'aya okhala, ntoko khalayi, "Ahe, Wesley ohimnye *elexe n'ilexe*." Wala, "*Lexe ni lexe* ohimnye *elexe n'ilexe*." Nyuwo munikhootta Masu oolaiheriwa a nihiku, Emana ekhanle yoosuveliwa voowooneya ya nihiku. Awo aneererya ohela iviinyu saya sa khalayi Luterano, Patista, y'ePentekosite mukhalini mw'ahu isya. Khenvar'etthu. Nto Eviinyu ahu esya, mukhalini mw'aya sa khalayi, khenvar'etthu. Awo yeererya ohela Eviinyu ila esya mmuromoleloni, lololo aya onimooniheriwa. Awo khanwerya wira eyo. Eyo enoophutula.

235 "Vano, munna, miyo kihoona Masu a Muluku, voolikane-ene ni Masu!"

"Vano, nkawehani va, totori, vaari wira...Hiyo—hiyo khanikhanle ookhalana Eyo." Ned, miyo kinoona wira nyuwo munnikhalanaka yeeyo vakhani mahiku ala. "Hiyo, hiyo khanikhanle ookupali Iyo va vano. Miyo—miyo kinnamputi nyuwo khino mukelele ohoolo pahi." Nyuwo moosuwela. Moone, khenvar'etthu. Eyo enoophutuwa.

"Khenikheriwa ekuwo esya khuheliwa vakuwoni ya khalayi, 'okhala wira munookhalaha yookhererya yothene eyo." Munnona? Yesu khahimnye yeeyo? Kheniheliwa Eviinyu esya mukhalini sa khalayi. Eyo enoopwexakasa. Eviinyu esya yookhalana Ekumi mwa yeeyo. Vaareera.

236 Nwehe etthu va, voowaakuvaxa vano, okathi onimalih'ahu e...ovaanela wahu. Nkawehani Wiisuupulula 16:13 mpakha 14, mwatthuna vale olepa. Khino nkinrowa okhalana okathi w'okela mwa yeeyo. Miyo kintthuna wira muhiyererye woona eyo. Vano nwehe, nno olavula wa Muhasa wa Neethanu na mosa ni wa Neethanu neili.

237 Vano hiyo nri...nnoomaliha muhina mwa minuutu mmosa paahi, mwawerya-ru ovilela minuutu vakhani tho. Nimalihaka naanaano.

238 Nwehe Wiisuupulula 16:13 mpakha 14, varyari va Muhasa wa Neethanu na mosa ni wa Neethanu neili, "Irooho tthaaru soonanara ntoko anaphulu" (mooweha yeeyo?) "saakhumme mwaano mwa mutthu." Vano nwehe, voowaakuva. Moolikana?

Mwiire, “Amen.” [Muthukumano oniira, “Amen.”—Mol.] Oraaru wa irooho!

<sup>239</sup> Vano munna a muromolelo, mukilaathi mmaale minuutu mmosa paahi. Muhivenye munakhuma musaala, muraatiyuni mmo, mutelefoonini. Muhittipihe ekaravatooro anyu. Mukilaathi mmaale minuutu mmosa paahi, nwiriyane. Nyuwo muyariwe a Muluku, munimwiira.

<sup>240</sup> Oraaru w’anaphulu! Naphulu mwaaxinama mmosa oniweha ottuli okathi wothene. Owo khonaweheke otthu onrow’awe; owo oniweha otthu onikhum’awe-wo. Munnona? Khamunoono? Oraaru ophattunwe woowi? Muupuwele, “irooho tthaaru soonanara,” irooho s’omeekh’aya. Munniiwa sana? [Muthukumano oniira, “Amen.”—Mol.]

<sup>241</sup> Nwehe, awo oniweha ottuli Muthukumano w’oNicea weiwo mwiixuttiho w’oraaru ophattunw’aya, kahi mBibiliani. Khekhanle etthu iyo. Awo oniweha ottuli Muthukumano w’oNicea oNicea, Rooma, weiwo oraaru ophattunw’aya-wo.

Nkawehani otthu awo anikhum’aya-wo. Nwehe. Ni oraaru w’anaphulu okhumme mwa oraaru wa khalayi, khuyara oraaru wa naanaano, amey’aya. Owo okhumme vai? Oraaru, “ehanasi,” moone, “nxeni,” ni “profeta oowootha.” Oraaru, musya. Vano anaphulu ala akhumme liini? Akhumme liini? Nwehe, awo yaari weiwo okathi wothene, masi khiwooniheriwe mpakha eriyari ya Muhasa wa Neethanu na mosa ni wa Neethanu neili, okathi vakhani Ikanyeryo sihinatthi otaphuliwa (Hmm?) wira suupulule.

“Vano mMutthakani wa nlaikha na neethanu neili, isiiri sa Muluku sinoosuveliwa,” itthu sothene iya sa oraaru, ni opatiiso woowootha, ni itthu sothene saari wira sooniheriwe. Muluku anikhaliheriwe wira noone ele eri Ekeekhai! Ni nihuupuwele wira ti mutthu oneererya ohimya etthu wira . . .

<sup>242</sup> Miyo kinnoona erooho eyo yuupuwelelaka-tho Yeeyo, moone. Miyo nkinihimya yoomi, munna. Miyo kinihimya Nlaikha n’Apwiya nri vapuwani. Eyo t’ikeekhai voolikane-ene.

<sup>243</sup> Nwehe, oraaru! “Ehanasi,” akavi ansuwela ele yaari ehanasi? Aari Rooma. “Vano ehanasi yaaheemela ohoolo wa muthiyana wira emmirye mwan’awe ayariwakaru.” Eyo ekeekhai? Exeeni enihimya “nxeni” mBibiliani? Owerya. Vaareera. “Profeta oowootha, profeta oowootha,” oowootha, ooreerihwi. Munnona?

<sup>244</sup> Opacenrye vai? Ola ti “profeta oowootha,” mmosa. “Profeta oowootha,” paapa oopacerya; nto okhuma vaavo anikhumelela “na—namuttompe, ni mai a anamararuwa,” etthu yothene.

Oraaru woowootha waahipacerya okhumelela; kahi mahiku oopacerya, khiwaarowa wooniheriwa mahiku oopacerya, owo orookelela ohoolo ni yeeyo. Masi okathi Ikanyeryo Thanu na

Piili sinrw'aya, n'utaphuliwa isiiri iyo ni wuupululiwa seiyo, p'ukathi "anaphulu araru, irooho tthaaru soonanara ntoko anaphulu, sinikhum'aya wira siisooniherye," mwiixuttiho wa oraaru onivirikanya Ekeekhai. Munnona? Ha!

Munnoona otthu onikhum'aya-wo? Munnoona otthu onrow'aya otthikela-wo? Mwaataano wa Elapo yothene. Awo othene axinnaa, mwa khula enamuna; irooho imosaru, etthu emosaru.

Ni nwehe. Yoowokexa, epakaka miiriirya! Nto ala t'axetwani anrowa wa amuluku othene a mulaponi, epakaka miiriirya, wira ewootothe mahiku ookiserya, ni anookelela ohoolo yiiraka yeeyo. Muluku aahimnye exeeni mwaha wa erooho eyo yootakhala?

Yiirale, "Miyo kinookhuruwa kivolowe mwaano mwa maprofeta ale oowootha ni kiwiirihe olaleerya etthu yoowootha, wira Akhabi akhume arowaka iwe wira iiviwe."

<sup>245</sup> Muluku khwira, "Rowakani. Munimweetta saana. Munoowaaminiha yeeyo. Awo khakhanle vasulu va Masu awo, opacerya wene." Munnona? "Rowakani, maana munoowaaminiha. Ti nyuwo munrowa wira, mwakelaru mwa maprofeta ale oowootha, 'okhala wira owo onaaroromela yaawo vekeekhai. Ni khonsuwela hat'etthu ya Masu, nnakhala khonrowa otthuna wiixutta Yaawo. Khonwerya wira, okhala wira malaxi oonanara, opacerya wene." Munnona? Munnona? "Munimweetta saana."

<sup>246</sup> Nkawehani va anaphulu ala oowootha, ewehasaka ottuli, "Vano, nyuwo moosuwela etthu yaahimnyans'aya iwe oNicea?"

Miyo khenikicala etthu awo yaahimny'aya, iwe oNicea. Miyo kinihimya ele awo ahimnyans'aya osulu nno Veehiceni va Muluku; ele enrowa okhala, kahi ele yaakhanle; ele enrowa okhala, maana Owo ti "MIYO KOOKHALA." Munnona?

"Oowootha." Nkawehani yeeyo. Ha! Nwehe otthu awo anikhumas'aya.

<sup>247</sup> Vano (Nwiriyane oratteene.) hiyo ninnoona voowooneya, simanly'aya otaphuliwa Ikanyeryo Thanu na Piili. Eyo eri wira yuupulule mwiiriirya owo: Oraaru uwo exeenii? Munnona? Ti vai otonko aya wiianiwa oraaru? Munnona? Ti vai mBibiliani Owo otonko awe olavula nuulumo oraaru? Ti vai vaaweryaneya okhala aMuluku araru, naakhanly'ahu oowaakokhorela aMuluku araru khuhikhala apakawu?

Vanweryaneya sai awo ovalaanyihiwa, Owo ohimnye-ene wira, "Miyo n'Atithi Aka nri Mmosaru"? "Voohikhala wira munimwaamini wira Miyo ka Yaawo, munimookhwa ni itampi sanyu, moone, ohaamini wanyu." Etampi ohaaminii. "Munimookhwa mwa ohaamini wanyu."

Oh, nyuwo muniira wira Miyo ki pani, muniira  
wira Miyo kikhumme woowi,  
Oh, munnaasuwela Atithi Aka, wala  
munniwerya ohimya Nsina Naya?  
MIYO KA Ethutu ya Saroni, Ettheneeri  
Yoowaarya y'Oxaka.

Munniwerya okileela Owo ti Pani?

MIYO KA ole aalavunle ni Moise vamwiiwani  
waavarela Mooro,  
MIYO KA Muluku a Abrahamu, Ettheneeri  
Yoowaarya y'Oxaka.  
MIYO KA Ethutu ya Saroni, oh, muniira wira  
Miyo kikhumme vai;  
Oh, munnaasuwela Atithi Aka, wala  
munniwerya ohimya Nsina Naya? (Amen!)  
MIYO KA Alfa, Omeka, Ephattu ni Emalelo;  
MIYO KA opattuxa wothene, ni Yesu ti Nsina  
Nawe.

<sup>248</sup> Eyo ekeekhaii. Kahi Oraaru! Nnari, mulopwana. Eyo etthu  
yoowootha.

Ikanyeryo Thanu na Piili, sitaphulaka miiriirya iyo “sinrowa  
omalihiriwa,” sinnooniherya. Ekanyeryo yootaphuliwa;  
ennireherya, ennikhumela, sinnikhaliha soowooneya Ikeekhai  
soowiipithihiwa Ikanyeryo siipithinhe aya miyaakha iya  
sothene, mwa ikereja iye sothene ni miromolelo.

“Namuttompe muulupale,” a Wiisuupulula mithanu  
na miili-...Owo aari pani? Masi owo ti “MAI A  
ANAMARARUWA,” nave. Munnona?

<sup>249</sup> “Vano, nyuwo muwiihanne ‘amarepo’” nyuwo muniira,  
“Munna Branham.” Eyo ekeekhaii.

Masi, muupuwele, marepo mwaapalame. Owo t'oreerihwa  
wira ovaveke, nave. “Irooho soopiili sinrowa okhala soolattana  
saarow'aya owoototha ale Oothanliwa . . .” Marepo t'owunnuwa  
siiso ntoko xa—ntoko xawawe. Owo aamuwerya ovava ntoko  
xawawe ole; ni t'oreerihwa wira ovaveke, wala olaleerya,  
wala ohimya s'epofeta, nwehe, siiso ntoko xawawe. Masi  
owo khonwerya omutthara xawawe mwa ettukhuwelo. Nnari,  
nnari. Owo eererya vale omutthara xawawe, ololo awe  
onimoonihiriwa. Ayo, mulopwana. Owo khonwerya omutthara  
xawawe.

Oh, owo onniwerya wira, “Miyo kinnimwaamini Yesu Kristu  
okhala Mwaana a Muluku. Kinnimwaamini Muluku Tithi,  
Oowerya sothene, Mpattuxa wirimu n'ilapo ya vathi; Yesu Kristu  
Mwan'Awē,” ni siiso. Oh, vekeekhai, awo anniwerya wira yeeyo.  
Masi ankhī vanihimya Owo okhala mmosaru nsana, olelo, ni  
mahiku othene? Munnona?

<sup>250</sup> Xawawe mwaapalame mmosa a mukhalelo w'omekh'awe. Khiyaavo hat'etthu ntoko owo, elapo ya vathi. Munnona? Owo—owo... Marepo eererya-ru omutthara, wala khula mwaapalame mukina, owo aamunyaanyeya. Ilolo sawe saamooniheriwa, veekeekhai. Owo aamuphutuwa okathi aarow'awe weererya ohela Eviinyu esya mukhalini ya khalayi. Moone, owo aamuphutuwa. Owo aamunyaanyeya. Owo khopakiwe, owo kho... Erutthu awe khephitaanyiwe ni mukhalelo wira omuvareleke osulu iwe. Owo aphiyaru mapuro ale maalupale osulu iwe, vakhala wira owo khopakiwe, khotthokiheriwe, khotthommwe, khoyariwe xawawe, owo onoophutuwasa ipantte-ipantte. Munnona? Mapururu yaamukhuma mmapuphani mw'awe, vano owo aamurowa omorela vathi. Vekeekhai. Owo khonwerya omutthara xawawe, mwa ethukhuwelo. Owo eererya-ru, ololo awe onimooniheriwa. Eyo ekeekhai. Khivanweryaneya.

<sup>251</sup> Mwaha wa xeeni? Owo khonwerya woona ntoko xawawe. Eniphwanyihani weererya otuphela osulu saana, vahiweryaneyaka woona vary'anyu mwakhala osulu iwe? Vano owo eererya-ru, hata weererya omutakiha xawawe ola, mwa ittukhuwelo, owo onikhala oohoona vahinsuwel'awe vatthu vaphiny'awe. Eyo ekeekhai. Owo onookhuwela n'unyakula, ni wira itthu sootikinihasa; masi mmulavulele Masu paahi, vano, vo ololo awe onimooniheriwa.

Mulavule ni yoowo opatiiso ni Nsina na Yesu Kristu, wala, Owo okhala mmosaru nsana, olelo, ni mahiku othene, sothene—sothene siiso, nto mmulele. “Vano, oh, vano nwehererye minuutu mmosa paahi!” Munnona? Oh, ayo, vo mapururu awe anoomoramora. Moone, owo othene onootuphatupha, n'uhimya s'eprometa, ni owomola axetwani, n'ulavula ilavulelo, n'unyakula, wira itthu sootikiniha, otthimaka nno ni nno. Masi muheererye otthara osulu Iwe; vano, owo vekeekhai onookhala oosuweliwa.

Nnya, owo t'otthokihiwa. Owo t'oreerihiwa. Owo onniwerya ovava. Owo onniwerya wiilipiherya mmansawe, owela iwe, masi kahi... ottaiwenexa. Moone, owo onniwerya okhuura enama yowunta, masi khonwerya okhuura Enama ekithi enikhuma Veehiceni.

Owo t'ohoona. Owo othene t'owiihimya, masi khonsuwela etthu enihimery'awe. Moone, Eroho ene yeeyo emukhuruwenle, ntoko epula, wira emukhalihe etriku; owo kohiyo etriku opacerya wene. Owo onoophutuwa. “Oh, nkikhanle oothanla emosa... Oh, nnari, mulopwana! Koonsuwela wira Totori Jones ohimye wira...” Vareera, mukeleleke ohoolo. Munnona? Mukeleleke ohoolo, mwatthuna vale.

<sup>252</sup> Nnari, nwehe, owo khoyariwe, ahiso khopakiwe, wala otthommwa, wira okhale muthinto owo wa mwaapalame.

Owo onniwerya . . . Owo ti . . . siiso okhanle-ene limawu oniima vamuraranceni, masi owo khonakhumeke mmutathaarini. Owo etthu emosa etakaahiwe. Nto yaaphiyaka osulu saana muhina mwa miromolelo saya vahinwery'aya woona Masu ootthommwa a Muluku oolipiheriwa, vano ololo aya onimooniheriwa. "Oh, etthu iyo, Nleha vamuru, ni sothene, oh, Eyo kkena maana." Munnona? Onoosuweliwa.

253 Owo khopakiwe wira ooneke ottaiwene siiso. Owo onwerya paahi woona ottaiwene ntoko ilumeta sa muromolelo awe sinrow'aya omuwehiha. Masi, nuumala yeeyo, owo t'ohoono ntoko nantuuthu. Ti vaavo nto ololo awe onooniheriw'aya. Munnona? Ti vaavo xawawe eekeekhai onikilaath'awe wira olye. Ayo, mulopwana. Ti vaavo axawawe eekeekhai, oothanliwa anoon'aya ele owo okhanly'awe. Okathi ohinwery'awe okuxa Masu awo, awo anoosuwela naanaanoru vaavo wira owo marepo a mmuromoleloni.

254 Vano, owo ohinweryelani ovava? Okhala wira, nwehe etthu owo onilyaak'awe. Owo onikhuuraka enama yoosukumana ya mmuromoleloni. Eyo kheni—khenikhaliha y'erooho erutthu awe, khenimukhaliha mwa mukhalelo wa erooho, mwa moolumo makina, wira emukhalihe vasulu va ivirikanelo sa miromolelo. Munnona? Moone, owo onlya paahi etthu yoowuntta; erutthu awe epakiwe ni yeeyo. Owo khonwerya owela osulu iwe weiwo Enam'ele ekithi enimuroih'aya-wo xawaw'ole. Owo khonwerya wira eyo. Munnona?

255 Eyo ennimumaliherya Matewu 24:24. Owo onoovava, otuphaka musulu, omanaka mapupha awe, masi khonwerya orowa osulu voophiyerya. Munnona? Eyo eekeekhai. Moone, owo khonwerya orowa, owo khonwerya ophiya osulu sana wira ophwanye Emana ele esya. Owo onniwerya olya emana ya khalayi eri vathi va, ahukula a khalayi ookhwaasa aphitiwe esumana evinre, mweeri ovinre, wala miyaakha miloko mixexe sivinre, opahuwa. Owo onniwerya olya yeeyo, n'utthapa mwaha wa yeeyo, otepurya n'ukhuwela, ni wira itthu sootikiniha, otuphasa n'uvava ntoko xawawe mukina. Owo t'oreerihwa, ntoko mwaapalame mukina.

Vano owo t'ithoonyeryo ya xawawe, marepo ti siiso. Hiyo noosuwela eyo. Owo vekeekhai ti yeeyo, masi khonwerya omutthara xawawe ole eekeekhai. Munnona? Owo khonwerya wira tu. Nnari, mulopwana. Erutthu awe khepakeliwe; owo onikhuuraka enama yoosukumana yoovirikana, moone, ni eyo khenikhala . . . eyo kheni—eyo khenikhala Enama ekithi, Emana esya. Eyo enrowa okhala etthu emosa ntoko ele Lutero elavunly'awe, Wesley elavunly'awe, wala Totori *Lexe ni lexe* elavunly'awe. Khenrowa okhala ele Yesu olavunly'awe ya okathi ula.



<sup>256</sup> Nrowe vano, nimalihe. Ooreerihwa, “aKristu,” mahiku ookiserya, masi “awiixuttihi oowootha ni maprofeta oowootha.” Nwehe moota entutux’aya! Vano, kintthuna wira mulikanyihe ela; khanrina okathi wo osoma eyo, Matewu 24:24 ni Timoteyo Aneili 3:8.

Matewu 24:24 ohimye wira, mahiku ookiserya, moone, “Animoorwa aKristu oowootha,” ooreerihwa oowootha, “maprofeta oowootha, ni animooniherya ithoonyeryo ni mitikiniho,” voolikana ntoko Ole eekeekhai, Ole eekeekhai, “ni anoo—anoohalela owootoha hata ale Oothanliwa.” Vano nwehe, owo aari Yesu alavulaka.

<sup>257</sup> Va noorwa ti Paulo, ottuli Wawe, khwira, “Vano, mahiku ookiserya, anookhumelela athu anatiini, moone, yooneyaka ntoko athu oothunku. Ni anaakuxa axithiyana ookhweya murima, aneettihiwa ni soowunlela sothene sa molumwenkuni.”

N’awo anootikinihiwa, aniira, “Mwaha wa xeeni nyuwo waavelavelihaka athiyana awo?” Oh, mwaha w’ophenta . . . Awo nnakhala khaanoona Eyo.

“Anaakuxa axithiyana ookhweya murima, aneettihiwa ni soowunlela soohiyana-hiyana,” yaaroihaka ottaiwene wa ithu ntoko o . . . sa . . . Moone, “Ni ntoko Yane ni Yampere . . .”

Matewu 24:24, “aKristu oowootha,” oowootha, ooreerihwa, epakaka ithoonyeryo ni mitikiniho wira ewootothe Oothanliwa.

“Vano ntoko Yane ni Yampere yaamuvaanyih’aya Moise, siiso animwiira ala oorimeeliwa waamini; oopahuwa ankhili vanihimya Waamini.” Kahi waamini “mmosa.” “Waamini!”

“Waamini omosa, Pwiya mmosa, opatii omosa- . . .” Khivanweryaneya okhalana “Waamini omosa” muhimwaaminiki “Pwiya mmosa.” Khivanweryaneya okhalana opatiiso miili, hata emosa ya Tithi, ni Mwaana, Eroho Yowarya. “Opatiiso omosa,” Yesu Kristu. Eyo ekeekhai. Moone, opatiiso woowootha!

<sup>258</sup> Nwehe, mulikanyihe iyo vano mwaphiya vale owaani. Mmuwehe Matewu 24:24, Yesu alavulaka; Paulo, Timoteyo Aneili 3:8; sinci-ene sikina. Nto vano mulikanyihe yeeyo.

<sup>259</sup> Vano nto muhele Yoolempwa ekina, Luka 17:30, Malakhiya 4.

“Ntoko Yane ni Yampere yaamuvaanyih’aya Moise,” Masu ooreerihwa a okathi, “siiso animwiira athu ala,” kahi mutthu, “athu,” ooreerihwa, “annivaanya Ekeekhai.”

<sup>260</sup> “Nihiku nene nenlo Mwaana a mutthu onoonihew’awe.” Wiisuupulula 10:1 mpakha 7, mmusome mwaphiya vale owaani, “Mutthaka wa nlaikha na neethanu neili, otaphulaka Ikanyeryo.” Exeeni iyo? Kahi nlaikha nikhanelle Mwaana a mutthu; masi namitthaka t’animooniherya Mwaana a mutthu. Munnawerya ovalaanyiha eyo vano? Ti vaavo enikhal’aya ntoko

yoorika wa nyuwo, moone. Kahi Mwaana a mutthu, Mwaneene; masi nlaikha na neethanu neili, namitthaka a neethanu neili, oniwooniherya atthu Mwaana a mutthu, okhala wira Owo oohiya nikatamphe. Owo khokhanle ootthokihaka Awo. Eyo ti Enuku, Eneene, emaara ekina.

“Vano nihiku nlo, Yane ni Yampere anoovaanyihasa,” ooreerihwa (oowiipaka waamini ni oohaamini, ekereja yooriirya ni aPentekosite) anoovirikanyihwa Enuku y’ekeekhai, “masi mwaahiye mmansaya; ololo aya onimooniheriwa, ntoko w’awayu wooniheriw’aya.” Munnona? Munniiwa sana vano? [Muthukumano oniira, “Amen.”—Mol.]

<sup>261</sup> Wiisuupulula 10, ohimye wira, “Mahiku ninlavul’aya nlaikha na neethanu neili.” Vano muupuwele, na neethanu neili, Okathi w’Ekereja ya Lawotiseya. “Olavula wa nlaikha nlo,” okathi wa ekerej’eyo waitthokiharu khukhala okathi wa ekereja, wakhalaru mmutthenkesoni mwaya wa Pentekosite; okathi namitthaka a yeeyo. . .

Exeeni aari khula namitthaka? Exeeni aari Martinho Lutero? Opwapweliwa wa aKatolika. Exeeni aari Wesley? Opwapweliwa wa maLuterano. Exeeni aari Pentekosite? Opwapweliwa wa ale akina. Ekumi ene eronwe vai vano? Ottaiwene wa mutthenkeso. Khanikhanle-tho nikatamphe; ti Enuku. Exeeni iyo? Opwapweliwa w’aPentekosite, moone, wira emaliherye Yoolepwa y’okathi ula. Munnona?

<sup>262</sup> Nwehe, nihiku nenlo namitthaka ola. . . Kahi okathi owo onipacery’awe, masi onipacery’awe olaleerya Mutthaka awe. Munnona? Mutumereryo Woopacerya, ovoniha; Mutumereryo wa Neili, olaleerya s’profeta; Mutumereryo wa Neeraru, okhunliwa wa Masu, wuupululiwa miiriirya. Kahi tho, khekhanle erumelo yuulupale wira yuupulule Masu, woohikhala maprofeta. Masi enamuna emosa paahi vanweryaney’aya profeta olipiheriwa enikhala ni Masu. Ni, muupuwele, Mutumereryo wa Neeraru waari otaphuliwa wa Ikanyeryo iye Thanu na Piili, wira suupulule Ekeekhai yaavithiwe yaatthittiwe muhina mwa Masu. Munnoona? [Muthukumano oniira, “Amen.”—Mol.]

Ti yeeyo nto, nihiku nenlo nry’aya wira etthu ila yiiraneye, nenlo Yane ni Yampere, anamatakiherya, anrow’aya okhumelela-tho. Siiso ntoko siiraly’aya okathi Moise aakhumelenly’awe ni Masu eekeekhai, wira ohimye Yaawo, awo anookhumelela wira etakiheke Yaawo. Vekeekhai siiso. Vano munnoona exeeni ori Matewu 24:24? Moone, ooreerihwa!

<sup>263</sup> Vano sookhala itthu tthaaru sinrow’ahu ohimya nahinatthi omaliha. Ti yeeyo tu. Miyo kintthuna wira nwiiriyane oratteenexa vano nimalihaka. Itthu tthaaru, muupuwele, itthu tthaaru soomaliheriwa. Itthu tthaaru siri ohoolo wanyu naanaano va.

<sup>264</sup> Yoopacerya. Olumwenku ori ni mukhalelo w’oSotoma. Yesu ohimye wira eyo yaamurwa wiiraneya. Nkawehani

ohononeya; axithiyan'ahu yeereyaka wira ntoko alopwana; alopwana ahu yeereryaka wira ntoko athiyana, oothiyana; oowuntta, oonanara, oopahuwa, oovariwa xetwani, nave khansuwela. Bibilia ohimnye wira eyo yaamwiiraneya, nto ti vaavo varyaaya.

<sup>265</sup> Yaneili. T'ukathi ene yoowo, nittharihaka Yoolempwa va, Yane ni Yampere anikhumelelas'aya. Yaneili.

<sup>266</sup> Yaneeraru. T'ukathi ene yoowo Mwaana a mutthu oryaawe wira ooniheriwe.

<sup>267</sup> Vo t'ori mulipa-oowaamini anyu, oowiipaka waamini, ni oohaamini. Aakhala Masu ooloka yiikumiheryaka, oolipiheriwa; ookhala oowiipaka waamini otakiheryaka Yaawo; ni ookhala ole oohaamini okhoottaka etthu yothene.

Masi onookhala Waarya okathi wa makaaripi,  
Ephiro ya Moovuwani vekeekhai  
munoophwanya. (Eyo ekeekhai?)

Maloko anookawanyeya, Isarayeli onoovenya,  
Ithoonyeryo Bibilia ahu ohimmy'awe khalayi-  
ene;  
Ni mahiku a Amalapo t'owaalakeya (Sotoma),  
oosareya woova;  
Mutthikele, yawinyu, O oomwaramwareya.

Nihiku noovuluxiwa nri vakhiviru,  
Mirima s'atthu sinoovolola, ni wookhala  
woova;  
Musarihiwe ni Eroho ya Muluku, mukhalane  
mithuko sanyu soothokihwiwa ni sooreera,  
(vano munoowerya woona Masu a okathi.)  
Nwehe osulu, ovuluxiwa wanyu ori vakhiviru!

Maprofeta oowootha animootha,  
(yaahihimmwa wira yaamukhalasa muumu;  
ooreerihwiwa), Ekeekhai ya Muluku awo  
anookhootta,  
Wira Yesu Kristu ti Muluku ahu.

Ti yeeyo, awo khanaamini Iyo. Bibilia ohimnye wira yaamukhala etthu ene yeeyo va. Ela eri va!

Masi hiyo nnoorowa weetta memme arummwa  
anyakelans'aya-mo. (Waarya mmosaru! "Ni  
waahokoloxerya Waamini w'axitithi aana.")

Nihiku noovuluxiwa nri vakhiviru,  
vakhiviruxa,  
Mirima s'atthu sinoovolola ni woova, (elapo  
enookomowa);

Oh, musarihiwe ni Eroho ya Muluku,  
mukhalane mithuko sanyu soothokihwiwa  
ni sooreera.

Nwehe osulu, ovuluxiwa wanyu ori vakhiviru.

Munnaamini yeeyo? [Muthukumano oniira, "Amen."—Mol.]  
Nrowe nuuramihe miru sahu.

<sup>268</sup> Elapo Mutthak'ola onrow'aya-wo, okhuma Olimani  
Onikhuma nsuwa mpakha Onikela nsuwa, okhuma oCalifornia  
mpakha oNova Yorke, okhurwela mpakha Okuusini, mpakha  
Onikela epheyo, mpakha mmitekoni, ni mapuro othene Owo  
onrow'aya, ni mutapernakulu mu. Hiyo n'anamuhaawii.  
Hiyo kharina ithu iya, suulupale, sa ithutu, ni iprokrama  
sa mutelevisawuni. Hiyo nintthuna paahi ovara yooreera  
sinwery'ahu. "Masi othene ale Atithi akivanh'aya Miyo  
animoorwa."

<sup>269</sup> Vano, kintthuna wira musuwele wira ela ti yoolipaneya, ni  
nyuwo muniwa efiita ela. Khino nyuwo mwaamuupuwela olelo  
wira keererya wiihimya mmansaka, ekhalaka wira kaakuxa  
Mutthak'ola. Miyo nkirina hat'etthu tho woohikhala nnaata  
n'Iyo, woohikhala etthu ekina ehikhanle nsu. Ni, nsu naka, hata  
voovirikanya muupuwelo aka wooloka; miyo kaatthuna oxaya  
inama ni miraakho. Masi p'utthuna w'Atithi aka kinihimiyaka  
wira, ni koolakela wira.

Miyo nkaari Ole aaruule omuro iwe; miyo kaarimweemela  
paahi iwe okathi Owo orwii'awe. Miyo nkihiyo Ole  
onipaka ithu iya n'uhimya khalayi-ene ithu iya siniiraneya  
voolikane-ene ntoko sinikhal'aya; miyo t'ule paahi kinikhala  
vakhiviru okathi Owo oniir'awe. Miyo kaari nsu paahi  
Owo aarumeenly'awe, wira ohimye Yeeyo. Khiyaari ile  
miyo kaasuwel'aka; t'ile miyo kiivaherenny'aka paahi, Owo  
aalavunly'awe-mo. Nkihiyo miyo, khinaari nlaikha na neethanu  
neili, oh, nnari; waari wiisooniherya wa Mwaana a mutthu.  
Khinaari nlaikha, mutthak'aya; waari mwiiriirya Muluku  
uupulunly'awe. Kahi mutthu; ti Muluku. Nlaikha khaari  
Mwaana a mutthu; owo aari namitthaka aakhumme wa Mwaana  
a mutthu. Mwaana a mutthu ti Kristu; Owo t'Ule munly'anyu-  
wo. Nyuwo khamunlya wa mutthu; mutthu, moolumo awe  
anoovonya. Masi nyuwo munlya Erutthu-Masu oohivonya a  
Mwaana a mutthu.

<sup>270</sup> Vakhala wira nyuwo khamunilya voomalela ni Masu othene,  
wira yoovaheni ikuru wira nvaveke vasulu va miromolelo iya  
sothene ni ithu sa molumwenkuni, munnitthuna wira okathi  
yoola, nivekelaka?

<sup>271</sup> Tithi Ootthuneya, ela etthu yoolipa. Kahi yookhweya wa  
mutthu onookhwa wira ela. Nyuwo moosuwela ithu sothene. Ni  
miyo kinoovekelani Nyuwo, Muluku ootthuneya, wira ehiiwiwe

voohiloka. Masi, moWaarya wa Masu Anyu, atthu ewerye weetta.

<sup>272</sup> Nto, Muluku Tithi, miyo nkisuwenle t'ani okhanle Oothanliwa; Nyuwo munnisuwela. Miyo nkisuwenle Orwa Wanyu ti wa liini. Masi miyo kinsuwela paahi wira Nyuwo moohimya wira ela yiiraneya vale, ala oowootha, ooreerihiwa; voohiloka okathi awo apacerans'aya.

Moise aarimwaahiya mmansaya, maana owo khaakhanle wira-tho etthu wa yeeyo. Owo aawerya ohimya paahi ele Nyuwo mwaahim'anyu. Nyuwo mwaahimuleela wira iihane itothomwa; vano awo khwiihana. Nyuwo khimuleela wira otatuxe maasi ekhale ephome; nto awo khwiira. Moise aarimwiira paahi, Nsu ti Nsu, ntoko Nyuwo saahimmy'anyu, masi nto ti Nyuwo Ole aakhalinhe ololo wooniheriwa.

<sup>273</sup> Vano, Tithi, Nyuwo mwa Muluku, nlelo. Masu ene yaawo ahimmye wira ela yaamukhumelela mahiku ookiserya. Atthu anci-ene a xariya, ntoko sihimmy'ahu Ettiminku evinre, ehelaka ntata naya Vakalawani, vasulu v'ekaaro yaamukhaani esya, ni kahi mmakhatani mwa aLevi, annimora ookhwa, "okhwa ni etampi ni sootheka," anivaanyihana ni muupuwelo aya aneene.

<sup>274</sup> Alaleyi anci-ene anikilaathi muskritooryu mwaya, n'usoma Masu awo, n'uhiya nikukhu nene naanaanoru; wira ehikhale oopwapwela, osuwela wira anoopwetexa mukhalelo aya mmawaani n'atthu, ni ekerej'awe nave ni muromolelo awe. Muluku munikhaliherye wira nihikhalakhale niiraka yeeyo!

<sup>275</sup> Mureerihe murim'ahu, Pwiya, mwa soonanara sothene sa molumwenkuni. Pwiya, miyo kinoovenya oolikana wira kirapihiwe. Miyo kinoovenya oolikana, n'ikerej'ela n'ale othene aniiwa, ni othene ole onrowa wiiwa efiita ela. Miyo kinoovenya, Pwiya, ni kinvekela orapihiwa. Pwiya, mukiroihe owanny'awe Mulipa-oowuupa mukipwexakase, ni mukuupe murumeyi Nyuwo muninthun'anyu.

Vano, Pwiya Yesu, "Miyo ka mutthu a iyano soonanara," ntoko Yesaya aakhuwenly'awe, "kikhalaka eriyari y'atthu a iyano soonanara; ni kootakhaliwa, maana kinnoona wiisuupulula wa Muluku okhalaka wo wooniheriwa," ntoko Yesaya oonaly'awe Malaikha Mpaani mookokhorela. Miyo kinnoona okathi wa wokiseryani, Pwiya, nto kootakhaliwa miyo ni amusi aka; kootakhaliwa miyo n'atthu aka. O Muluku Ohinimala, munimorele ikharari. Miyo kinniivekelela yoomi n'atthu. Muhinihiye nipweteyaka n'ale ahinaamini, masi nikhale n'ale anaamini.

<sup>276</sup> Khula muromolelo, Pwiya, khula mulopawana wala muthiyana...Nkikhanle woovekelakani wira mureerihe muromolelo, kisuwenle-ene wira Nyuwo munnivirikanya. Masi kinwerya wira paahi, Pwiya, Nyuwo mwaarine-ene ipwittipwitthi Sanyu kamosa-kamosa mme eriyari aya, siiwe

efiita ela. Awo yiiwe Ela, Pwiya, ni esuwele sana Ela ni maiwelo Nyuwo onrow'anyu waavaha, ni wira awo ekhume ewaakheleni. Wira awo ehootothiwe ni ohoona ni elimalelo ya nihiku nla. Awo eheererye olya etthu yaari murutthu wa nihiku nikina. Awo ekuxe Masu.

Ti siiso aFarisi yookhomenly'ayani Nyuwo, Pwiya. Awo yaakuxa murutthu wa nihiku na Moise, ni yeereryaka otthapela yoowo; mmanle-ene Nyuwo ovaha eyooniheryo aya, mothakoni, ya emana esya khula ohiyu, ehimyaka khula nloko. Ti vaavo awo yaavonny'aya. Eyo yaahaahapaliha. Eyo yaahiwiiva, olya yolya ele yoohononeya.

Ni, mwa erooho, eyo eniira etthu emosaru olelo; enniwiiva, mwa erooho, ni muromolelo.

Munikhaliherye, Muluku ootthuneya. Yothene eri mmatatani mw'Anyu vano. Mwa Nsina na Yesu Kristu.

<sup>277</sup> Ni miru sahu sowuurama, ninrowa wiipa nenlo okathi onlakel'anyu. Munoorowa ephiro yothene?

Kinniwerya omwiiwa Moopo-. . . (ni Owo ti Masu). . . -oli iihanaka, kinniwerya wiiwa. . .

"Oh, miyo kiheettasa pure okathi munci-ene, masi, vekeekhai, naanaano va kinnimwiiwa Yoowo, 'Murwe wa Miyo, othene nyuwo muneetta muhoonaka.' Mwiiwe, 'Mukuxe mwiikimanyo anyu, mukitthareke Miyo khula nihiku.' 'Ayo, hata keettaka mwepiphini wa mokhwaani, nkinoova etthu yootakhala; mmunyepuni sikithi, ni maasi omaaleleya.'"

Ni vatthu Awo anikiroi'h'aya miyo. . .

"Pwiya, miyo kinnoona ololo owo w'oraaru. Kinnoona olumwenku wothene waaliwa mwa yeeyo; nthakathaka ninnuwaka mapuro othene. Masi vatthu Nyuwo onikiroi'h'anyu vano, Pwiya, miyo kinookhala ntoko ale mwa Miteko 19. 'Okathi awo yiiwans'aya Ela, awo yaahipatisiwa-tho ni Nsina na Yesu Kristu.'"

. . . kinootthara, ("Koorowa epantte y'ephiro, Pwiya, voophiyerya wira kiwaakheleni.")

Vano kinoorowa ni Yoowo mpakha wookiseryani.

[Muna Branham onipacerya wiipa vathi-vathi *Vatthu Awo Anikiroi'h'aya*—Mol.]

<sup>278</sup> Muluku ootthuneya, miyo kinniroromela wira eyo enikhuma vamurimani vaka. Kinniroromela wira enikhuma vamurimani v'atthu othene aniipa okathi ula, khino anci-ene anrowa wiiwa efiita ela, ahikhanle vaava wala ahiniwa vano. Wira nikhale ootthuna, Pwiya, nihicalaka esisapo ene. Moohimya wira, "Ntoko mutthu onrowa okumana ni muttitthi mukina w'anakhotto, nakhotto, mwene; yoopacerya owo onookilaathi khutthokelela, sinto onniwerya wira, onniwerya ohiya itthu

sa molumwenkuni? Munniwerya ohiya, khwiitakaniha ni anakhotto a Masu oolempwa a Muluku, weetta n'anakhotto Awe, ovava n'axawawe Awe?" Munivahe, Pwiya, mwa Nsina na Yesu.

<sup>279</sup> Munnaamini? Munnimukupali Yoowo? Vaareera. Nnoowoonani-tho va, olelo ohiyu, Apwiya yatthuna vale. Nyuwo munnaamini wira eyo ti Ekeekhai? [Muthukumano oniira, "Amen."—Mol.] Ti yoowiiweya voophiyerya? ["Amen."]

Vano mukuxe Nsina na Yesu ni nyuwo,  
Mwaana ooxanka ni mukattyamiho;  
Nlo nnimoovahani otthapa ni olipa,  
Mukuxe khula- . . .

Vano, muvahane mukhono ni mutthu ori vakhiviru ni nyuwo vano.

Nsina nooreerexa, Oh noosivela!  
Nroromelo wa mulaponi, nroromelo wa  
mulaponi, otthapa wa Wirimu;  
Nsina nooreerexa, Oh noosivela!  
Nroromelo wa mulaponi ni otthapa wa Wirimu.

Mwa Nsina na Yesu nuurameliwe,  
Okokhoreliwaka inawu sawe,  
Mwene a mamwene Wirimu hiyo  
nnoomuwaraha nleha... (Owo ti Muluku,  
nto)

Mukwaha ahu waphiyaru okhomoni.

Nsina nooreerexa, Nsina nooreerexa, Oh  
noosivela! Oh noosivela!  
Nroromelo wa mulaponi otthapa wa Wirimu;  
Nsina nooreerexa, Oh noosivela!  
Nroromelo wa mulaponi otthapa wa Wirimu.

<sup>280</sup> Kinoona wira arumeyi othene aasuvelihiwa voosiis'ula, osuwela-tho.

Okathi mutthu onlomp'awe esumana yothene, otthunaka osuwela etthu, oonaka Soolempwa iya, siheliwe-ene ohoolo wanyu wene. "Nto kootakhaliwa miyo," ohimye ti Paulo, "kaahilaleeryeke Ehapari yooreera." Nto wookiseryani w'ephiro awe, owo iirale, "Nkihin'ye wooleliheryani Miruku sothene sa Muluku ntoko sivahiw'aka Seiyo."

<sup>281</sup> Imaara sikina kinniliyala osuwela itthu, owooniherya, waavahererya anamwane.

Billy aahihimya, nihiku nlo, wira mulopwana mmosa arimoorwa, khwira, "Soovira miyaakha miili kirw'aka va, wira mwan'aka ovahereriwe."

Billy khwira, "Muhuupuwele voohiloka mwaha wa yeeyo. Kookhalana mwaana, a mwaakha mmosa; owo khonatthi ovahereriwa nlelo, nave. Vano miyo kinoowehererya paahi

wira owo onnuwe voophiyerya wira eette arowaka mmansaawe, wona waka.”

<sup>282</sup> Vano hiyo ninnimuphwanya munna mulopwana, muthiyana, kahi—kahi, moone, miyo...Etthu emosa, hiyo nihaana waavahererya an’ihu.

Hiyo nihaana waapatisa atthu othene. Yookhala etanki; va aakhala maasi. Mwiira muhipatisiwe, exeeni enookhoottihani? Va aakhala maasi. Murwe naanaano va. Muhiwehererye mpakha ohiyu; murwe naanaano va. Ookhala mulopwana eemenle va onoomupatisa mutthu ti mutthu orukununxe murima ni olampe. Mwaapatisiwe-ene imaara muloko ni piili, awo animoopatisani ni Nsina na Yesu Kristu wira muleveleliwe itampi. Munnona? Hiyo na yeeyo.

<sup>283</sup> Masi, moone, Mutthaka ori vamurimani vaka. Kihaana ohimya Yoowo. Iwo t’otthuna waka paahi, hata wira amwaar’aka anihimyani, an’aka anihimyani, pastore aka onihimyani, etthu p’itthu aka enihimyani. Ti Pwiy’aka. Miyo kihaana ohimya Owo. Iwo t’utthuna waka paahi.

<sup>284</sup> Nto vano, imaara sinci-ene, kinniliyala waasuwela arumeyi. Kinoona wira khino...munn’ihu, Munna Neville, mulopwana mmosa oottittimiheya. Axinna ala akina va, hiyo ninnitthapa okhala ni nyuwo.

<sup>285</sup> Kahi wira hiyo nnovirikanyana ni nyuwo, munna, wira nikhale oovirikana. Anci-ene a nyuwo va siiso mukhanle-ene alaleyi a oraaru. Hiyo khanintthuna onanariwa ni nyuwo. Hiyo ninnoophentani. Nahoophentani, kahaamini yeeyo, nkaakhuma mukereja mu mpakha kikokhore vale kiire, “Muluku, mukilokihe.”

Nkinthuna erooho eyo yoowiisoona, yoowiiphenta otakanxana ni yawaka. Kintthuna wira erooho aka ekhale yooloka ni yooreera, ophentana w’axinna, ooreera ni Eroho Yowarya. Vano, akhala mutthu onikiirela yoonanara miyo, khiva mulattu. Ni hata kikhalanaka ehakhi y’owunlela ikuhu, nkinthuna eyo mwa makhalelo aka. Nnari, miyo—miyo kintthuna kikhalane ophenta. Kintthuna kikhale oolikana wira kittharuxeke ni ophenta, ni ophenta onaakhulela yeeyo voomalela.

<sup>286</sup> Nkinthuna okhala oovirikana. mMetotista, muPatista, muKatolika, Prespiteriyaano, munakhaleru mutthu ti mutthu, nkinihimya itthu iya wira kikhale oovirikana, okhala oowiisoona ni nyuwo. Vakhala wira kookhala, ka namirima miili ni kihaana okhala vathi va valtari va, kinvekelaka Muluku.

Masi kinihimya ela, mwaha w’ophenta, ni kinnoona otthu onrow’anyu. Vano, nkinihimya ela mmansaaka, ni ohimya wira kinimwaanyiherya. Miyo kinooleelani SIISO ANIHIMYA T’APWIYA. Eyo Ekeekhahi. Ni kinnoophentani mwaha wa itthu iyo. Muluku ooreeriheni.



<sup>287</sup> Vano niipaka eversu ekina ya esipo ela, nrowe, nihinatthi orowa. Ninthuna wira mukhale vaava olelo ohiyu, mwawerya vale. Mwaahiwerye, Muluku okhale ni nyuwo mpakha nikumane. Hiyo ninvekela paahi wira Muluku ooree—ooreeriheni ni oovaheni yooreerexa ya muttetthe Awe, moone.

Mukuxe Nsina na . . .



*OOREERIHIWA A OKATHI WA WOOMALELANI* EMK65-0725M

(The Anointed Ones At The End Time)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasisu, mahiku yettaka 25 mweri wa Julho, 1965, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)